



Bodleian Libraries

UNIVERSITY OF OXFORD

This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>




This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.



LIBRAIRIE
OND CLAVREUIL
DE ST ANDRÉ DES ARTS
PARIS VI^E



TAYLOR
INSTITUTION
LIBRARY




ST. GILES · OXFORD

Vet. Fr. II A. 1763

11317

S. H. ... 10 ...
4 ...




LES
AMOURS
DE
DAPHNIS
ET
CHLOE

LES
AMOURS
PASTORALES
DE
DAPHNIS
ET
CHLOÉ.
AVEC FIGURES.



A LA HAYE,
Chez *JEAN NEAULME.*

M. DCC. LXIV.



TAYLOR INSTITUTION
UNIVERSITY
- 4 MAY 1967
OF OXFORD
LIBRARY



AVERTISSEMENT
sur cette Edition.

LES Amours Pastorales de Daphnis & de Chloé ont pour Auteur le Sophiste *Longus*. Il est difficile de fixer le temps auquel il a vécu : les Savants prétendent qu'il n'a écrit qu'après *Héliodore*, auteur des Amours de Theagenes & de Chariclée, lequel vivoit sous l'empire de *Théodose* & de ses fils ; c'est-à-dire, sur la fin du IV^e, ou au commencement du V^e siècle. Ils se fondent sur ce qu'il semble que *Longus* a imité *Héliodore*

AVERTISSEMENT.

en quelques endroits de son ouvrage : ainsi *Longus* pourroit être du V^e siècle. Il a écrit son Roman en Prose Grecque. L'amour & la simplicité Pastorales y sont dépeints avec tant de graces & tant de naturel , qu'il s'est attiré l'estime des Connoisseurs.

La premiere Edition Grecque de ce Roman est celle que *Raph. Columbani* fit faire à *Florence* chez les *Juntes* en 1598. Il en parut une autre trois ans après à *Heidelberg* , en Grec, avec la Paraphrase que *Laurent Gambarara* en avoit faite en Vers Latins , & qui avoit été imprimée en 1569. La liberté qu'il y avoit prise de changer , d'ajouter & de retrancher ce qu'il avoit jugé à propos , n'étoit point

AVERTISSEMENT.

propre à donner une idée juste de l'ouvrage de *Longus*. C'est ce qui obligea *Goth Jungerman* de travailler à une version littérale, laquelle fut imprimée avec ses notes à *Hanaw* en 1605. Il se fit une autre Edition de *Longus* en Grec & en Latin à *Heidelberg* l'année suivante, avec *l'Achilles Tatius*. *Pierre Moll*, Professeur à *Franeker*, ignorant toutes ces Editions, ignorant même que *Longus* eût été traduit en Latin, en publia en 1660 une traduction accompagnée de notes assez étendues. L'illustre M. *Huet*, ancien Evêque d'*Avranches*, nous apprend dans son origine des Romains, qu'il avoit eu dessein d'en donner une nouvelle. C'est une perte pour le Public

AVERTISSEMENT.

qu'il n'ait pas exécuté ce projet ; sa profonde érudition & sa critique fine & exacte , répondoient de la réussite de l'ouvrage.

Quoique *Politien*, dès la fin du XV^e siècle, eût parlé avantageusement de ce Roman, il n'avoit encore paru en aucune langue, lorsque le célèbre *Jacques Amyot* publia sa traduction Française en 1559. Elle eut le même succès que toutes les autres que nous avons de lui. *Pierre de Marcellus* crut rendre un grand service au Public, que de lui donner une prétendue nouvelle traduction. Tout ce qu'il fit cependant, ce fut de retoucher, ou plutôt de gâter le Français d'*Amyot*, & de s'écarter en différents en-

AVERTISSEMENT.

droits du sens de l'original , en voulant y faire des changements à sa façon. L'on dit qu'*Annibal Caro* , connu par plusieurs autres ouvrages , & entr'autres par sa traduction de l'*Eneïde* de *Virgile* , en avoit aussi fait une de *Longus* en Italien ; mais elle n'a pas paru. *George Thornley* en publia une en Anglois en 1657.

Lorsqu'on a formé le dessein de faire une nouvelle Edition des Amours de *Daphnis* & de *Chloé* en François , l'on n'a pas balancé à qui des deux Traducteurs de ce Roman l'on donneroit la préférence. *Amyot* l'a facilement emporté sur son concurrent ; c'est donc sa traduction que l'on redonne au Public. On n'a pu cepen-

AVERTISSEMENT.

dant se dispenser d'en ôter quelques contre-sens , qui étoient moins dûs à la faute du Traducteur , qu'à celle des manuscrits qu'il a eus pour y travailler. On en rendra compte dans les Notes.



P R É F A C E

DE LONGUS.

*E*STANT un jour à la chasse en l'isle de Metelin, dedans le parc qui est sacré aux Nymphes, j'y vis une des plus belles choses que je sçache jamais avoir veues, c'étoit une peinture d'une histoire d'Amour. Le Parc de soy-mesme estoit bien beau, aussi planté de force arbres, semé de fleurs, & arrosé d'une fresche fontaine, qui nourrissoit & les arbres & les fleurs : mais la peinture estoit encore plus plaisante que tout le reste, tant pour la nouveauté du subject, dont l'aventure estoit merveilleuse, que pour l'artifice & l'excellence de la peinture amoureuse, tellement que plusieurs passans, qui en avoyent ouy parler, alloient visiter le parc, non moins pour veoir ceste peinture, que pour faire priere aux Nymphes. Il y avoit des femmes grosses qui accouchoyent, & d'autres qui enveloppoyent de langes leurs enfans, de petitx poupards en maillot, exposez à la mercy de fortune, des bestes qui les nourrissoyent, des pasteurs qui les enlevoient, une compagnie de jeunes gens qui s'alloyent esbattre aux champs, des coursaies

PRÉFACE DE LONGUS.

qui escumoyent les costes de la mer , des ennemis qui couroyent le pays , avec plusieurs autres choses , & toutes amoureuses : lesquelles je regarday en si grand plaisir , & les trouvoy si belles , qu'il me prit envie de les coucher par escrit. Si cherchay quelqu'un qui me les donnast à entendre par le menu. Et ayant le tout particulièrement entendu , en composay quatre livres , que maintenant je dédie comme une offrande à plusieurs manieres de gens , pour ce qu'il pourra servir à guerir le malade , consoler le dolent , remettra en mémoire de ses amours celuy qui aura esté autrefois amoureux , instruira celuy qui ne l'aura encore point esté : car il ne fust ny ne sera jamais homme qui du tout se puisse tenir d'aymer tant qu'il y aura beauté au monde , & que les yeux auront puissance de regarder. Mais Dieu veuille qu'en descrivant les amours des autres , je n'en sois moy-mesme travaillé.





LES
AMOURS PASTORALES
DE
DAPHNIS
ET
CHLOÉ.

LIVRE PREMIER.



ITYLENE est une forte ville en l'isle de Metelin, belle & grande, environnée d'un canal d'eau de mer qui flue tout à l'entour, sur lequel y a plusieurs ponts de pierre blanche & polie, tellement qu'on diroit à la veoir que c'est une

A

isle, & non pas une ville. Loing d'icelle environ cinq quarts de lieue, l'un des plus riches habitans avoit un fort bel héritage; car il avoit des montaignes où se nourissoit grand nombre de bestes sauvages, des coustaux revestus de vignes, des plaines de terres labourables à porter froument, & pasturage pour le bestail, le tout estendu au long de la marine qui rendoit le lieu plus délicieux. En cette terre un chevrier nommé Lamon, gardant son troupeau, trouva un petit enfant que l'une de ses chevres alaictoit, & voici la maniere comment. Il y avoit un hallier fort espés de ronces & d'espines, couvert tout à l'entour de lierre, & au dessoubz la terre feutrée d'herbe déliée & menue, sur laquelle estoit le petit enfant gisant. Là s'en couroit la chevre ordinairement, de sorte que bien souvent l'on ne sçavoit ce qu'elle devenoit, & abandonnant son petit chevreau, se tenoit auprès du petit enfant. Lamon ayant pitié du pauvre chevreau que la mere abandonnoit en ce point, prit garde en quelle part elle s'en alloit: & un jour au chault du midy la suivit à la trace & vit comme elle entroit dessoubz le hallier tout doucement, comme si elle eust eu peur de blecer avec ses ongles

le petit enfant en entrant. L'enfant sucçoit le pis de la chevre ne plus ne moins que s'il eust tété la mamelle de sa mere nourrice : dequoy Lamon s'esbahissant, ainsi que l'on peult penser, s'approcha de plus près & trouva que c'étoit un enfant masle, grand pour son aage, & beau à merveilles, plus richement emmailloté que ne portoit sa fortune, estant ainsi misérablement exposé & abandonné à l'aventure : car il étoit envelopé d'un riche manteau de pourpre, qui se fermoit au collet avec une boucle d'or, & auprès y avoit une petite espée dorée, ayant le manche d'yvoire. Si fut de prime face entre-deux d'emporter seulement ces enseignes de recongnissance, sans autrement se soucier de l'enfant : mais y ayant un peu pensé, il eut honte de ne se monstrier pour le moins aussi charitable & humain que sa chevre ; de sorte que quand la nuit fut venuë il enleva le tout, & porta à sa femme, qui avoit nom Myrtale, les joyaux, l'enfant & la chevre. Sa femme toute estonnée lui demanda s'il étoit possible que les chevres portassent de telz enfans ? & son mary luy conta tout ; comment il avoit trouvé l'enfant abandonné, comment la chevre lui donnoit son pis à tetter, &

comment il avoit eu honte de le laisser périr. Myrtale fut bien d'avis qu'il ne l'avoit pas deu faire : ainsi estans tous deux d'accord de l'eslever, ilz ferrerent les joyaux & enseignes de recongnissance que l'on avoit exposez avec l'enfant, dirent par-tout qu'il est à eux, & le feirent alaicter à la chevre ; & afin que le nom même sentist mieux son Pasteur, l'appellerent Daphnis. De-là à deux ans un berger demourant non gueres loïn delà, qui avoit nom Dryas, en gardant ses moutons, vit aussi une toute pareille chose, & trouva une semblable adventure. Il y avoit en ce quartier-là une caverne que l'on nommoit la caverne des Nymphes, qui estoit une grande & grosse roche, creuse par le dedans, & toute ronde par dehors, au dedans de laquelle il y avoit des images & statues des Nymphes, taillées de pierre, les piedz sans chaussure, les bras tous nudz & reboursez jusques aux espaules, les cheveux espars au dessoubz du col sans tresses, ceintes sur les reins, toutes ayant le visage riant, & la contenance telle, comme si elles eussent ballé ensemble. Le dessus, pour mieux dire la voulte de cette caverne, estoit le meilieu de la Roche, au fond de laquelle fourdoit

une fontaine qui faisoit un ruisseau , dont estoit arrouzé le beau pré verdoyant ; au devant de la caverne , où l'humeur de la fontaine nourrissoit la belle herbe menuë & délicate, là estoient attachez & penduz force potz à traire les bestes, force flustes, flagoletz & chalumeaux, que les anciens bergers y avoient donnez pour offrandes. En cette caverne des Nymphes une brebis ayant n'aguères aignelé, alloit & venoit si souvent, que le berger mesme cuida plusieurs fois qu'elle se fust perduë, & à ceste cause la voulant chastier afin qu'elle demourast par après au troupeau, paissant avec les autres, sans plus s'escarter ni esgarer comme elle faisoit ordinairement, il feist un collet d'une verge de franc ozier, en maniere de lacs courant, & s'approcha de la caverne, pour y surprendre sa brebis: mais quand il fut auprès, il y trouva bien autre chose qu'il n'avoit esperé, car il vit la brebis qui donnoit à tetter son pis à un petit enfant, aussi gentillement & aussi doucement que sçauroit faire une nourrice. Le petit enfant sans crier prenoit de grand appetit, puis l'un puis l'autre bout du pis de la brebis, avec sa petite bouche, qui estoit belle & nette, pource que la brebis lui

lechoit le visage avec sa langue, après qu'estoit faoul de tetter. L'enfant estoit une fille, avec laquelle avoient esté exposées quelques bagues & enseignes pour pouvoir la recongnoistre à l'advenir; c'est à sçavoir une coëffe d'or, des patins dorez, & des chausses brodées d'or; aussi le berger estimant ceste rencontre estre chose advenue par expresse disposition des Dieux, & quant & quant ayant appris de sa brebis qu'il en devoit avoir pitié, enleva l'enfant entre ses bras, ferra les bagues dedans un bisfac, & fit prieres aux Nymphes qu'à bonne heure peust-il eslever & nourrir le pauvre enfant, qui comme implorant leur ayde & mercy avoit esté jetté à leurs piedz. Puis quand l'heure fut venuë de remener son troupeau au tect, retournant au lieu de sa demourance champestre, consta à sa femme ce qu'il avoit veu, & lui monstra ce qu'il avoit trouvé, en lui commandant qu'elle teinst de là en avant l'enfant pour sa fille naturelle, & que secrettement elle la nourrist comme sienne. Parquoy la bergere qui avoit nom Napé, devint incontinent mere d'affection, & commença à aymer & traiter l'enfant avec telle diligence & telle sollicitude, qu'il sembloit proprement qu'elle

eust peur que la brebis n'emportast le prix de douceur & de benignité devant elle : & afin que plus facilement on creust que l'enfant fut sienne, elle lui donna aussi un nom pastoral, & la nomma Chloé. Ces deux enfans en peu de temps devindrent grands, & monstroyent bien à leur gentillesse & beauté qu'ilz n'estoient point yssus de gens de village ne de païsans ; & sur le point que l'un fut parvenu à l'aage de quinze ans, & l'autre de deux moins, Lamon & Dryas en une mesme nuit songerent tous deux un tel songe. Il leur fut advis que les Nymphes (dont les statuës estoient en la caverne où il y avoit une fontaine, & où Dryas avoit trouvé la fille) livroient Daphnis & Chloé entre les mains d'un jeune garsonnet, fort gentil & beau à merveilles, lequel avoit des æsles aux espauls, & portoit de petites flesches, avec un petit arc, & que ce jeune garsonnet, les touchant tous deux d'une mesme flesche, commanda à l'un paistre de là en avant les chevres, & à l'autre les brebis. Les pasteurs ayant tous deux eu cette vision en dormant, furent bien marris de ce que leurs nourrissons estoient aussi bien comme eux destinez à garder les bestes, & mesmement pource que

les marques de reconnoissance qu'ilz avoyent trouvées exposées quant & eux, leur avoyent promis quelque bien plus grand estat & fortune bien plus éminente : à l'occasion de quoy ilz les avoyent jusques-là nourris plus délicatement que l'on ne fait les enfans des bergers, & leur avoyent fait apprendre les lettres, & tout le bien & l'honneur qu'ilz avoyent peu en un lieu champestre : mais toutesfois ilz déliberèrent d'obéir aux Dieux touchant l'estat de ceux qui par leur providence avoient esté sauvez. Et après avoir communiqué leurs songes ensemble, & sacrifié en la caverne des Nymphes à ce jeune garsonnet qui avoit des ælles aux espaules (car ilz n'en eussent sceu dire le nom) les envoyerent tous deux aux champs garder les bestes, leur enseignant particulièrement toutes choses nécessaires à l'estat de pasteur, comment il fault faire paistre les bestes avant midy, & comment après que le chauld est passé, à quelle heure il les fault remener au tect; à quoi faire il est besoing user de la houlette, & à quoi de la voix seulement. Ces deux jeunes enfans receurent cette charge aussi volontiers & avec autant de plaisir comme si c'eust esté quelque grande seigneurie, & aimoient

leurs chevres & brebis trop plus affectueusement que n'est la coustume des bergers: elle, pource qu'elle se sentoit tenuë de la vie à la brebis qui l'avoit alaictée; & luy, pource qu'il se souvenoit qu'une chevrel'avoit nourry. Or estoit-il lors environ le commencement du printemps que toutes fleurs sont en vigueur, celles des bois, celles des prez, & celles des montaignes, aussi jà commençoient les abeilles à bourdonner, les oyseaux à rossignoler, & les aigneaux à sauteler, les petits moutons bondissoient par les montaignes, les mouches à miel murmuroient par les prairies, & les oyseaux faisoient resonner les buissons de leurs chantz. Ainsi ces deux jeunes & délicates personnes voyans que toutes choses faisoient bien leur devoir de s'esgayer à la saison nouvelle, se mirent pareillement à imiter ce qu'ilz voyoient & qu'ilz oyoient aussi; car oyans chanter les oyseaux, ils chantoient: voyans sauter les aigneaux, ilz saultoient: & comme les abeilles, alloient cueillans des fleurs, dont ilz jetoient une partie en leurs seins, & de l'autre faisoient de petits chapeletz, qu'ilz portoient aux Nymphes, & faisoient toutes choses ensemble, paissans leurs troupeaux

l'un auprès de l'autre. Souventefois Daphnis alloit faire revenir les brebis qui s'estoient un peu trop loing escartées du troupeau, & souventefois Chloé faisoit descendre les chevres trop hardies, étant montées au plus hault de quelques rochers droits & couppuz; quelquefois l'un tout seul gardoit les deux troupeaux ensemble, pendant que l'autre vacquoit à quelque jeu. Leurs jeux estoient jeux de bergers & d'enfans: car elle alloit quelque part cueillir des joncs, dont elle faisoit un cofin à mettre des cygales, & cependant ne se soucyoit aucunement de son troupeau. Luy d'autre costé alloit couper des rouseaux, & en pertuisoit les jointures, puis les recolloit ensemble avec de la cyre molle, & apprenoit à en jouier bien souvent jusques à la nuit: quelquefois ilz s'entredonnoient du laiçt ou du vin, & s'entrecommuniquoient les autres vivres qu'ilz avoient apportez de la maison. Brief on eust plustost veu les brebis ou les chevres toutes escartées les unes des autres, que Daphnis esloigné de Chloé. Ainsi comme ilz estoient occupez à tels jeux, Amour leur dressa à bon escient une telle embusche. Il y avoit assez près de là une louve, laquelle ayant n'aguères louveté, ravissoit souvent

DE DAPHNIS ET CHLOË. II

des autres troupeaux de la proye à foison , dont elle nourrissoit ses petits louveteaux : parquoy les payfans du prochain village faisoient la nuit des fosses & pieges de quatre brassées de largeur & autant de profondeur , & espandoient au loing la plus grande partie de la terre qu'ilz en avoient tirée , puis les couvroient avec des verges longues & gresles , & semoient par dessus le demourant de la terre , à celle fin que la place semblast toute plaine & unie comme devant : en maniere que s'il n'eust passé par-dessus qu'un lievre seulement , en courant il eust rompu les verges qui estoient par maniere de dire plus foibles que brins de paille , & lors eust-on bien veu que ce n'estoit point terre ferme , mais une feinte seulement. Ayans faict plusieurs telles fosses en la montaigne & en la plaine , ilz ne peurent néanmoins prendre la louve , car elle s'apperçeut bien de leur ruse ; mais tuerent plusieurs chevres & plusieurs brebis , & presque Daphnis luy-mesme par tel inconvenient. Deux boucz de son troupeau s'eschaufferent tellement à combattre l'un contre l'autre , & se heurterent si rudement que la corne de l'un fust rompuë , dequoy sentant grande douleur celui qui estoit escorné , se mist en bramant à

fouir, & le victorieux à le poursuivre, sans luy donner loisir de reprendre son haleine. Daphnis fut fort marry de voir l'un de ses boucz ainsi mutilé de sa corne, & courroucé contre la fierté de l'autre, qui encore estoit si aspre à le poursuivre après l'avoir battu ; si prit un baston en son poing, & sa houlette à l'autre, & s'en court après ce poursuivant. Ainsi le bouc fuyant les coupz, & Daphnis le poursuivant en courroux, ne regarderent pas bien ne l'un ne l'autre devant eux, car ilz tomberent tous deux dedans l'un de ces pieges, le bouc le premier, & Daphnis après, ce qui luy sauva la vie, pource que le bouc soustint sa cheute : mais se voyant tombé en ceste fosse, il ne peut faire autre chose que se prendre à plorer en attendant si quelcun viendroit point pour l'en retirer. Chloé ayant de loing veu son accident, y accourut soudainement : & voyant que Daphnis estoit en vie, s'en alla vistement appeler un bouvier de là auprès pour luy ayder à le mettre hors de cette fosse : le bouvier chercha par-tout une corde qui fust assez longue pour luy tendre, mais il n'en peut finer : parquoy Chloé délia le cordon dont les tresses de ses cheveux estoient liées, & le donna au bouvier pour en





tendre un des bouts à Daphnis : ainsi firent-
ilz tant eux deux ensemble en tirant de des-
sus le bord de la fosse , & lui en s'aydant
de son côté le mieux qu'il pouvoit , que fina-
blement ilz le mirent hors du piege. Puis
après avoir tiré le bouc , dont les cornes en
tombant s'estoient brisées , tant le bouc
vaincu avoit esté promptement vengé , ilz
le donnerent au bouvier pour sa récompense.
Si convinrent entr'eux que si on leur deman-
doit à la maison ce qu'il estoit devenu , ilz
diroient que le loup l'avoit enlevé. Ils re-
tournerent ensuite vers leurs troupeaux , &
les ayant trouvez paissant tranquillement ,
ils s'assirent sur un tronc de chesne , & re-
garderent si en tombant il ne s'estoit point
blessé en quelque endroit du corps. N'y
ayant rien veu de blessé ni de meurdry ,
ains estant seulement tout couvert de terre
& de bouë , Daphnis resolut de se laver ,
avant que Lamon & Myrtale sceussent ce
qui lui estoit arrivé. Venant doncques avec
Chloé dans l'ancre des Nymphes , il luy
donna sa pennetiere & son fayon à gar-
der Daphnis alloit ainsi devisant & par-
lant puérilement en luy-mesme : Dea que
me fera le baiser de Chloé ? ses levres sont
plus tendres que roses , sa bouche & son

haleine plus douce qu'une gaufre à miel , & toutefois son baiser est plus piquant que l'aiguillon d'une abeille : j'ay souvent baïse de petits chevreaux qui ne faisoient encore que naistre , & le petit veau que Dorcon m'a donné : mais ce baiser icy est toute autre chose ; le poulx m'en bat , le cœur m'en tressaute , mon ame en languit , & néanmoins je desire le baiser de rechef. O mauvaise victoire ! ô estrange mal dont je ne sçaurois dire le nom ! Chloén'avoit-elle point gousté de quelques poisons avant que de me baiser ? mais comment n'en est-elle point morte ? ô comment les arondelles chantent , & ma fluste ne dit mot : comment les chevreaux saultent ; & je suis assis : comment toutes fleurs sont en vigueur , & je n'en fais point de bouquets ny de chapeletz : la violette & le muguet florissent , Daphnis se fene : Dorcon à la fin paroïtra plus beau que moy. Voilà comment le pauvre Daphnis se passionnoit , & les paroles qu'il disoit , comme celuy qui lors premier expérimentoit les estincelles d'amour. Mais le bouvier Dorcon amoureux de Chloé , ayant trouvé l'occasion que Dryas plantoit un arbre assez près de luy , & estant son amy de long-temps , dès

l'aage que luy-mesme gardoit des bestes aux champs , luy fait present de beaux fromages gras , & commençant à entrer en propos par leur ancienne connoissance , fait tant qu'il tomba sur les termes du mariage de Chloé , luy offrant par promesse plusieurs beaux & riches dons pour un bouvier , s'il la luy vouloit donner à femme. Ses offres estoient une paire de bœufs à labourer la terre , quatre ruches d'abeilles , cinquante pomiers , un cuir de bœuf à semeler souliers , & par chacun an un veau qui seroit prest à sevrer ; tellement que Dryas alleché par la friandise de tant de beaux presens , lui cuida presque accorder le mariage. Mais quand il vint puis après à penser en luy-mesme que la fille estoit digne de bien plus grand & plus riche party , craignant que si à l'advenir elle venoit à estre recongneüe , & que ses parens sçeussent que pour la friandise de ces dons on l'eust mariée en si bas lieu , on ne luy en voulust mal de mort , il refusa toutes ses offres & ses dons , & l'esconduisit tout à plat , en le priant de luy pardonner. Par ainsi Dorcon se voyant pour la deuxiesme fois frustré de son esperance , & encore qu'il avoit pour néant perdu ses bons fromages gras , délibera , puis que

autrement ne pouvoit, attenter de jouir par force de Chloé, la premiere fois qu'il la trouveroit seule à seul; pour à quoy parvenir il s'advisa qu'ils menoient l'un après l'autre boire leurs bestes, Chloé un jour & Daphnis un autre; à l'occasion de quoy il imagina une finesse qui estoit merveilleusement sortable & convenable à un gros bouvier comme luy. Il print la peau d'un grand loup qu'un sien thoreau, en combattant pour la garde & deffence des vaches avoit tué avec ses cornes, & l'estendit sur son dos, si bien que les pieds de devant lui tomboient jusques sur les mains, & ceux de derriere lui pendoient sur les cuisses jusqu'aux tallons, & la hure luy couvroit la teste, ne plus ne moins que faict le cabasset à un homme de guerre. S'estant ainsi déguisé en loup le mieux qu'il avoit peu, il s'en vint droict à la fontaine, en laquelle beuvoient les chevres & les brebis après qu'elles avoyent assez pasturé. Or estoit ceste fontaine en une vallée assez creuse, & toute la place à l'environ pleine de ronces, d'espines poignantes, de charbons & de bas genevriers, tellement qu'un vray loup s'y fust bien aisément caché. Dorcon se fourra leans entre ces espines, attendant

attendant l'heure que les bestes vinsent boire, & avoit bonne espérance qu'il espouvanteroit Chloé avec ceste peau de loup, & qu'il la faisiroit au corps entre ses deux bras, pour en faire à son plaisir. Tantost après arriva Chloé, qui amenoit ses bestes boire, ayant laissé Daphnis qui coupoit de la plus tendre ramée verte, pour donner à brouter aux chevreaux après qu'ilz seroient retournez de pasture : les chiens qui leur aydoient à garder leurs brebis & leurs chevres, suivoient le troupeau ; & comme naturellement ils chassent mettant le nez partout, ils le sentirent remuer, & se prindrent à abbayer, se ruerent sur luy comme sur un loup, & l'environnans de tous costez, sans qu'il s'osast dresser sur ses pieds, tant il avoit de peur, commencerent à le mordre de toute leur puissance. Or jusques-là craignant & ayant honte d'estre descouvert, & davantage estant deffendu de la peau de loup, qui le couvroit, il se tenoit tapy contre terre dedans le hallier sans dire mot ; mais quand Chloé, effroyée de prime face de le veoir, se print à appeller Daphnis à son aide, & que les chiens lui ayant arraché la peau de loup de dessus les espaules, commencerent à le mordre luy-mesme à bon escient, il se

print adonc à crier à haute voix, & à prier Chloé & Daphnis, qui jà estoit survenu, de lui vouloir estre en ayde : ce qu'ilz firent, & avec leur siflement accoustumé, eurent incontinent appaisé les chiens, puis amenèrent le malheureux Dorcon, qui avoit esté mords & aux cuisses & aux espaules, à la fontaine, & lui laverent ses blessures, où les dents des chiens l'avoient atteint, puis luy mirent dessus de l'escorce verte d'orme, maschée, estant tous deux si peu rusez, & si peu expérimentez aux hardies entreprises d'amour, qu'ilz estimerent que ceste embusche de Dorcon, avec sa peau de loup, ne fust que jeu seulement: au moyen de quoy ilz ne se courroucerent point à lui, ains le reconforterent & le reconvoierent quelque espace de chemin, en le menant par la main; & lui, qui avoit esté en si grand danger de sa personne, & que l'on avoit recoux de la gueule, non du loup, comme l'on dict communément, mais des chiens, s'en alla faire panser les morsures qu'il avoit par tout le corps. D'autre costé Daphnis & Chloé eurent bien de la peine jusques à la nuit à rassembler leurs chevres & brebis, lesquelles effroyées pour la peau du loup, & quand & quand esperdues & effarouchées

d'oüyr si fort abbayer les chiens , estoient les unes montées jusques à la cyme des plus hauts rochers , les autres courues jusques à la mer , combien qu'elles fussent au demourant bien apprinses d'obéir à l'appeau de leurs Pasteurs , de se ranger au son du flagolet , & de s'amasser ensemble , en oyant seulement battre des mains , mais la peur leur avoit adonc faict tout oublier ; & après les avoir donc suivies & retrouvées à la trace , comme on fait des lievres , les remenerent à bien grande peine , toutes au tect , puis s'en allerent eux-mesmes reposer , où ilz dormirent cette seule nuit de bon sommeil : car le travail qu'ilz avoyent prins le soir précédent , leur servit de médecine contre leur mesaise d'amour : mais quand le jour fut revenu ilz commencerent de rechef à estre passionnez comme devant , ils tressailloyent de joye quand ils s'entre-revoyoient , & estoient bien ennuyez & marris quand il falloit qu'ilz s'entre-laiassent ; ce qu'ilz souhaittoient les inquiétoit , & ilz ne scavoyent ce qu'ilz souhaittoient. Cela seulement scavoyent-ils bien , l'un que son mal estoit venu d'un baiser , & l'autre d'un baigner , outre ce que la saison de l'année les enflammoit encore davantage ; car il

estoit jà environ la fin du printems, & le commencement de l'esté, & estoient toutes choses en vigueur, les arbres chargez de fruits, les champs couverts de bleds, les cygales chantoient, & rendoyent les fruitcs une très-délicate & sœsve odeur; l'on eust dict que les fontaines, ruisseaux, & rivieres, convioient les gens à se baigner, que les vents estoient orgues ou flustes, tant ilz soupiroyent doucement à travers les branches des pins; que les bestes amoureuses se laissoient d'elles-mesmes tomber par terre, & que le Soleil prenant plaisir à voir de belles personnes nues, faisoit chascun despoüiller: au moyen de quoy Daphnis estant de toutes parts eschauffé, se jettoit dedans les rivieres & tantost se lavoit, tantost s'esbattoit à chasser, à prendre les poissons qui s'enfuyoient au fond de l'eau, & souventefois buvoit pour veoir si avec l'eau il pourroit esteindre l'ardeur qu'il sentoit en son cœur: mais Chloé après avoir tiré les brebis & la plus part des chevres, demouroit encore long-tems à faire prendre le laiët, car il falloit qu'elle eust le soing de chasser les mouches, qui fort la molestoient, & la picquoyent quand elle les chassoit: cela fait elle se lavoit le visage, & mettoit dessus sa teste un chapelet des plus

tendres branchettes de pin, se vestissoit d'une peau de cerf, qu'elle ceignoit dessus ses reins, & emplissoit un pot de vin & un autre de lait pour boire avec Daphnis. Puis quand ce venoit sur le midi, adonc estoient-ilz tous deux plus ardemment espris que jamais, pour ce qu'elle voyant en Daphnis entierement nud une beauté de tous poincts accomplie, se fondoit & se distilloit d'amour, considerant qu'il n'y avoit en toute sa personne chose quelconque à redire : & luy d'autre costé la voyant couverte de ceste peau de cerf, avec le beau chapelet de pin sur la teste, luy tendant son pot à lait, cuidoit veoir l'une des Nymphes propres, qui estoient dans la caverne, si accouroit incontinent, & luy ostant le chapelet qu'elle avoit sur sa teste, après l'avoir baisé, le mettoit dessus la sienne : & elle pendant qu'il se baignoit tout nud, prenoit sa robe & se la vestissoit, en la baisant aussi premierement. Tantost ilz s'entre-jettoient des pommes l'un à l'autre, tantost ilz s'entre-peignoient & mypartissoient leurs cheveux en greve, disant Chloé que les cheveux de Daphnis ressembloyent aux grains de meurte, pource qu'ils estoient noirs : & Daphnis accomparant le visage de Chloé à une belle pomme, parce qu'il estoit blanc

& vermeil : parmy aucunes fois il luy monstroit à jouer de la fluste ; puis quand elle commençoit à souffler dedans, il la lui ostoit des mains, pour toucher de la langue & des levres là où elle avoit touché les siennes, & faisoit semblant de lui vouloir enseigner où elle avoit failly, pour avoir occasion de la baiser à demy, en baisant la fluste où elle avoit touché. Ainsi comme ilz estoient après à en sonner joyeusement sur la chaleur du midy, pendant que leurs troupeaux estoient tapis à l'ombre, Chloé ne se donna garde qu'elle fust endormie ; ce que Daphnis appercevant, posa tout beau sa fluste pour regarder à son aise partout, & son saoul, comme celui qui n'avoit alors honte de personne, & disoit à par luy ces paroles tout bas : O comme ces beaux yeux dorment sœfvement, que son haleine sent bon, les pommiers, ni les aubespines fleuries n'ont point la senteur si douce : mais pourtant je ne l'oserois baiser, car son baiser picque & perce jusques au cœur, & fait devenir les gens folz, comme le miel nouveau, davantage j'ay peur de l'esveiller si je la baise : ô que ces cygales font de bruit, elles ne la laisseront ja dormir, si hault elles crient ; & d'autre costé ces boucquins icy ne cesseront



[Faint, illegible handwritten text]



aujourd'huy de s'entre-heurter avec leurs cornes. O loups plus coïars que renards, où estes-vous à ceste heure que vous ne les venez haper? Ainsi que Daphnis estoit en ces termes, une cygale, poursuivie par une arondelle, se vint jeter en sauvegarde dedans le sein de Chloé, au moyen de quoy l'arondelle ne la peult prendre, ni ne peult aussi retenir la roideur de son vol, qu'elle n'approchast si près du visage de Chloé, qu'avec l'uné de ses æsles elle ne luy touchast la jouë, dont Chloé s'esveilla en sourfault, & pource qu'elle ne sçavoit que c'estoit, s'escria bien hault: mais quand elle eust veu l'arondelle volletant encore à l'entour d'elle, & Daphnis se riant de sa peur, elle s'asseura & frotta ses yeulx, qui avoyent encore envie de dormir. La cygale se print à chanter encore entre les tetins mesmes de la gente pastourelle, comme si avec son chant elle luy eust voulu rendre graces de son salut: à l'occasion de quoy Chloé ne sçachant que c'estoit, s'escria de rechef bien fort, & Daphnis s'en print aussi de rechef à rire, & usant de ceste occasion, lui mist la main bien avant dans le sein, dont il tira la gentille cygale, qui ne se pouvoit encore taire, quoy qu'il la tint dedans la main.

Chloé fut bien aise de la veoir, & l'ayant baisée, la remit chantant de rechef dans son sein. Une autre fois ilz ouyrent du bois prochain chanter un ramier, au chant duquel Chloé ayant prins plaisir, demanda à Daphnis que c'estoit qu'il disoit; & Daphnis raconta ce que l'on en dict communément. Ma mie dict-il, au temps passé y avoit une jeune garse belle & jolie, en fleur d'aage comme toy, elle gardoit les vasches, & chantoit fort plaisamment, ses vasches prenoyent si grand plaisir à l'ouyr chanter, qu'elle les gouvernoit au son de sa voix seulement, sans jamais leur donner coup de houlette, ne picqueure d'esguillon, estant assise à l'ombre de quelque beau pin, la teste couronnée de feuillage de l'arbre, elle chantoit tousjours quelque chanson à la louenge de Pan, dont ses vasches estoyent si aises qu'elles ne s'eslognoyent jamais si loing d'elle, qu'elles ne pussent bien ouyr le son de sa voix. Or y avoit-il auprès de là un jeune garçon, qui gardoit des bœufs, il estoit beau & chantoit bien aussi; un jour pour monstrier qu'il sçavoit autant de chanter comme elle, il se mit à chanter plus fortement qu'elle, comme estant masle, & si melodieusement, qu'il attira à luy huit des plus belles vasches

qu'elle eust en son troupeau, & les fit venir au sien, de quoy la pauvre garce fut si desplaisante pour veoir son troupeau diminué, & en partie pour avoir esté vaincuë au chanter, qu'elle fit prieres aux Dieux de la muer en un oiseau, plustost que de retourner ainsi à la maison. Les Dieux lui accorderent sa demande & en firent un oiseau de montaigne, qui aime à chanter comme elle faisoit quand elle estoit fille, & encore aujourd'huy en chantant se plaint-elle de sa desconvenüe, & va disant qu'elle cherche ses vasches esgarées. Tels estoyent les plaisirs que l'esté leur donnoit; mais quand l'arriere saison de l'automne fut venuë, que le raisin fut meur & prest à vendanger, certains Coursaires de la ville de Tyr ayans une fuste du pays de Carie, à celle fin peult-estre que l'on ne pensast que ce fussent barbares, vindrent aborder en ceste coste, & descendant en terre avec leurs brigandines & espées, pillerent tout ce qu'ilz peurent trouver aux champs, comme force bon vin, force grains, force miel estant encore avec la cire, & mesme emmenerent quelques bœufs & vasches du troupeau de Dorcon. Or en courant ainsi cà & là, ilz rencontrerent de maladventure Daphnis, qui s'alloit esbattant le long du

rivage de la mer, car Chloé, comme simple fille, qui craignoit que les autres pasteurs ne luy feissent peult-estre quelque violence, ne partoit si matin du logis, & ne menoit pas si-toft les brebis de Dryas aux champs. Les Courfaires voyans ce jeune garson grand & beau, & de plus de vailleure que tout ce qu'ilz eussent peu davantage ravir par les champs, ne s'amuserent plus ne à poursuyvre les chevres, ny chercher ou desrober autre chose par la campagne, ains l'entraynerent dedans leur fuste, plorant, & ne sçachant que faire, sinon qu'il appelloit à haute voix Chloé, tant qu'il pouvoit crier. Or ne faisoient ilz gueres que remonter en leur vaisseau, & prendre les rames ès mains pour voguer, quand Chloé entra avec son troupeau de brebis, apportant une nouvelle fluste à Daphnis, & voyant toutes les chevres esperduës & escartées çà & là, oyant davantage sa voix, qu'il l'appelloit tousjours de plus fort en plus fort, elle abandonna ses brebis, jetta la fluste & s'en alla courant vers Dorcon, pour le prier de luy venir aider, mais elle le trouva couché par terre, de son long, tout détaillé de grands coups d'espées, que les brigands Courfaires luy avoient donnez, de forte qu'à peine pouvoit-il plus

respirer, tant il perdoit de son sang. Et néanmoins quand il apperçeut Chloé, la souvenance de son amour le rechauffa & renforça un petit, si luy dit : Chloé ma mie, je m'en vois rendre l'ame bientôt, car les meschans larrons Coursaires m'ont descoupé, comme le boucher feroit un bœuf ; mais si tu veulx, tu sauveras Daphnis, vengeras ma mort, & feras mourir ces meschans larrons meschamment ; j'ai accoustumé mes vasches à suivre le son de ma fluste & de venir au chant d'icelle, encore qu'elles soient bien loin de moy, prens-la maintenant, & t'en va sur le bord de la mer jouër ceste chanson que j'ay long-tems y a monstrée à Daphnis, & que depuis Daphnis t'a enseignée ; au demourant laisse faire la fluste & mes bœufs & vasches, qu'ilz emmenent en leur vaisseau, je te donne la fluste, de laquelle j'ay autrefois gagné le pris contre plusieurs bouviers & bergers ; & pour récompense, je te prie, baise-moy seulement pendant que j'ay encore un peu de vie, & quand je seray trespaslé, pleure ma mort & aye souvenance de moy, à tout le moins quand tu verras un vascher gardant ses bestes aux champs. Dorcon ayant dit ces paroles, rendit aussi-tost son esprit en la baisant, & Chloé prenant en main la fluste,

la mist incontinent à sa bouche, & l'entonna le plus hault qu'elle peult. Les vasches, qui l'entendirent, recongnurent aussi-tost le son de la fluste, & la notte de la chanson, & toutes d'une secouffe se jetterent ensemble dedans la mer : & pource qu'elles le firent tout à coup du mesme costé, & que par leur cheute la mer s'entrouvrit, la fuste en tourna sans dessus dessous, de maniere que tous ceux qui estoient dedans se trouverent plongez en la mer, mais non pas tous avec mesme esperance de salut : car les Courfaires avoyent tous leurs espées ceintes à leurs costez, & leurs brigandines faictes à escaille sur leurs dos, avec les cuiffots qui leur pendoyent jusques à my jambe : au contraire Daphnis estoit tout deschaux, comme celuy qui gardoit les bestes aux champs & presque tout nud au demourant, pource que c'estoit en esté, & qu'il faisoit fort chauld. Parquoy les Courfaires, après avoir duré un peu de tems à nager, furent tirez à fond & finalement noyez par la pesanteur de leurs armes ; & Daphnis à l'opposite, despouilla facilement si peu d'habillemens qu'il avoit autour de luy, & néanmoins encore se lassâ-t'il de nager à la fin, comme celuy qui n'avoit accoustumé de nager que dedans les rivieres ;

toutefois la nécessité lui enseigna ce qu'il avoit à faire en ce cas , car il se jetta entre deux vasches , qui nageoient coste à coste l'une de l'autre , & se prenant avec les deux mains à leurs cornes , fut par elles porté sans peine quelconque , aussi à son aise comme s'il eust esté dedans un chariot : car le bœuf nage beaucoup mieux & plus longuement que ne fait homme , & n'y a bestes au monde qui durent si long-temps à nager comme il fait , si ce ne sont animaux aquatiques , & encore poissons , tellement que jamais un bœuf ne une vasche ne se noyeroient , si les cornes de leurs pieds ne s'amolissoient dans l'eau , de quoy font foy plusieurs destroits en la mer , qui jusques aujourd'huy sont appellez Bosphores ; c'est-à-dire , traject , ou passage de bœuf. Voilà comment Daphnis se sauva & eschappa , contre son espérance , de deux grands dangers , l'un d'estre esclave de Coursaires , l'autre d'estre noyé. Au sortir de la mer , il trouva Chloé sur la rive , plorant & riant tout ensemble , si se jetta entre ses bras , & lui demanda pour quelle cause elle avoit ainsi joué de la fluste. Chloé luy raconta tout du long comme elle s'en estoit couruë vers Dorcon , comment les vasches avoyent par lui été apprinses à

suivre le son de la fluste , comme il luy avoit conseillé d'en jouïer , & comment il estoit trespasé ; seulement oublia-t-elle (de honte) à dire comme elle l'avoit baïsé : parquoy ilz delibererent d'honorer la memoire de celui qui leur avoit fait tant de bien , & s'en allerent avec ses parens & amis inhummer le corps du malheureux Dorcon , sur lequel ils jetterent force terre , & planterent autour de la fosse plusieurs arbres , y pendirent chacun quelque chose de leur mestier , & outre y espendirent du lait , & espraignirent des grappes de raisin , & casserent plusieurs flustes. Ses vasches s'en prindrent à bramer piteusement , & s'encoururent en mugissant çà & là , comme bestes esgarées , ce que les autres pasteurs interpreterent estre le deüil que les pauvres bestes menoyent du trespas de leur maistre. Après que Dorcon fut enterré , Chloé mena Daphnis en la caverne des Nymphes , où elle le nettoya , & quant & quant pour la premiere fois en presence de Daphnis, lava aussi son beau corps d'elle-mesme, blanc & poly comme albastre , & qui n'avoit que faire d'estre lavé pour sembler beau : puis en cueillant ensemble des fleurs que portoit la saison , en firent des chapeaux aux images des nymphes, & attacherent con-

tre la roche la fluste de Dorcon pour offrande; puis cela fait retournerent vers leurs chevres & brebis, lesquelles ils trouverent toutes tapies contre la terre, sans paistre ni besler pour l'ennuy & le regret qu'elles avoyent, ainsi qu'il est à présumer, de ne veoir plus ny Daphnis ny Chloé. Mais aussi-tost qu'elles les apperceurent, & qu'eux se prindrent à les sifler comme de coustume, & à joüer du flagolet, elles se leverent incontinent, & se prindrent à pasturer comme devant, & les chevres à sauteler en beslant, comme si elles se fussent esjoüies d'avoir recouvré leur chevrier: mais quoy qu'il y eust, Daphnis ne se pouvoit esjoüir à bon escient depuis qu'il eut veu Chloé toute nuë, & sa beauté à descouvert, car il ne l'avoit auparavant jamais veüe, son cœur en languissoit ne plus ne moins que s'il eust esté attainct & envenimé de quelque poison, son pouls estoit aucune fois fort & hasté, comme si on l'eust chassé, & quelquefois foible & débile, comme si à la surprinse des Courfaires il eust perdu toute sa force, & luy sembloit la fontaine où il avoit veu Chloé se laver, plus effroyable & plus redoutable que la mer. Brief il luy estoit advis que son ame estoit encore entre les bringands, tant il estoit en grande peine,

comme un jeune garçon nourry aux champs,
qui n'avoit encore jamais expérimenté que
c'est que du bringandage d'amour.

Fin du premier Livre.



LES
AMOURS PASTORALES
DE
DAPHNIS
ET
CHELOË.

LIVRE SECOND.



ESTANT jà l'Automne en sa vi-
gueur, & la saison des vendan-
ges venue, chacun aux champs
estoit en besogne à faire ses
apprestz : les uns racoustroyent
les pressouiers, les autres racloyent les ton-
neaux, les autres faisoient les hottes &

C

penniers à porter la vendange, les autres esmouloyent leurs serpettes & sacleaux pour vendanger, les autres apprestoient la meule pour fouler & briser les raisins, & les autres préparoyent de l'ozier sec, dont on avoit osté l'escorce, à force de le battre, pour en faire des flambeaux à tirer & entonner le vin la nuit : & à cette cause Daphnis & Chloé entremettant aussi pour quelques jours la sollicitude de mener leurs bestes aux champs, presterent l'un à l'autre ce temps pendant l'œuvre & labeur de leurs mains. Daphnis portoit la vendange dedans une hotte, & la fouloit en la cuve, puis entonnoit le vin dans les tonneaux : & Chloé, de l'autre costé, appareilloit à manger aux vendangeurs, & leur portoit du vin vieil de l'année précédente, puis se mettoit à vendanger aussi elle-mesme les plus basses branches des vignes, auxquelles elle pouvoit advenir : car les vignes du vignoble de Metelin sont toutes basses, au moins non eslevées sur arbres fort haultz, tellement que les branches en pendent jusques contre terre, & s'estendent cà & là comme lierre, si qu'un enfant de mamelle (par maniere de dire) attingroit aux grapes. Et, comme la coustume est en celle feste du Dieu Bacchus, & à la naissance





du vin, on avoit appellé des villages de là entour, plusieurs femmes, pour aider à faire les vendanges : lesquelles femmes jettoyent toutes les yeulx sur Daphnis & en le louant disoyent qu'il estoit aussi beau que Bacchus, & y en eust une plus affectée que les autres qui le baisa. Daphnis en fit du courroucé, mais Chloé en fust à bon escient marrie. D'autre costé les hommes, qui estoient dedans les cuves & pressoiiers, jettoyent à Chloé plusieurs parolles à la traverse, & fautoyent après elle, comme feroient les Satyres autour de Bacchus, disans qu'ilz feroient contens de devenir moutons, moyennant qu'une telle bergere les menast aux champs. Chloé en estoit bien aise, & Daphnis au contraire marry : tellement que l'un & l'autre desiroit que les vendanges passassent bien tost, afin qu'ils peussent retourner aux champs à la maniere accoustumée, & au lieu des chants de ces vendangeurs, ouyr jouer de la fluste, ou plustost leurs troupeaux besler. Dedans peu de jours les vendanges furent achevées, & le vin entonné, si qu'il ne fust plus besoin d'en empeschertant de gens, au moyen de quoy ilz recommencerent à mener leurs bestes aux champs comme devant, & allerent à grande

joye saluer les Nymphes, en leur portant pour les primices des vendanges, des moiffines de raisins pendues encore aux branches, dequoy faire ilz n'avoient par le passé jamais esté paresseux: car & le matin, dès que leurs troupeaux commençoient à brouter, ilz les alloient saluer; & le soir quand ilz les ramenoyent au tect, les alloient de rechef adorer, & jamais n'y alloient les mains vuides, qu'ils n'y portassent tantost quelques fleurs, tantost quelques fructz, une fois de la ramée verte, & une autrefois quelque petit de laiët, dont puis après ilz receurent des Déesses bien amples récompenses. Mais pour lors, ilz folastroient ensemble comme deux jeunes levrans, ilz sautoient, ilz flustoyent, ilz chantoient, ilz luctoyent bras à bras l'un contre l'autre, à l'envie de leurs beliers & boucquins. Et ainsi comme ilz s'esbatoyent survint un vieillard, vestu d'une pelisse de peau de chevre, des sabots en ses pieds, & un bissac tout usé, pendu à son col, lequel se seant auprès d'eux, se print à leur dire: Mes enfans, je suis le vieillard Philetas, qui ay chanté maintes chansons à l'honneur de ces Nymphes, & maintefois joué de la fluste en l'honneur du Dieu Pan, & qui ay gouverné maint

troupeau avec la musique seulement, & maintenant viens ici pour vous declarer ce que j'ay veu, & annoncer ce que j'ay ouy. J'ay un beau verger, que j'ay moi-mesme planté, semé, labouré & acoustré de mes propres mains, depuis le temps que pour ma vieillesse j'ay cessé de garder & mener les bestes aux champs. Il y a dedans ce verger tout ce que l'on y pourroit souhaitter pour la saison : au Printemps, des roses, des violettes, des lys ; en Esté, du pavot, des poires, des pommes ; maintenant qu'il est Automne, des raisins, des figues, des grenades, des grains de meurte, & y viennent par chacun jour à grandes vollées toutes sortes d'oyseaux ; les uns pour y trouver à repaistre, & les autres pour y chanter ; car il est umbragé & couvert de grand nombre d'arbres, & arrosé de trois belles fontaines, & est si espés, que qui en osteroit la haye qui le clost, on diroit, à le veoir, que ce seroit un bois. Aujourd'huy, environ le midy, j'y ay apperceu un jeune garfonnet dessoubz mes meurtes & grenadiers, qui tenoit en ses mains des pommes de grenade, & des grains de meurte ; estoit blanc comme laict, rouge comme feu, poly & nect comme s'il ne venoit que d'estre lavé ; il estoit nud, il estoit

feul , & se jouoit à cueillir de mes fruitz comme si le verger eust esté sien. Si m'en suis couru vers luy , craignant que (comme il estoit fretillant & remuant) il ne rompist quelques branches de mes meurtes & grenadiers ; mais il m'est legerement eschappé des mains , tantost se coulant par entre les rosiers , tantost se cachant soubz les pavotz , comme feroit un petit perdriau. J'ay autrefois eu bien de la peine d'aller après de jeunes chevreaux de lait , & souvent ay travaillé à courir après de jeune veaux , qui venoyent de naistre ; mais cecy est tout autre chose , & n'est pas possible au monde de le prendre : parquoy me trouvant las & recru , comme vieil & ancien que je suis , & m'appuyant sur mon baston , en prenant garde qu'il ne s'en fouist , je luy ay demandé à qui il estoit de nos voisins , & à quelle occasion il venoit ainsi cueillir les fruitz du jardin d'autruy. Il ne m'a rien respondu ; mais s'approchant de moy , s'est pris à rire fort délicatement en me jettant des grains de murte ; ce qui m'a (ne sçay comment) amolly & attendry le cueur : de sorte que je n'ay plus sçeu me courroucer à luy : si l'ay prié de s'en venir hardiment à moy sans rien craindre , jurant par mes meurtes que je le laisserois





aller, quand il voudroit, avec des pommes & des grenades que je luy donnerois, & luy souffrirois prendre des fructs de mes arbres, & cueillir mes fleurs tant comme il voudroit, moyennant qu'il me donnaſt un baiſer ſeulement. Et adoncq ſe prenant à rire avec une chere gaye, & bonne & gentille grace, m'a jetté une voix ſi aimable & ſi douce, que ny l'arondelle, ny le roſſignol, ny le cygne, fuſt-il auſſi vieil comme moy, n'en ſçauroit jetter de pareille, diſant: Quant à moy, Philetas, ce ne me ſeroit point de peine de te baiſer, car j'aime plus à eſtre baiſé que tu ne deſire retourner en ta jeuneſſe: mais garde que ce que tu me demande ne ſoit un don mal ſeant & peu convenable à ton aage, pource que ta vieilleſſe n'empeschera point que tu ne bruſle de deſir de me ſuivre, après que tu m'auras baiſé, & il n'y a aigle, ny faulcon, ny autre oyſeau de proye, tant ayt-il l'aſſe viſte & legere qui me puſt conſuivre. Je ne ſuis point enfant, combien que j'en aye l'apparence, ains ſuis plus ancien que le vieil Saturne, & plus ancien meſme que tout le temps; je te congnois dès lors que eſtant en la fleur de ton aage, tu gardois en ce prochain mareſtz, un ſi beau & gras troupeau de bœufs & de vaſches, & eſtois auprès

de toy quand tu jouois de ta fluste deffoubz ces cousteaux-là, lorsque tu estois amoureux de la belle Amaryllide: mais tu ne me voyois pas, encore que je fusse continuellement auprès de ton amye, laquelle je t'ay à la fin donné, & tu en as eu de beaux enfans, qui maintenant sont bons laboureurs, & bons bouviers: & pour le présent je gouverne aussi Daphnis & Chloé, & après que je les ay le matin mis ensemble, je m'en viens en ton verger, là où je prendz plaisir aux arbres & aux fleurs que tu y as plantez, & me lave en ces fontaines, qui est la cause que toutes les plantes & les fleurs de ton jardin sont si belles à veoir pour ce qu'elles sont nourries & arrosées de l'eau où je me suis lavé. Regarde si tu verras pas une branche de tes arbres rompuës, ton fruit aucune-ment pillé, ou aucune plante de tes herbes & de tes fleurs foulée, ny pas une de tes fontaines troublée, & te repute bien heureux de ce que toy seul entre les hommes en ta vieillesse tu es encore bien voulu de cest enfant. Sitost qu'il a eu achevé ces paroles, il s'en est envollé dessus les meurtes, ne plus ne moins que feroit un petit rossignol, & en sautelant de branche en branche, par entre les feuilles, est à la fin monté jusques à la

cime. J'ay veu ses petites æsles, son petit arc, & ses flesches en escharpe sur ses espauls, puis ay esté tout esbahy, que jen'ay plus veu, ny ses flesches ny luy : or si jen'ay pour néant la teste blanche, & que la longue vieillesse ne m'ayt diminuée le sens & l'entendement, mes enfans, je vous assure que vous estes tous deux dévouez & dédiéz à l'Amour, & qu'Amour a soing de vous. Ilz furent aussi aysez d'ouyr ces propos, comme si on leur eust conté quelque belle & plaisante fable : si lui demanderent que c'estoit que d'Amour, si c'estoit un enfant ou bien un oyseau, & quelle puissance il avoit. Adonc Philetas commença de rechef à leur dire : Amour est un Dieu, mes enfans, jeune, beau, & qui a des æsles, & pour ceste cause prend-il plaisir à hanter entre les jeunes gens ; il cherche les beautez, & fait voller les cœurs des hommes, ayant si grand pouvoir que le grand Jupiter meisme n'en a point tant : il domine sur les élémentz, sur les estoiles, & sur ceulx qui sont Dieux comme lui, vous-mesme n'avez pas tant de maistrise sur vos chevres & sur vos brebis, qu'il en a sur tout le monde : toutes les fleurs sont ouvrage d'Amour, toutes les plantes & tous les arbres sont de sa facture, c'est par luy

que les rivières coulent, & que les vents soufflent : j'ay souvente fois veu des toreaux amoureux mugir d'amour, aussi fort comme s'ilz eussent été poingtz & picquez d'un frolon ; & un boucquin baiser sa chevre & la suivre par-tout : moi-mesme ay autrefois esté jeune, & ay aimé Amaryllide ; mais lors il ne me souvenoit de manger, ny de boire, ni ne prenois aucun repos ; j'estois toujours triste & pensif, le cueur me battoit, & estois comme transi, je cryois comme qui m'eust battu, & ne parlois non plus que si j'eusse esté mort ou muet ; je me jettois dedans les rivières, pour estaindre la chaleur qui me brusloit, & appellois à mon ayde le Dieu Pan, comme celuy, qui autrefois avoit esté amoureux de la belle Pitys ; je remercyois la Nymphé Echo, pource qu'elle nommoit après moy m'amyé Amaryllide, & puis rompois mes flustes par despit de ce qu'elles scavoient bien donner plaisir à mes vaches, & ne pouvoient faire venir à moy mon Amaryllide : car il n'y a médecine quelconque soit, qu'on la mange ou la boive, ny espece aucune de charme, qui puisse guerir le mal d'amour, sinon le baiser, embrasser & coucher ensemble nuë à nud. Philetas, après les avoir ainsi enseignez, se despartit

d'avec eux , emportant pour son loyer quelques fromages & un chevreau , à qui les cornes commençoient jà à poindre , qu'ilz luy donnerent : mais après qu'il se fust parti , les deux jeunes amans demourans tous feulz , & ne ayans jamais auparavant ouy parler d'Amour , se trouverent en plus grande detresse que paravant , pource que l'Amour commençoit à les toucher au vif. Et retournez qu'ilz furent en leurs maisons , se mirent chascun de son costé à rapporter ce qu'ilz sentoient en leurs cueurs , avec ce qu'ilz avoyent ouy raconter au vieillard. Si disoient ainsi par eulx : Les amans sont douloureux , aussi le sommes-nous ; ilz ne font compte de boire ny de manger , aussi peu en faisons-nous ; ilz ne peuvent dormir , nous sommes tout de mesme ; il leur est advis qu'ilz bruslent , & je crois que nous avons du feu dedans le corps ; ilz desirent s'entreveoir , & pour ce faire , nous souhaittons que la nuit ne dure gueres , & que le jour revienne bien tost à l'adventure. Doncques est-ce cela qu'on appelle amour ? & nous entre-aymons l'un l'autre , & si ne le savions pas. Mais si c'est amour que je sens , & qu'elle m'ayme , pourquoy doncques sommes-nous ainsi mal à notre ayse , à quoy faire nous entrecherchons-

nous ? Philetas nous a dict la vérité, ce jeune garçonnet qu'il a veu en son verger, apparut aussi jadis à nos peres, quand il leur commanda en songe qu'ilz nous envoyassent garder les bestes aux champs : mais comment le pourroit-on prendre ? il est petit & s'enfouyra, & si n'est possible d'eschapper de luy, car il a des æsles & nous atindra : faut-il avoir recours à l'ayde des Nymphes ? Pan luy-mesme ne servit de rien à Philetas lorsqu'il estoit amoureux d'Amaryllide ; il vault donc mieux chercher les remedes qu'il nous a enseignez, de baiser, accoler, & coucher ensemble nuë à nud ; vray est qu'il faict froid ; mais nous l'endurerons. Ainsi leur estoit la nuict une seconde escole, en laquelle ilz recordoyent les enseignemens de Philetas. Le lendemain, au poinct du jour, ilz menerent leurs bestes aux champs, s'entrebaiserent l'un l'autre aussi tost qu'ilz se veirent, ce qu'ilz n'avoient point encore faict auparavant, & croisans leurs bras s'entreaccolerent, mais ilz n'oserent essayer le troisiéme poinct de la medecine, qui estoit de se despouiller pour coucher ensemble nuë à nud : car ce eust esté trop hardiment faict, non-seulement pour la jeune bergere, mais aussi pour le jeune chevrier.

Parquoy la nuit ensuyvant ilz ne peurent reposer , & ne firent aultre chose que rememorier ce qu'ilz avoient fait , & regretter ce qu'ilz avoient obmis à faire , disans ainsi en eulx-mesmes : nous nous sommes entrebaizez , & il ne nous a de rien servy ; nous nous sommes l'un l'autre accolés , & il ne nous en est presque de rien amendé : il faut donc dire que le coucher ensemble est le souverain remede du mal d'amour ; il le faut donc essayer aussi ; car pour certain , il y doibt avoir quelque chose davantage qu'au baiser. Or pour avoir eu ces pensées amoureuses en veillant , il leur venoit aussi , comme il est ordinaire , des songes amoureux en dormant , & leur sembloit qu'ilz s'entrebaisoient , qu'ilz s'entreaccoloyent , & qu'ilz faisoient la nuit ce qu'ils n'avoient osé faire le jour , en se couchant ensemble nuë à nud ; de sorte que le lendemain ilz se leverent plus espris d'amour que devant , & chassant avec le siflet leurs troupeaux aux champs , leur tardeoit qu'ilz ne se trouvoient pour s'entrebaiser ; & si loing qu'ils s'entrevirent , se prirent , en riant , à courir l'un contre l'autre , s'entrebaiserent premierement , & puis s'entreaccolerent , mais le troisieme ne pouvoit venir. Daphnis

n'osant point en parler, & ne voulant point Chloé commencer, jusques à ce que l'aventure les conduisit à ce faire, en ceste maniere. Ils s'estoyent assis l'un près de l'autre au pied d'un chefne, & ayant gousté du plaisir de baiser, ne se pouvoient saouler de cette volupté, l'embrassement suyvoit quand & quand pour baiser plus ferré; & pour autant que Daphnis tiroit sa prise un peu trop fort, Chloé, ne sçay comment, se coucha sur un costé & Daphnis suyvant la bouche de Chloé, pour ne perdre l'ayse du baiser, se laissa aussi de mesme tomber sur le costé, & recongnoissans tous deux en ceste contenance, la forme de leur songe, demurerent long-temps ainsi couchés, s'entretenans bras à bras, aussi estroitement comme s'ilz eussent été collez ensemble, sans sçavoir rien du surplus, & pensans que ce fust le dernier poinct de jouissance amoureuse. Si y passerent la plus grande partie du jour, jusques à ce que le soir les contraignit de se séparer; & lors en mauldissant la nuit, ilz remenerent leurs bestes au tect. Et peultestre à la fin eussent-ils faict quelque chose à bon escient, n'eust esté un tel trouble & tumulte qui survint en celle contrée. Il y avoit une compagnie de jeunes riches

hommes, de la ville de Methymne, lesquels voulans passer joyeusement le tems des vendanges, & s'aller esbattre hors du territoire de leur ville, tirerent un bateau en mer, meirent leurs varletz à la rame, & s'enallerent esbattans le long de la coste des Mityleniens, pour ce qu'il y a partout bon abryt pour se retirer, & est bornée de beaux édifices, & y trouve-t-on force ruisseaux, fontaines, vergers pleins d'arbres, que la nature y a produictz en partie, & en partie la main des hommes y a édifiez, & partout seur abbord & délicieux séjour. Ces jeunes gens, en vogant au long de cette coste, & descendant en terre en quelques endroits, ne faisoient mal ne desplaisir quelconque à personne, ains s'esbattoient à divers passe-temps, une fois avec des hameçons, attachez d'un petit filet au bout de quelques cannes & roseaux, ilz peschoyent des poissons, qui hantent au long des rochers de dessus quelque escueil jetté avant dedans la mer; une aultrefois ilz prenoyent avec des chiens & des filetz les lievres qui s'enfuyoient des vignes, pour le bruit des vendangeurs, une aultrefois ilz prenoyent grand plaisir à tendre aux oyseaux, & avec des lacz courans & colletz prenoyent des oyes sauvages, des

halebrans & ostardes , de sorte qu'oultre le plaisir qu'ilz en avoyent , ilz fourniffoient encore leur table ; & si leur falloit quelque chose davantage , ilz le prenoyent au plus prochain village , en payant beaucoup plus que les choses ne valoyent ; il ne leur falloit que le pain , le vin & le logis seulement : car ilz ne trouvoient pas qu'il fust trop seur de coucher la nuict en mer dedans leur batteau , estant la saison de l'Automne , & à ceste cause tiroyent la nuict leur batteau en terre , craignant qu'il ne se levast quelque tourmente pendant qu'ilz dormiroyent. Mais quelque païsan de là entour ayant affaire d'une corde , dont on tourne la meule qui pressure le marc des raisins après qu'ilz ont esté foullez en la cuve , pource que la sienne estoit usée & rompuë , s'en vinst secrettement vers le bord de la mer , & trouvant le batteau sans garde , deslya la corde , avec laquelle on l'attachoit à terre , l'apporta en son logis , & s'en servit à ce qu'il en avoit affaire. Le lendemain au matin ces jeunes gens de Methymne chercherent par-tout leur corde , mais personne ne confessoit l'avoir prise ; parquoy après qu'ilz eurent un peu tencé avec leur hoste , ils tirerent oultre , & ayant fait environ deux lieuës , vindrent
abborder

abborder à l'endroit des champs, où se tenoyent Daphnis & Chloé, pource qu'il leur sembla qu'il y avoit belle plaine à courir leur lievre. Or n'avoient-ils plus de corde pour attacher leur batteau, & à ceste cause prirent du franc ozier verd, le plus long qu'ilz peurent trouver, qu'ilz tordirent & en firent un hard, dont ilz attachèrent leur batteau par la proue & le lièrent à terre, puis se mirent à chasser avec leurs chiens, & tendirent leurs toiles aux endroicts qui leur semblerent plus à propos. Leurs chiens courans çà & là, & abboyant, effroyerent les chevres, lesquelles abandonnerent incontinent les coustaux, & s'enfuirent vers la marine, là où ne trouvant rien à brouter parmy le fable, aucunes d'elles plus hardies que les autres, s'approcherent du batteau, & mangerent le hard d'ozier, dont il estoit attaché. De fortune la mer estoit un peu esmue, parce qu'il s'estoit levé un vent de terre, tellement que la tourmente eust incontinent esloigné le batteau du rivage, & l'eust emporté en pleine mer; de quoy les jeunes hommes Methymniens s'estant aperceuz, les uns s'encoururent vers la mer, les autres rappellerent leurs chiens, & tous ensemble menerent tel bruit, que tous les

D

païsans de là autour les entendans ainsi crier, y coururent de toutes partz. Mais tout cela ne servist de rien, car le vent se refrechissant tousjours de plus en plus, le mena si roide & si loing, qu'il n'y avoit plus ordre de le pouvoir atteindre; parquoy ces jeunes hommes se voyans privez de beaucoup de biens qui estoient dedans leur batteau, chercherent tant le chevrier qui devoit garder les chevres, qu'ilz trouverent Daphnis, & en chaulde colere commencerent à le battre & le vouloir despoüiller: si y en eust un d'entre eulx qui destacha la lesse dont il menoit son chien, & prit les deux mains de Daphnis pour les luy lier derriere le doz. Le pauvre Daphnis qu'on battoit ne pouvoit aultre chose faire que crier, & prioit les voisins de lui ayder. Mais sur tous autres, il appelloit en son ayde Lamon & Dryas, qui estoient deux verdz vieillards, & qui avoyent les mains rudes & endurcies du labeur des champs, lesquels survenus, feirent cesser la violence & le tort que l'on faisoit à Daphnis, remonstrans à ces jeunes hommes de Methymne, que s'il leur avoit fait aucun tort, ilz le devoient contraindre à le réparer par justice. Ceux de Methymne le voulurent, & esleurent pour leur arbitre le

bouvier Philetas, à cause que c'estoit le plus ancien de tous ceux qui s'estoient trouvez à cette émeute ; & qu'entre tous ceux de son village il avoit le bruit d'estre homme de plus grande légalité. Cela accordé, les Methymniens, comme ceux qui avoyent à plaider devant un juge bouvier, commencerent en termes courtz & clers leur accusation, de telle sorte : Nous estions descenduz en ces champs pour y cuider chasser, & avions attaché notre batteau au rivage de la mer avec un hard d'ozier verd, puis nous estions mis en queste avec nos chiens, & cependant les chevres de cestuy-cy sont descendues vers la marine, lesquelles ont mangé l'ozier dont notre batteau étoit attaché, & conséquemment l'ont destaché, comme vous-mesme l'avez peu voir emporter par les vagues en haulte mer. Il y a dedans grande quantité de biens, qui sont perdus pour nous, & entre aultres choses force beaux colliers pour nos chiens, & de l'argent plus qu'il n'en faudroit pour achepter tout le vaillant de ceux-ci ; en récompense de laquelle perte nous voulons emmener comme notre esclave, ce méchant chevrier icy, lequel entend si mal le mestier dont il se mesle, que de mener ses chevres au rivage

de la mer, comme s'il estoit marinier. Voilà de quoy les Methymniens accuserent Daphnis, qui se trouvoit tout moulu de coupz de poing qu'il avoit receuz ; mais néanmoins voyant Chloé présente, il ne s'estonna de rien, & leur respondit franchement en cette maniere : Je garde bien mes chevres, & n'y a personne en tout le village qui se soit jamais plainct que pas une d'elles ayt rien brouté en son jardin, ni rompu ou gasté un seul cep en sa vigne ; mais ceux-ci eux-mesmes sont mauvais chasseurs, & ont des chiens mal appris, qui ne font que courir cà & là, & abbayer si terriblement qu'ilz ont effarouché mes chevres, & les ont chassées de la montaigne & de la plaine, vers le rivage de la mer, comme si ce eussent esté loupz ; & puis ilz me vont mettant sus, qu'elles ont mangé de l'ozier, c'est pour ce qu'elles ne trouvoient emmy le sable autre verdure quelconque, ne ronce, ne thym ; si leur batteau est pery en la mer par la force des vents, il s'en fault prendre à la tourmente, ce n'ont pas été mes chevres qui l'ont faict : mais s'il y avoit dedans tout plein de biens, & mesme de l'argent comptant, qui seroit si fol de croire qu'un batteau, où il y auroit tant de richesses, n'eust aultre chose

pour l'attacher qu'un hard d'ozier verd ? Daphnis, en disant ces parolles, se print à plorer, & feit pitié à tous les assistans, tellement que le juge Philetas fist serment aux Nymphes & à Pan, que Daphnis, à son advis, n'avoit point de tort, ne ses chevres aussi, & que la faulte (si faulte y avoit) estoit aux ventz & à la mer, desquelz il n'estoit pas juge pour la leur faire reparer. Ce neantmoins le bon Philetas ne sceut si bien dire que les Methymniens s'en contentassent : ainsi de rechef en grande fureur prinrent Daphnis, & le voulurent lier, pour l'emmener prisonnier, n'eust esté que les payfans de ce mutinez se ruerent sur eux & leur osterent d'entre les mains. Daphnis, de son costé, se deffendoit aussi, & combattoit lui-mesme, si qu'à grands coupz de pierre & de bastons, chasserent les Methymniens, & ne cesserent de les poursuivre jusques à ce qu'ils les eussent chassés battant hors de leur territoire. Mais cependant qu'ilz les chassoyent, Chloë tout à loisir mena Daphnis en la caverne des Nymphes, & luy essuya le visage tout souillé du sang qui luy estoit coulé du nez, & tirant de sa pennetiere un morceau de fromage & de gasteau, luy en donna à manger, & qui plus encore le contenta, luy donna de sa

tendre bouche un baiser plus doux que miel. Ainsi eschappa Daphnis de ce danger ; mais la chose n'en demoura pas là , car ces jeunes hommes de Methymne ne furent pas plustost de retour en leurs maisons par terre , au lieu qu'ilz estoient partiz par mer sur un bateau , blesez & mal menez , au lieu qu'ilz estoient issus gays & bien deliberez , qu'ils firent assembler le Conseil de la ville , auquel ils requirent humblement à leurs citoyens qu'il leurplût venger l'excès & outrage qu'on leur avoit fait. Pour à quoy plus les inciter ilz ne dirent pas un mot de vérité ; craignans que s'ilz eussent recité le faict au vray comme il estoit allé , ilz n'eussent encore esté mocquez de s'estre laissé chasser à coupz de bastons par des Payfans : mais en desguisant le faict , affermerent que les Mityleniens leur avoyent osté leur bateau & pillé leurs biens , tout ainsi que s'ilz eussent esté en guerre ouverte. Ceux de Methymne adjouterent facilement foi à leur dire , pource qu'ilz les voyoient ainsi blesez & mal menez ; & quant & quant estimant que c'estoit chose juste & raisonnable de venger un outrage tel faict aux enfans des plus nobles maisons de leur ville , decernerent sur le champ la guerre contre les Mityleniens , sans

la leur envoyer dénoncer, & commanderent à leur Capitaine, qu'il tirast promptement de leur arsenal en mer dix galeres, pour aller faire le pys qu'ilz pourroyent en toute leur coste, pour autant qu'ilz pensoyent que ce ne seroit pas seurement, ny sagement faict de mettre, lorsque l'hyver approchoit, plus grosse flotte en mer. Le Capitaine, dès le lendemain matin eut dressé son équipage, & usant de ses soldatz mesme au lieu de forfaires pour ramer, alla fourrager toutes les terres des Mityleniens, qui estoient prochaines du rivage de la mer, où il pilla grand nombre de bestail, grande quantité de bledz & de vins, pour autant qu'il n'y avoit gueres que vendanges estoient achevées, & grande multitude de prisonniers tous vigneronz & laboureurs; puis alla aussi courir les terres où Daphnis & Chloé gardoient leurs bestes, & y descendit soudainement à l'imporveu, ravit & roba tout ce qu'il y trouva. Daphnis, pour lors n'estoit pas avec son troupeau, ains estoit allé à bois prochains cueillir de la plus tendre & verte ramée, pour donner l'hyver à brouter à ses petitz chevreaux, & voyant de loing la descente & incursion des ennemys, se cacha dedans le tronc d'un chefre sec & creux; mais Chloé

qui estoit auprès des deux troupeaux , si-
tost qu'elle apperceust les couriers, se cui-
da sauver de vitesse, & s'enfuit dedans la
caverne des Nymphes. Elle fut poursuyvie
jusqu'au lieu mesme, là où elle fîct prieres
aux soldats en l'honneur des Nymphes, de
ne vouloir point faire de desplaisir ny à elle,
ny à ses bestes. Toutesfois sa priere n'eust
point de lieu, car les soldatz de Methymne,
après avoir faict plusieurs villenies par deri-
sion aux images des Nymphes, l'emmen-
rent elle & ses bestes, en la chassant devant
eulx à tout de l'ozier, comme on feroit une
chevre ou une brebis : & voyans qu'ilz
avoient jà leurs vaisseaux tout pleins de tou-
te sorte de butin, ne voulurent plus tirer
oultre, ains reprinrent la route de leurs mai-
sons, craignans l'incertitude de l'hyver, &
leurs ennemys. Ainsi se retirerent les Me-
thymniens à force de ramer, pource que
le temps fut si calme, qu'il ne tiroit ne vent,
ny haleine quelconque. Après que tout le
bruit de cette course fut appaisé, Daphnis
sortit de son creux, & s'en vint en la plaine
où leurs bestes avoyent accoustumé de pas-
turer : & n'y voyant ny ses chevres, ny les
brebis de Chloé, ny Chloé elle-mesme,
ains seulement les champs tous seulz, & la

fluste de laquelle Chloé se souloit esbattre jettée par terre, il se print à crier tant qu'il peut ; & en soupirant amerement, s'en courut premierement sous le fousteau, à l'ombre duquel ils avoyent accoustumé de se seoir, & puis vers le rivage de la mer, pour veoir s'il la trouveroit, & finalement vers la cavernes des Nymphes, là où il l'avoit veüe fuyr, & là se jettant par terre devant leurs images, se complaignit à elles, disant qu'elles luy avoyent bien failly au besoing. Chloé, disoit-il, a esté ravie d'entre vos mains, & vous avez bien eu le cueur de le voir & l'endurer : celle qui vous faisoit tant de beaux chapelets de fleurs, celle qui vous offroit toujours du premier laiçt, celle qui vous a donné ce flageolet mesme que je vois icy pendu ; jamais loup ne me ravit une seule chevre, & les ennemys m'ont maintenant ravy le troupeau entier tout à coup, & ma compaignie bergere aussi. Or quant à mes chevres, ils les tuëront & escorchront incontinent, & Chloé desormais demourera en la ville loing de moi. Comment oseray-je à ceste heure m'en aller devers mon pere & ma mere, sans mes chevres & sans Chloé ? Il faudra doresnavant que je sois un faineant, car il n'y a plus chez nous de

bestes que je peusse garder : je ne bougeray d'icy, attendant la mort ou une autre guerre. Hélas Chloé, es-tu en mesme peine que moy ! Te souvient-il point de ces champs, des Nymphes & de moy ? ou si tu te reconfortes avec nos brebis & nos chevres, qui sont prisonnières avec toi ? En disant ces paroles le pauvre Daphnis fut si saisi de tristesse, qu'après avoir bien ploré il s'endormit fort serré, & en dormant luy apparurent les trois Nymphes en guise de trois belles grandes femmes à demi-nuës, les pieds sans chausseure, les cheveux espars, & semblables en tout & par tout aux images qui estoient en la caverne. Si luy fut bien advis de premiere arrivée qu'elles avoyent pitié de luy ; puis la plus aagée se print à luy dire en le reconfortant : Daphnis, ne te plains point de nous, car nous avons plus de soin de Chloé que tu n'as toy-mesme : nous avons eu pitié d'elle dez qu'elle venoit de naistre, & ayant esté jettée & exposée en ceste caverne, avons pourveu à ce qu'elle fust enlevée & nourrie. Ne pense pas qu'elle soit fille de Dryas, ny née en ce village, ou que ce soit l'estat appartenant au lieu dont elle est venuë, que de garder les brebis ; à ceste heure mesme nous avons pourveu à son affaire, de sorte qu'elle

ne sera point menée prisonniere en la ville de Methymne, ny ne fera partie de leur butin; car nous avons prié à Pan, qui est là debout soubz ce pin, lequel vous n'avez jamais honoré à tout le moins de quelques fleurettes, qu'il nous vueille ayder à la recouvrer; pource qu'il frequente plus souvent entre gens de guerre que nous, & luy-mesme a conduict plusieurs guerres, en délaissant ces lieux champestres. Il est desjà party pour s'en aller, dangereux ennemy pour ceux de Methymne: pourtant ne te fasche point, mais te leve & t'en va voir Lamon & Myrta-le, lesquelz font jettez par terre comme toy, cuydans que tu ayes esté prins & emmené prisonnier avec elle: ne te soucie point, ta Chloé reviendra demain avec toutes vos brebis & vos chevres, & si les garderez encore & jouerez de la fluste ensemble; au demourant Amour aura soing de vous. Daphnis ayant ouy & veu telles choses, s'éveilla soudain en sursaut, & plorant autant de joye que de tristesse, adora les images des Nymphes, & leur promit, si Chloé retournoit à sauveté, de leur sacrifier la plus grasse de ses chevres; & courant incontinent vers l'image du Dieu Pan, ayant les piedz d'un bouc, & deux cornes en la teste, estant

dressé deffoubz un pin, & tenant de l'une de ses mains une fluste, & de l'autre un boucquin fautelant, l'adora aussi, & le pria qu'il luy pleust faire retourner Chloé, luy promettant semblablement de luy sacrifier un bouc : & à la fin, sur le soir, environ le soleil couchant, à peine cessa-t'il de plorer & de prier les Dieux, & les Déeses pour le retour de sa Chloé. Puis ayant recueilly la ramée qu'il avoit coupée, s'en retourna au village, là où il osta de grand esmoy le pauvre Lamon, & le remplit de lieffe; puis mengea un petit, & s'en alla coucher, mais ce ne fut pas sans tendrement plorer, & sans affectueusement prier les Nymphes, qu'elles luy apparussent encore la nuict en dormant, & que le jour vint bientoft, auquel elles luy avoyent promis que Chloé retourneroit. Jamais nuict ne luy sembla si longue que fait celle-là; mais voicy comment la chose estoit allée. Cependant le Capitaine de Metymne ayant faict jà long chemin en s'en retournant, voulut un petit refreschir ses gens, qui estoient travaillez d'avoir couru en terre, & vogué en mer, & trouvant un escueil, qui se jettoit fort avant en la mer, en forme de croissant, au-dedans des pointes duquel la mer estoit platte, & où il y avoit

abryt pour les vaisseaux aussi seur que dedans un bon port, il y posa les ancrs sans autrement aborder à terre, afin que les payfans, à toute adventure, ne luy peussent faire aucun desplaisir; & au demourant, permit à ses gens de se traiter & faire bonne chere, en aussi grande assurance, comme s'ilz eussent esté en pleine paix. Eux qui avoyent foison de tous vivres qu'ilz avoyent pillez, se meirent à boire & à jöier, ne plus ne moins que quand l'on fait des feux de joye & la feste d'une victoire; mais sitost que le jour fut failly & que la nuit eut mis fin à leur bonne chere, il leur fust soubdainement advis que toute la terre devint en feu & entendirent de loing tel que seroit le flot d'une grosse armée de mer, qui fust venuë contre eulx: l'un cryoit à l'arme, l'autre appelloit ses compagnons, l'un pensoit estre jà blessé, l'autre cuydoit veoir un homme mort gisant devant luy; brief il y avoit tout tel tumulte que si c'eust esté un combat de nuict, & si n'y avoit point d'ennemys. Si la nuict avoit esté espouvanable, le jour d'après leur fust encore bien plus effroyable, car les boucs & les chevres de Daphnis avoyent les cornes entortillez de feuillages de lierre avec leurs grappes, & les brebis, moutons & beliers de Chloé

hurloyent comme loups. On luy trouva à elle - mesme un chapeau de feuilles de pin sur la teste. Et en la mer semblablement se faisoient des choses si estranges , qu'à peine les pourroit-on croire ; car quand ilz cuydoient lever les ancrs , elles tenoyent si ferme au fond, qu'ilz ne les pouvoient arracher, quelque effort qu'ilz en fissent ; quand ilz cuydoient abbatre leurs rames pour voguer , elles se rompoient ; les Dauphins saultans tout autour de leurs vaisseaux, & les battans de leurs queuës , en descousoient les jointures , & entendoit-on le son d'une trompe du dessus d'une roche haulte & droicte , estant à la cime de l'escueil , au pied duquel ils estoient à l'abryt ; mais ce son n'estoit point plaisant à oüyr , comme seroit le son d'une trompette ordinaire , ains effroyoit ceux qui l'entendoyent, ne plus ne moins que le son d'une trompette de guerre la nuict : de quoy les Methymniens estoient en merveilleux effroy , & couroyent aux armes , disans quec'estoyent leurs ennemys, qui leur venoyent courir sus , sans ce qu'ilz les aperceussent , tellement qu'ilz desiroient que la nuict revinst , comme s'ilz eussent deu avoir paix & repos quand elle seroit venue. Or estoit-il ayse à congnoistre , à gens qui

n'eussent point esté troublez de sens , que toutes ces illusions qu'ils pensoient veoir & ouyr , venoient du Dieu Pan , qui estoit indigné contre eulx pour quelque malefice ; mais ilz n'en scavoient deviner l'occasion , pource qu'ils n'avoient rien pillé qu'ilz pensassent estre dédié ne consacré à Pan , jusqu'à ce qu'environ midy le Capitaine , non sans expresse ordonnance divine , s'endormit , & luy apparut Pan luy-mesme en dormant , qui luy usa de telles paroles : O mechans sacrileges ! comme avez-vous esté si forcenez que d'ozer emplir d'effroy & d'exploits de guerre les champs que j'aime uniquement ? ravir les troupeaux de bœufs , de brebis & de chevres qui sont en ma protection , & arracher par force d'un lieu saint une jeune fille , de laquelle Amour veult faire une histoire singuliere ; & n'avez point eu de crainte ny de reverence aux Nymphes qui le vous ont veu faire , ny à moy aussi , qui suis le Dieu Pan ? Je vous denonce que vous ne verrez jamais la ville de Methymne , si vous entreprenez d'y retourner avec un tel pillage , & n'eschapperez jamais le son de la trompe qui vous a n'agueres effroyez ; car je vous ferai tous abismer au fond de la mer & manger aux poissons ,

si tu ne rends & bientost Chloé aux Nymphes, à qui tu l'as ostée par force, & quant & elle les troupeaux de ses brebis & de ses chevres; pourtant leve-toi sans delay, & remets incontinent en terre la bergere Chloé avec ce que je t'ay dit, & je vous reconduiray tous deux à sauveté, elle par terre, & toy par mer. Le Capitaine, qui s'appelloit Bryaxis, ces parolles ouyes, s'esveilla, tout effroyé, en sursault, & feit incontinent appeller les Capitaines de chacune gallere, auxquelz il commanda que l'on cherchast promptement Chloé entre les prisonniers, ce qui fust aussi-tost fait, & l'on la lui amena couronnée de feuillage de pin, & à cela remarqua le Capitaine, que c'estoit elle pour laquelle il avoit eu ceste apparition en dormant. Si la feit remettre en terre dedans la gallere capitaineffe, dont elle ne fust pas plustost sortie, que l'on entendit derechef le son de la trompe dedans le rocher, mais non plus effroyable en maniere de l'alarme, ains tel que les bergers ont accoustumé de sonner quand ilz menent leurs bestes aux champs. Les brebis mesmes couroyent au sortir par dessus la planche, sans que les piedz leur glissassent, & les chevres encore bien plus hardiment, comme celles qui ont
accou-

accoustumé de gravir jusqu'à la cyme des plus haults & plus droits rochers, & environnoyent Chloé tout à l'entour en faultant & beslant, comme si elles luy eussent voulu d'pner à congnoistre qu'elles se resjouissoyent de sa délivrance : mais les troupeaux des autres bergers & chevriers demourerent au lieu où on les avoit mis, & ne bougerent de dessoubz le tillac des galleres, comme si le son de la trompe ne les eust point appellez, dequoy tout le monde s'esmerveilla grandement, & en loua la puissance & bonté de Pan. Encore veist-on de plus estranges merveilles en l'un & en l'autre element, car les galleres des Methymniens desmarerent d'elles-mesmes avant qu'on eust levé les ancres, & y avoit un daulphin qui les conduisoit, faultant hors de l'eau devant la capitaine; & sur la terre un fort doux & plaisant son de trompe conduisoit les brebis & les chevres, sans que l'on veit personne qui ne sonnast; de maniere que les brebis & les chevres marchoyent & pasturoyent tout ensemble, avec très-grand plaisir d'ouyr si douce melodie. Environ le temps que les pasteurs remenant leurs bestes aux champs après midy, Daphnis appercevant (de tout loing de dessus une haute butte où il estoit monté)

Chloé avec ses deux troupeaux , descendit le plus viste qu'il peut dans la plaine , criant , à haulte voix : O Nymphes ! ô gentil Pan ! & courant embrasser Chloé , fut espris de si grand joye , qu'il en tomba par terre tout pafmé : mais Chloé , en le baisant & embrassant , le réchauffa si bien , qu'elle le fit revenir , & après qu'il eust repris ses espritz , s'en alla avec elle soubz le fousteau , où ilz avoyent accoustumé de se trouver : là où s'estant tous deux assis à l'ombre , il ne faillit pas à demander comme elle avoit peu eschapper des mains de tant d'ennemis. Elle luy conta tout de point en point , comment il estoit creu du lierre autour des cornes de ses chevres , comment ses brebis avoyent hurlé , comment il s'estoit trouvé sur sa teste un chapeau de feuilles de pin , le feu qu'on avoit veu sur la terre , le bruit que l'on avoit ouy en la mer , les deux sortes de sons de trompe , l'un de paix , & l'autre de guerre , la nuict espouventable , & comment une certaine mélodie musicale l'avoit conduite par tout le chemin , sans qu'elle en veit rien. A donc Daphnis congnoissant manifestement que c'estoit le secours de Pan , selon ce que les Nymphes luy avoyent dict & promis à luy-mesme en dormant , conta aussi de sa part

à Chloé tout ce qu'il avoit ouy & veu en son absence, & comme estant bien près de rendre l'ame, la vie lui avoit esté sauvee par les Nymphes. Après lui avoir tout conté, il envoya querir par Chloé Dryas & Lamon, & quand & quand tout ce qui fait besoing pour un sacrifice, & lui-mesme cependant print la plus grasse chevre qui fust en tout son troupeau, de laquelle il entortilla les cornes avec du lierre, en la sorte & maniere que les ennemys les avoyent trouvez le matin, & après luy avoir versé un peu de lait entre les deux cornes, la sacrifia aux Nymphes, la pendit & escorcha, & leur en sacrifia la peau. Puis quand Chloé & la compagnie fut venue, il fit rostir une partie de la chair & bouillir l'autre; mais devant toutes choses il mist à part les primices pour les Nymphes, & leur espendit une pleine tasse de vin doux, & ayant accoustré de petits sièges pour se seoir, avec force feüillage & verde ramée, se mist au surplus à faire bonne chere avec toute la compagnie; en ayant neantmoins toujours les yeux sur les troupeaux, de peur que le loup y survenant d'emblée, n'y fist autant de dommage que pourroyent faire les ennemys. Puis quand ilz eurent tous bien repu, ilz se mirent à chanter des

chançons à la loüenge des Nymphes, que les vieilz pasteurs avoient anciennement composées, puis la nuit survenue ilz se couchèrent en la place mesme à découvert emmy les champs, & le lendemain au matin eurent aussi souvenance de Pan. Si menerent le bouc qui guidoit tout le troupeau couronné de feüillages de pin vers l'arbre, soubz lequel estoit l'image de Pan, & luy respendant du vin sur la teste, en loüant & remerciant la bonté de Pan, le luy sacrifierent, le pendirent & l'écorcherent, puis firent bouillir une partie de la chair & rostir l'autre, qu'ilz estendirent emmy le beau pré sur verde feüillade, & attachèrent la peau avec les cornes à la tige du pin tout contre l'image de Pan: c'estoit une grande pastorale propre à un Dieu pastoral, auquel ilz mirent aussi à part les primices du sacrifice, & respendirent, en l'honneur de luy, le plus grand gobelet qu'ilz eussent plein de vin. Chloé chanta, & Daphnis joüa de son flageolet, puis se mirent à repaistre & firent bonne chere. Ainsi comme ilz estoient à table, survint de cas d'aventure le bon homme Philetas, qui apportoit quelques petitz cha-peletz de fleurs à l'image de Pan, & des moissines de raisins penduës encore aux

branches de la vigne , avec toutes leurs feuilles ; quand & luy estoit son plus jeune filz Tityre. Si-tost qu'ilz l'apperçurent ilz se leverent tous , & luy aiderent à faire ses offrandes à l'image de Pan : puis couronnerent leurs testes de feuillage de pin , & se remettant à table firent seoir auprès d'eulx le bon Philetas. Or quand ces vieillards eurent un peu beu , adonc commencerent-ils à conter de leurs jeunes ans , comment ilz gardoyent leurs bestes , quand ilz estoient jeunes ; comment ilz estoient eschappez de plusieurs dangers , & plusieurs surprises d'escumeurs de mer & de larrons : l'un se vançoit qu'il avoit autrefois tué un loup ; l'autre , qu'après Pan , il n'y avoit homme qui sceust si bien joüer de la fluste que luy : c'estoit le bouvier Philetas , qui se donnoit cette loüenge , & Daphnis & Chloé le prièrent bien instamment qu'il leur voulust monstrier un petit de sa science & qu'il daignast joüer un petit de sa fluste à ce sacrifice faict en l'honneur du Dieu Pan , lequel prenoit plaisir à en ouyr bien joüer. Philetas leur accorda , combien que pour sa vieillesse il se plaignist de n'avoir plus guere d'haleine , & prit en main la fluste de Daphnis : mais elle se trouva trop

petite , pour y monſtrer beaucoup de ſcavoir & d'artifice , comme celle de quoy jouoit un jeune garſon ſeulement ; parquoy il envoya ſon fils Tytire en ſa loge , qui eſtoit diſtante de là environ d'une demie lieuë , pour apporter la ſienne. Tytire jetta ſa jaquette à terre , & ſ'en courut tout nud en chemiſe viſte comme un jeune fan de biche , & cependant le vieillard Lamon ſe miſt à leur faire le conte de la belle Syringe , qu'il diſoit avoir ouy conter & chanter à un chevrier Sicilien. Ceſte Syringe n'eſtoit point (dit-il) anciennement un instrument à jouer de muſique , ains eſtoit une belle jeune fille , qui aimoit fort à chanter : elle gardoit les chevres , & ſe jouoit avec les Nymphes ; le Dieu Pan la voyoit , comme il nous faiët maintenant , garder ſes beſtes , jouer & chanter , ſi ſ'approcha d'elle & la pria de ce qu'il voulut , lui promettant faire que toutes ſes chevres porteroient deux chevreaux à chacune portée. Elle ſe mocqua de ſon amour , diſant qu'elle n'auroit jamais amy , non ſeulement tel comme lui , qui ſembloit proprement un bouc , mais ny autre quel qu'il fuſt. Pan la voulut prendre à force , elle ſ'enfuyt , & il la pourſuiviſt : à la fin ſe

sentant lassé de courir, elle se jetta parmy les cannes & les roseaux, & là ne sceust-on qu'elle devint dedans le marais. Pan coupa les cannes en courroux, & n'y trouvant point la pucelle, congneut son inconvenient, car elle avoit esté tournée en une canne. Si trouva lors cette sorte d'instrument, en joignant ensemble avec de la cire des roseaux de grandeur non-égale, pourautant que leur amour n'avoit point esté réciproque ny égale; de sorte qu'elle, qui paravant avoit esté belle jeune fille, depuis a esté un plaisant instrument de musique. Lamon ne faisoit gueres que d'achever son conte, & Philetas de le louer, disant qu'il avoit fait un conte plus plaisant à ouyr reciter, que n'eut esté une chanson à ouyr jouer, quand Tytire arriva apportant la fluste de son pere, qui estoit composée des plus grosses cannes que l'on trouve, accoustrée de laton, de sorte que l'on eust dict que c'estoit celle-là mesme que Pan avoit faicte la premiere. Philetas adonc se leva en pied sur son siege, & essaya premierement les chalumeaux, pour veoir s'il y auroit point quelque chose qui empeschast le vent, & après avoir esprouvé qu'il n'y avoit rien, souffla dedans à bon escient. L'on eust

dict que c'estoient plusieurs flustes ensemble, tant cela menoit le bruit, puis diminuant petit à petit la force de son vent, ramena son jeu en un son plus doux & plus plaisant, en leur monstrant tout tant qu'il peut avoir d'artifice à joüer de telle maniere de fluste, pour bien mener & faire paistre les bestes aux champs. Puis leur enseigna combien il falloit souffler pour un troupeau de bœufs & de vaches, quel son est mieux seant à un chevrier, quel jeu aiment les brebis & moutons: celuy des brebis étoit doux & moyen, celuy des bœufs fort & pesant, celuy des chèvres clair & agu; & toute ceste diversité de sons se faisoient d'une seule fluste. Toute la compagnie cependant demouroit assise sans mot dire, prenant très-grand plaisir à ouyr si bien joüer Philetas, jusques à ce que Dryas se levant, le pria de joüer quelque gaye chanson en l'honneur de Bacchus, & luy cependant dança une dance de vendanges, faisant des mines comme s'il vendangeast le raisin, le portaist en des penniers, le foulaist dedans la cuve, entonnaist le vin dedans les vaisseaux, & comme s'il eust beu du vin nouveau: tout ce qu'il fist si proprement & de si bonne grace, approchant du

naturel, qu'ilz cuidoient veoir devant leurs yeulx, les vignes, les cuves, les tonneaux, & Dryas beuvant à bon escient. Ce vieillard ayant si bien & si gentiment fait son devoir de dancer, à la fin alla baiser Daphnis & Chloé, lesquels incontinent se leverent & dancèrent le conte de Lamon; Daphnis contrefaisant le Dieu Pan & Chloé la belle Syringe : il lui faisoit sa requeste & elle s'en rioit, elle s'enfuyoit & il la poursuyvoit, courant sur le bout des arceuilz pour mieux contrefaire les piedz de chevres de Pan; elle faisoit semblant d'estre lassé de courir, & au lieu de se jetter entre deux roseaux, elle s'alloit cacher dedans le bois, & Daphnis prenant la grande fluste de Philetas, en tira un son languissant comme celuy d'un amoureux, un son passionné comme d'un qui veut toucher, un son de rapel comme d'un qui va cherchant; tellement que le bon homme Philetas s'esbahissant comme il en sçavoit tant, accourut le baiser; & après l'avoir baisé luy fit present de sa fluste, en priant aux Dieux que Daphnis la laissast semblablement à un pareil successeur que luy. Daphnis donna la sienne petite à Pan, & après avoir baisé Chloé, comme estant

retrouvée & retournée d'une véritable fuite, remena son troupeau au tect, en jouiant de sa fluste, pource que la nuict estoit jà venue: aussi fit Chloé le sien au son des mesmes chalumeaux. Les chevres marchoyent coste à coste des brebis, & Chloé tout joignant Daphnis, de sorte que jusques à la nuict toute noire ilz prindrent l'un de l'autre tout le plaisir qui leur fut possible, & firent leur complot ensemble de remener le lendemain au plus matin leurs bestes aux champs comme ilz firent: car incontinent que le jour commença à poindre, ilz revindrent au paturage, & ayant premierement salué les Nymphes, & puis après Pan, s'allèrent asseoir dessoubz un chesne, la où ilz jouierent de la fluste ensemble, s'entrebaïserent, s'entre-embrasserent, & se coucherent l'un auprès de l'autre; puis se releverent sans y faire rien davantage, sinon manger ensemble, & boire du vin avec du laiçt, toutes lesquelles choses les eschauffoyent de plus en plus & les rendoyent plus hardys: tellement que faisant à l'envie l'un de l'autre à qui plus aimeroit sa partie, ilz vindrent jusqu'à se vouloir asseurer l'un de l'autre par serment. Daphnis allant soubz le pin, jura par le Dieu

Pan qu'il ne vivroit jamais un seul jour sans Chloé, & Chloé entrant en la caverne des Nymphes, fit serment qu'elle vivroit & mourroit avec Daphnis; mais Chloé comme jeune garce qu'elle estoit, fut si simple qu'elle voulut que Daphnis, au sortir de sa caverne, luy jurast un autre serment; si luy dict: Ce Dieu Pan, Daphnis, est un Dieu amoureux, auquel il n'y a point fiance; il a aimé Pityis, il a aimé Syringe, & ne cesse jamais de pourchasser les Nymphes Dryades, de sorte que si tu me faulsois la foy que tu m'as jurée par luy, il ne s'en feroit que rire, voire quand bien tu serois amoureux de plus de femmes qu'il n'y a de chalumeaux en son flageolet, & pourtant jure-moy par ton troupeau & par la chevre qui te nourrit & allaicta, que tu ne laisseras jamais Chloé tant qu'elle n'aimera autre que toy, & là où elle te fera faulte & aux Nymphes qu'elle t'a jurées, fuy-la & la hay, ou la tuë ainsi que si c'estoit un loup. Daphnis fut bien aise de veoir que Chloé avoit peur de le perdre, & se mettant au milieu de son troupeau, en tenant de l'une de ses mains un bouc, & de l'autre une chevre, jura qu'il l'aimeroit tant qu'elle l'aimeroit, & que si

elle en préféreroit un autre à luy, il tuëroit, au lieu d'elle, celuy qu'elle auroit préféré; dont elle fut fort aysé, & s'en assëura plus que devant, estimant les brebis & les chevres estre Dieux plus propres aux bergers & aux chevriers, que nulz autres.

Fin du second Livre.



LES
AMOURS PASTORALES
DE
DAPHNIS
ET
CHELOÉ.

LIVRE TROISIÈME.



MAIS les Mithyleniens ayant entendu comme ceux de Methymne avoyent envoyé dix galeres à leur dommage, & mesmement ayant esté advertis par les païsans, comme ilz avoyent couru leurs terres, & pillé leurs biens, estimerent

que c'estoit chose indigne d'eulx de souffrir un tel outrage sans revanche, & delibere-
rent promptement prendre les armes contre
eulx : si leverent incontinent trois mille
hommes de pied, & cinq cent cheveaulx, &
envoyerent par terre leur Capitaine général,
nommé Hippase, pour leur faire la guerre,
craignans de les mettre sur mer en temps ap-
prochant de l'hyver. Le Capitaine se parta-
geant avec ses gens, ne fouragea point les
terres des Methymniens, ni n'emmena le
bestail des pauvres laboureurs & des paifans ;
pource qu'il estimoit cela estre le faict d'un
larron, & non pas d'un Capitaine ; ains tira
droict vers la ville, esperant la surprendre
les portes ouvertes & sans gardes. Mais quand
il en fut près environ six lieuës, un Herault
de Methymne lui vint au devant, qui luy
apporta nouvelle que les Methymniens ne
vouloyent que paix, pource qu'ayant enten-
du par ceulx que leurs Capitaines avoyent
emmené prisonniers, que les Mithyleniens
ne sçavoyent du tout rien de tout ce qui
avoit esté fait à leurs jeunes gens, & que ce
avoyent fait des paifans, qui les avoyent bat-
tuz pour quelques insolences par eulx faictes,
se repentoient bien fort d'avoir si longue-
ment offensé leurs voisins, & se mettoient

en tout devoir , offrant de rendre & restituer tout ce qui auroit esté prins sur eulx , à celle fin qu'ilz peussent traffiquer & hanter par terre & par mer avec eulx , sans crainte ne danger. Hippase , Capitaine général des Mithyleniens, envoya ce Herault au Conseil de Mithylene, combien qu'il eust toute puissance & auctorité souveraine , & s'en alla camper environ à demie lieuë de Methymne , où il attendit la responce du Conseil , & de là à deux jours vint par devers luy un messager , qui luy apporta mandement exprès du peuple de Mithylene, pour recevoir tout ce que l'on avoit prins & pillé sur eulx , & pour s'en retourner à tout , sans faire au demourant mal , ne deplaisir quelconque au territoire de Methymne ; car ayans le choix de la paix ou de la guerre , ilz trouverent que la paix estoit plus profitable pour eulx , ainsi la guerre des Methymniens , entreprise par estrange commencement , fut en ceste maniere aussi-tost assoupie que commencée. Là-dessus survint l'hyver , qui fut à Daphnis & à Chloé plus âpre & plus dur à passer que le temps de la guerre , car incontinent la neige tombant en grande abondance , couvrit les chemins , & enferma les laboureurs en leurs maisons ; les torrens impétueux

tomboient aval du hault des montagnes , l'eau se geloit , les arbres sembloyent morts , on ne voyoit point la terre , sinon à l'entour des fontaines & des rivieres , tellement que l'on ne pouvoit mener les bestes aux champs , non pas sortir de la maison seulement , & faisoient un grand feu au milieu de leur maison , à l'entour duquel , dès que les coqz avoyent chanté le matin , chacun venoit faire sa besongne ; les uns filoyent des cordes , les autres tressoyent du poil de chevre , les autres fesoient des laz & colletz à prendre des oyseaux : le soin qu'il falloit lors avoir des bœufs , estoit de leur bailler de la paille pour manger en la bouverie , aux chevres & brebis de la feuillée en la bergerie , & aux pourceaux de la fouyne & du gland en la porcherie. Estant donc chacun contrainct de garder la maison pour la rudesse du temps , les autres , tant laboureurs que pasteurs , en estoient bien ayfes , pource qu'ilz avoyent un peu de relasche en leurs travaux , desjeusnoyent matin & dormoyent la grasse matinée , de sorte que l'hyver leur sembloit plus doux que l'esté , ne l'automne , ne le printemps avec. Mais Daphnis & Chloé se souvenans des plaisirs passez , comment ilz se baisoyent , comment ilz s'entr'embrassoyent ,
comment

comment ilz beuvoient & mangeoyent ensemble, passoyent les nuictz sans dormir en grande peine, & attendoyent la saison nouvelle, ne plus ne moins qu'une seconde vie après la mort : toutes les fois qu'ilz manyoient la pennetiere, de laquelle ilz fouloyent tirer leur manger, cela leur perçoit le cueur : ou qu'ilz voyoient le pot auquel ilz fouloyent boire, ou bien la fluste, qui estoit un don d'amourettes, jettée quelque part à terre sans que l'on en teint compte, cela leur renouvelloit leur regret ; si prioient aux Nymphes & à Pan, qu'ilz les délivrasent de ces maux, & qu'à tout le moins ilz leur remonstrassent à la fin à eulx, & leurs bestes le Soleil beau & clair ; & quant & quant en faisant ces prieres aux Dieux, cherchoyent quelque invention, par laquelle ilz se peussent entrevoir. Mais il estoit bien malayfé à Chloé, parce que celle que l'on estimoit sa mere, estoit tousjours après elle ; lui enseignant à tourner le fuseau pour filer la laine, & lui parlant de la marier ; mais Daphnis, comme celui qui avoit plus de loisir, & plus de sens aussi, trouva une telle finesse pour voir Chloé. Au-devant de la maison de Dryas estoyent creuz deux grandz meurtes, & un lierre ; les deux meurtes bien

près l'un de l'autre, & le lierre au milieu, de sorte qu'estendant ses branches sur l'un & sur l'autre des meurtes, y faisoit comme une loge fort couverte, tant les feuilles estoient épaisses les unes sur les autres, & par dedans pendoyent force grappes de lierre, comme si c'eussent esté raisins attachez à des branches de vigne, à l'occasion de quoy y avoit tousjours, mesmement l'hyver, grande multitude d'oyseaux, pource qu'ilz ne trouvoient rien à manger ailleurs; force merles, force grives, force ramiers, force bisetz, & de toute autre sorte d'oyseaux, qui aiment à manger des grains de lierre. Daphnis sortit de la maison soubz couleur d'aller tendre à ces oyseaux, emplissant un petit bissac de petitz gasteaux, faictz avec du miel, & portant aussi de la gluz, & des colletz à prendre des oyseaux, afin que l'on le creust. Or la distance de l'une des maisons à l'autre estoit environ de demie-lieue, & la neige, qui n'estoit point encore fonduë, luy faisoit beaucoup de peine, si n'eust esté qu'amour passe part-tout, & marche par-dessus le feu & par-dessus la neige, fust-elle aussi épaisse & aussi haulte que celle de la Tartarie. Quand il fust arrivé, il secoua la neige qu'il avoit aux piedz, tendit ses colletz,



[Faint, illegible handwritten text]



& englua de longues verges, avec la gluz qu'il avoit apportée, puis s'assit en aguet là auprès, espiant quand Chloé & les oyseaux viendroyent. Or quant aux oyseaux, il en vint en grande compagnie, & en print tant, qu'il avoit assez à faire à les amasser, à les tuër, & à les plumer: mais de la maison il ne fortoit personne, ny homme, ny femme, ny cocq, ni poule, ains se tenoient tous enfermez, clos & couvertz au long du feu, dont le pauvre Daphnis estoit en grand esmoi d'estre venu si mal à point, & à heure si malheureuse. Si osa bien penser de controuver quelque occasion pour entrer dedans la maison, discourant en luy-mesme quelle couleur seroit la plus croyable. S'il disoit, je viens querir du feu; on lui eust peu respondre, & comment n'avez-vous pas de plus proches voisins? je demande du pain, ton bissac est tout plein de vivres: je cherche du vin, il n'y a que trois jours que vous avez faict vendanges: le loup m'a poursuivi, & où en est la trace? j'estois venu chasser aux oyseaux, & bien, que ne t'en vas-tu doncques après que tu en as assez pris? je veulx veoir Chloé, & qui seroit celuy qui confesseroit à un pere ou à une mere, estre venu pour veoir leur fille? Ainsi n'y avoit-il pas

une de toutes ces occasions-là, où il n'y eust tousjours quelque soupçon. Il vault doncque mieux, disoit-il, que je me taise, je reverray Chloé au printemps, puisque les Dieux ne veulent pas, comme je crois, que je la voye en hyver. Daphnis ayant fait ces discours en lui-mesme, & serrant jà les oyseaux qu'il avoit prins, se vouloit mettre en chemin pour s'en retourner : mais comme si expressément Amour eust eu pitié de luy, voici qu'il advint. Dryas & sa famille estoient à table, le pain & la viande toute prestee, chacun entendoit à boire & à manger, & cependant l'un des chiens de la bergerie, voyant que l'on ne se donnoit point de garde de lui, happa un loppin de chair & s'enfuit hors de la maison à tout ; de quoy Dryas courroucé, pour autant mesmement que c'estoit sa part, print un baston & s'en courut après. En le poursuivant, il passa au long du lierre, où Daphnis avoit tendu ses gluaux, & veit comme il chargeoit desjà sa prise sur ses espauls, & s'apprestoit pour s'en retourner. Si-tost qu'il l'apperceut, il oubliâ & chair & chien, & criant à haulte voix, Dieu te garde, mon filz, le vint accoler & baiser, le prist par la main, & le mena en sa maison. Quand Chloé & Daphnis

s'entreveirent, à peine qu'ilz ne tomberent tous deux par terre de grande ayse qu'ilz eurent, mais toutefois ilz se perforcerent de se tenir sur leurs piedz, & s'entre-saluerent & baisèrent, ce qui leur fut comme un estaye & appuy, qui les engarda de tomber. Ainsi Daphnis jouïssant contre son espérance, non-seulement de la veüe de Chloé, mais en ayant aussi reçu un baiser, s'assit auprès du feu, & déchargea sur la table les merles & les ramiers qu'il avoit prins, contant à la compagnie, comme estant ennuyé de tant demourer enfermé en la maison, il s'en estoit venu chasser aux oyseaux, & comment il en avoit prins aucuns avec des colletz, & autres avec des gluaux, ainsi qu'ilz venoyent pour manger des grappes de lierre & des grains de meurtes. Ceux de la maison le louèrent grandement de son bon esprit, & le prierent de manger à bonne chere de ce que le mastin leur avoit laissé, commandant à Chloé qu'elle leur versast à boire, ce qu'elle fit bien volontiers, à tous les autres premièrement, & puis à Daphnis le dernier: car elle faisoit semblant d'estre marrye contre luy, de ce qu'estant approché si près de la maison, il s'en estoit voulu aller sans la veoir, ny parler à elle, & néantmoins avant

que luy presenter, elle but en la tace, puis luy bailla le demourant; & luy (encore qu'il eust grand soif) but lentement à longue haleine pour en avoir tant plus de plaisir. Si fut tantost la table vuyde, toutefois se tenant encore assis, ilz luy demandoient comment se portoyent Myrtale & Lamon, disant qu'ilz estoient bienheureux d'avoir un tel baston de leur vieillesse: desquelles loüenges Daphnis n'estoit pas marry, mesmement pource qu'on les luy donnoit en la présence de sa Chloé: mais encore quand ilz luy dirent qu'ils le retiendroyent pour tout le jour, à cause que Dryas devoit le lendemain faire un sacrifice à Bacchus, peu s'en fallut qu'il ne les adorast au lieu de Bacchus, si tira de son bissac force petitz gasteaux, & des oyseaux qu'il avoit prins, lesquels ilz habillerent pour soupper: ainsi fut derechef le feu allumé, le vin tiré, la table dressée, & sitost qu'il fust nuict close, se mirent à soupper, après lequel ils passerent le temps, partie à faire de plaisans contes, & partie à chanter, jusques à ce que l'envie de dormir leur fust venuë, & alors ilz s'en allerent coucher, Chloé avec sa mere, & Daphnis avec Dryas. Toute la nuict Chloé ne fait autre chose que penser au plaisir qu'elle auroit le

lendemain de voir son Daphnis ; & Daphnis se repute d'une vaine volupté , estimant que ce luy seroit grand plaisir de coucher seulement avec le pere de sa Chloé ; de sorte qu'il le baisa & l'embrassa plusieurs fois , pensant baiser & embrasser Chloé. Le lendemain matin il feit un froid extrême , & tira un vent de bise si aspre , qui brusloit & perçoit tout. Quand ilz furent levez , Dryas sacrifia à Bacchus un mouton d'un an , alluma un grand feu & appresta le disner : par ainsi pendant que Napé estoit embesognée à cuyre le pain , & Dryas à rotir le mouton , Chloé & Daphnis estant de loisir , sortirent tous deux hors de la maison , & s'en allerent dessoubz le lierre , où derechef ilz dresserent des colletz , pendirent des gluaux , & prirent encore un grand nombre d'oyseaux , & s'entrebaisant parmy continuellement , & tenant de telz propos amoureux. Je suis icy venu pour l'amour de toy , Chloé : Je sçay bien , Daphnis. C'est pour l'amour de toy que je tuë ces pauvres merles , comment doncques suis-je en ta grace ? je te prie qu'il te souviene de moy. Il m'en souvient aussi par les Nymphes , que je t'ay juré dans la caverne , où nous nous retrouverons encore si-tost que la neige sera fonduë. Mais elle est

bien haute, disoit Daphnis, & ay grand peur que je ne sois fondu moy-mesme devant elle. Ne te soucie, Daphnis, le Soleil est ja chaud. Pleust à Dieu, Chloé, qu'il fust aussi chaud que le feu que je sens en mon cuer. Tu te mocque de moy, disoit Chloé. Non faictz par les chevres que tu m'as faict jurer. Ainsi que Chloé respondoit en cette sorte à son Daphnis, ne plus ne moins que l'Echo, Napé les appela : ilz s'y en coururent, portant quant & eux leur prinse, laquelle estoit bien plus grande que celle du jour de devant; & après avoir fait l'offrande des primices du sacrifice à Bacchus, se firent à table pour disner, ayans autour de leurs testes des chapeaux de lierre : & après avoir bien repeu & bien chanté les loüenges de Bacchus, renvoyerent Daphnis, luy garnissant très-bien son bissac de pain & de chair, & si luy rebaillerent les grives & ramiers qu'il avoit prins, pour les porter à Myrtale & à Lamon, disant que quant à eux ilz en prendroyent bien tousjours quand ilz voudroyent, tant que l'hyver dureroit, & que les grappes de lierre ne fauldroyent point. Ainsi se partit Daphnis, en les baisant tous, premier que Chloé, afin que son baiser lui restast pur & net. Depuis il y revint

plusieurs fois par autres subtilitez, de sorte que l'hyver ne se passa point du tout pour eux sans quelque plaisir amoureux. Et sur le commencement du printemps, que la neige se fondoit, la terre se descouvroit, & l'herbe deffoubz poignoit; les autres pasteurs menerent leurs bestes aux champs: mais devant tous Daphnis & Chloé, comme ceux qui servoient à un bien plus grand pasteur, & incontinent s'en coururent droit à la caverne des Nymphes, & de là au pin soubz lequel estoit l'image de Pan, & puis deffoubz le chesne où ilz s'assirent, en regardant paistre leurs troupeaux & s'entrebaissant quant & quant, puis allerent chercher des fleurs, pour faire des chapeaux aux images, mais elles ne faisoient encore que commencer à poindre par la douceur du petit beat de Zephirs qui ouvroit la terre, & la chaleur du Soleil qui les eschauffoit: toutefois encore trouverent-ilz de la violette, du mouron, du muguet, & d'autres telles premieres fleurs que produict la saison nouvelle; dont ilz firent des chapeletz, & en allerent couronner les testes aux images, en leur offrant du laict nouveau de leurs brebis & de leurs chevres: puis commencerent aussi à joüer un petit de leurs chalumeaux, comme s'ilz eussent voulu

provoquer les rossignolz à chanter, lesquels leur respondoient de dedans les bois, commençant petit à petit à reprendre leur ramage, qu'un long silence leur avoit fait oublier. Les brebis besloyent, les aigneaux faultoyent, & se courboient soubz le ventre de leurs meres pour teter: les beliers poursuivoient les brebis, qui n'avoient point encore aignelé, & après qu'ilz les avoient arrestées, failloyent chacun la sienne. Autant en faisoient les boucz après les chevres, faultant à l'environ, & quelques-uns combattant pour l'amour d'elles: chacun avoit la sienne, & gardoit qu'autre que luy ne la couvrift. Toutes lesquelles choses eussent peu inciter des vieillards refroidiz à desirer la jouissance d'amour; & par plus forte raison, inciterent-elles ces deux jeunes personnes, qui estoient en la premiere fleur de leur jeunesse, & qui pourchassans de long-temps le dernier but de contentement d'amour, brusloyent en oyant ce qu'ilz oyoyent, & se fondoient de desir en voyant ce qu'ilz voyoyent, cherchant quelque chose qu'ilz ne pouvoient trouver, oultre le baiser & l'embrasser: mesmement Daphnis, lequel estant devenu grand & en bon point, pour n'avoir bougé tout le long de l'hyver de la maison à

ne rien faire , frissoit après le baiser , & estoit gros , comme l'on dit , d'embrasser , faisant toutes choses plus ardemment , plus curieusement & plus hardiment que paravant , pressant Chloë de luy octroyer tout ce qu'il vouloit , & de se coucher nuë à nud avec luy plus longuement qu'ilz n'avoient accoustumé : Car il n'y a , disoit-il , que ce seul poinct qui nous reste des enseignemens de Philetas pour la dernière & seule médecine qui appaise l'amour. Chloë luy demandoit : Et qu'y a-t-il plus à coucher nuë à nud par-dessus le baiser & l'embrasser , qu'à coucher tout vestu ? Cela , respondoit Daphnis , que les beliers font aux brebis & les boucz aux chevres ; vois-tu comment après cela les brebis ne s'enfuyent plus , ny les beliers aussi ne se travaillent plus pour courir après , ains paissent tous deux amiablement ensemble , comme estans tous deux assouviz & contens , & doit estre quelque chose plus douce que ce que nous faisons , & qui surpasse l'amertume d'amour. He dea , disoit Chloë , ne vois-tu pas comment les beliers & les brebis , les boucz & les chevres , en faisant ce que tu dis , se tiennent tout debout , les masles faillans dessus , les femelles soutenans les masles sur le dos ? & tu veux que je me couche

par terre avec toy, & encore toute nuë, là où les femelles sont plus garnies de laine & de poil, & plus veluës que je ne suis couverte quand je suis toute vestuë. Daphnis ne sca-voit que respondre à cela, & luy obéissant se couchoit auprès d'elle tout vestu, où il demouroit long-temps, gissant tout de son long, ne sçachant par quel bout se prendre pour faire ce que tant il desiroit. Il la faisoit relever & l'embrassoit par derriere, en imitant les boucz, mais il s'en trouvoit encore moins satisfait que devant. Si se rassit à terre & se print à plorer sa sottise de ce qu'il sca-voit moins que les belins, comment il falloit accomplir les œuvres d'amour. Or y avoit-il près de là un laboureur, qui ne tenoit point de terres d'autruy, ains labouroit son propre heritage; on l'appelloit Chromis, homme ayant jà passé le meilleur de son aage, & estant fort cassé; sa femme au contraire estoit jeune, belle, & plus délicate que ne sont ordinairement les femmes des payfans; elle avoit nom Lycœnion, laquelle voyant tous les matins passer Daphnis au long de leur maison, menant ses bestes en pasture, & les ramenant tous les soirs au tect, eut envie de s'accointer de luy, & faire enforte, par dons, par appastz & caresses, qu'il devinst

son amoureux : & l'ayant un jour trouvé seul , lui donna une fluste , une gauffre à miel & une pennetiere de peau de cerfs ; mais elle ne luy osa rien demander pour ce coup-là , se doutant bien qu'il estoit amoureux de Chloé , pource qu'il estoit tousjours avec elle , & neanmoins n'en sçavoit aultre chose sinon qu'elle les voyoit rire l'un à l'autre , & faire quelques signes de la teste. Mais pour en estre plus certainement informée , elle fit lors entendre à son mary Chromis , qu'elle s'en alloit veoir une sienne voisine qui estoit en travail d'enfant , toute preste d'accoucher , & suivit à la trace ces deux jeunes gens , pour estre du tout assurée de ce dont elle se doutoit : si se cacha derriere un buisson , afin qu'elle ne fust point apperceuë , & de là vit tout ce qu'ilz firent , & entendit tout ce qu'ilz dirent , & mesme remarqua très-bien qu'elle ouyt plorer Daphnis , pource qu'il ne sçavoit trouver le moyen de jouir de ses amours. Parquoi ayant pitié de ces deux pauvres jeunes amans , & quant & quant considérant que double occasion de bien faire se presentoit à elle , l'une de les instruire de leur bien , & l'autre d'accomplir son desir , elle usa d'une telle finesse. Le lendemain matin faisant semblant de s'en

aller veoir sa voisine, qui travailloit d'enfant, elle s'en alla droict, sans se cacher, vers le chesne soubz lequel Daphnis estoit assis ; & en contrefaisant parfaitement bien la marrie troublée : Helas ! mon amy (dit-elle) Daphnis, je te prie, aide-moy ; je n'avois que vingt pauvres oysons, & voilà une aigle qui m'en vient de ravir le plus beau, mais pource que c'estoit un trop grand fardeau pour elle, elle ne l'a peu porter jusques sur ceste haulte roche là où est son aire, ains est tombée à tout en ce petit bois taillis icy près : & pour ce je te prie, en l'honneur des Nymphes & de Pan, que tu viennes avecques moy pour m'aider à le recourir, car j'ay peur d'y entrer toute seule. Ne veuille souffrir que mon compte soit imparfait, à l'aventure, pourras-tu bien tuër l'aigle mesme, & par ainsi elle ne ravira plus vos petits aigneaux ny vos chevreaux ; & cependant Chloé gardera tous vos deux troupeaux, car tes chevres la connoissent aussi bien comme toy, pource que vous estes toujours par les champs ensemble. Daphnis ne se doubtant point de l'embusche, se leva incontinent, print sa houlette en sa main, & s'en alla après Lycænon, qui le mena le plus avant qu'elle peut dedans le bois, & le plus loin de Chloé

jusques auprès d'une fontaine, où elle fist seoir Daphnis, & luy dist : Amour & les Nymphes cette nuict me sont venuz en dormant conter comment & pour quelle cause tu plorois hier, & si m'ont commandé que te ôtasse de ceste peine, en te monstrant comment il faut faire le jeu d'amours, qui n'est pas seulement baiser & accoler, ny faire comme les beliers & les boucz, c'est bien aultre chose, & bien plus plaifante & plus douce que tout cela ; parquoy si tu veulx estre délivré du déplaisir que tu en as, & esprouver l'ayse que tu y cherches, ne fais seulement que te donner à moy pour apprenty joyeux & gaillard, & en faveur des Nymphes, je t'en montrerai ce qui en est. Daphnis perdit toute contenance tant il fut ayse, comme un pauvre garçon de village jeune & amoureux : si se met à genoux devant Lycœnion, la priant bien tort de lui enseigner ce plaifant mestier le plustost qu'elle pourroit, afin qu'il peust faire ce qu'il desiroit à Chloé ; & comme si c'eust esté quelque grand & mal-ayse secret, lui promist qu'il luy donneroit un chevreau, des fromages molz, de la cresse, & plustost la chevre avec : aussi Lycœnion trouva en ce jeune chevrier une simplicité plus grande

qu'elle n'eust pensé , commença à le passer maistre en ceste maniere. Elle luy commanda de s'asseoir auprès d'elle & de la baiser comme il avoit accoustumé de baiser Chloé , & en la baisant , de l'embrasser le plus estroitement qu'il lui seroit possible , & finalement de se mettre de son long par terre avec elle. Après que Daphnis se fust assis auprès d'elle , qu'il l'eust baisée , & se fust couché par terre , Lycœnion le trouvant en estat , le souleva un peu , & se glissa adroitement dessous luy , puis elle le mit dans le chemin qu'il avoit jusques-là cherché : tout se passa à l'ordinaire , la nature elle-mesme luy ayant appris ce qu'il y avoit de plus à faire. Finy cet apprentissage , Daphnis aussi simple comme devant , s'en voulut courir incontinent devers Chloé pour luy faire tout aussi-tost ce qu'il venoit d'apprendre ; comme s'il eust eu peur d'oublier sa leçon , si plus il differoit ; mais Lycœnion le retint , & luy dit : Il faut que tu sçache encore cecy , Daphnis , c'est que pour autant que j'estois desjà femme , tu ne m'as point fait de mal à ce coup , car un autre homme , il y ajà quelque temps , me monstra le mestier , & en eust mon pucelage pour son loyer : mais quand Chloé luterà cette lute avecques toy , elle
fentira





sentira du mal pour la premiere fois, & criera, & si feignera, comme qui l'auroit tuée; mais n'aye point de peur pour cela, & quand tu auras tant fait envers elle qu'elle se veuille abandonner à toy, amene-la en ce lieu, à celle fin que si elle crie, personne ne l'oye, & si elle plore que personne ne la voye, & si elle seigne, qu'elle se lave en ceste fontaine, & te souviene doresnavant que je t'ay fait homme premier que Chloé. Après lui avoir donné ces enseignemens, Lycœnion s'en alla d'un autre costé du bois, faisant semblant d'aller encore chercher son oyson: & Daphnis pensant à ce qu'elle lui avoit dict, retint & refrena un peu son premier appetit, délibérant n'exiger rien de Chloé outre le baiser & l'embrasser accoustumé; car il ne vouloit point la faire crier, pource qu'il eust semblé que c'eust esté son ennemy; ny la faire plorer, car c'eust esté signe qu'elle eust senty mal; ou la faire seigner comme qui l'auroit blecée, pource qu'estant encore nouveau apprenty, il craignoit merueilleusement ce sang, & pensoit estre chose impossible qu'il sortist du sang, sinon d'une grande bleseure. Si s'en retourna hors du bois, en résolution de prendre avec elle les plaisirs accoustumés seulement, se rendant

au lieu où elle estoit assise , faisant un chapelet de violettes , lui controuva qu'il avoit arraché d'entre les ferres mesmes & les griffes de l'aigle l'oyson de Lycœnion , & se jetant sur elle la baisa de la sorte que Lycœnion l'avoit baisé durant le déduit , car cela seul pouvoit-il , à son advis , faire danger ; & Chloé luy mist sur la teste le chapeau de violettes qu'elle venoit de faire , & en le mettant , lui baisa les cheveux , comme sentans , à son gré , meilleur que les violettes : puis tira de sa pennetiere un morceau de gasteau , qu'elle lui donna à manger , & comme il mordoit dedans , elle lui ostoit de la bouche & le mangeoit elle-même , ne plus ne moins qu'un petit oyseau , qui prend sa bequée du bec de sa mere. Ainsi qu'ilz mangeoyent ensemble , & s'entrebaisoyent plus de fois qu'ilz n'avaloyent de morceaux , ilz apperceurent une barque de pescheurs , qui passoit au long de la coste : il ne faisoit bruit quelconque , & estoit la mer fort calme , au moyen de quoy les pescheurs s'estoyent mis à ramer à la plus grande diligence qu'ilz pouvoient , pour porter en quelques bonnes maisons de la ville du poisson tout fraiz pesché : & ce que les autres mariniers & gens de rames ont tousjours

accoustumé de faire pour soulager leur travail ces pescheurs le faisoient alors ; c'est que l'un d'entre eux, pour donner courage aux autres, chantoit ne sçais quel chant de mariné, & les autres luy respondoient à la cadence, comme l'on faict en une danse. Or tant qu'ils voguerent en pleine mer le son se perdoit, à cause que la voix s'évanoyffoit en l'air ; mais quand ilz vindrent à passer la poincte d'un escueil, & entrer en une baye creuse en forme de croissant, on ouyt bien plus fort le bruit des rames, & entendit-on plus clairement le son de leur chanson, pource que le champ voisin du rivage de la mer en cet endroit-là, estoit une longue vallée, au-dessoubz d'un cousteau de montaigne, laquelle recepvant le son, comme le vent qui s'entonne dedans une fluste, rendoit un retentissement, qui representoit à part le son des rames, & la voix des mariniers à part, qui estoit une chose assez plaisante à ouyr ; car pource que la voix venoit de la mer, celle qui retentissoit sur la terre finissoit d'autant plus tard, que plus tard elle commençoit. Daphnis, qui sçavoit bien d'où ce retentissement procedoit, ne regardoit seulement qu'en la mer, & taschoit à retenir quelque couplet de chanson, afin de la jouer puis après sur sa

fluste. Mais Chloé, qui jamais n'avoit ouy ce raisonnement de la voix, qu'on appelle Echo, tournoit sa teste tantost vers la mer, pendant que les pescheurs chantoyent, & tantost vers le bois, regardant où estoient ceux qui leur respondoient : & quand ilz furent passez & esloignez, voyant qu'il y avoit un si grand silence en la mer, elle demanda à Daphnis, si derriere l'escueil il y avoit une autre mer, & une autre barque, & d'autres mariniers qui vogassent. Daphnis se print doucement à soufrire, & la baisa encore plus doucement, puis luy mettant le chapeau de violettes sur la teste, commença à lui conter la fable d'Echo, lui demandant (pour loyer de lui faire ce beau conte) dix autres baisers. Si lui dist : Mamyé, il y a plusieurs sortes de Nymphes, toutes belles, & scavantes en l'art de chanter; les unes sont Nymphes de prez, les autres des eaux, les autres des bois; & de l'une de celles-là fut jadis Echo, fille mortelle, pource qu'elle avoit esté engendrée d'un pere mortel, & belle comme fille d'une belle mere. Elle fut nourrie par les Nymphes, & apprinse par les Muses, qui luy monstrent à jouer de la fluste, de la lyre, & de tous les autres instrumens de musique,

tellement qu'estant jà venue en la fleur de son aage , elle dansoit avec les Nymphes , & chantoit avec les Muses ; mais elle fuyoit les masles , autant les Dieux que les hommes , aymant trop la virginité. Pan se courrouça à elle , ayant envie de ce qu'elle chantoit si bien , & estant dépit de ce qu'il ne pouvoit venir à bout de jouir de sa beauté , tellement qu'il feit devenir enragez les bergers & les chevriers du pays où elle estoit , qui comme loupz & mastins affamez , déchirerent la pauvre fille en pieces , & en jetterent les membres çà & là , chantant encore ses chansons : mais la terre , en faveur des Nymphes , conserva son chant , & retint sa musique , de maniere qu'au gré des Muses elle rend encore maintenant toute telle voix que l'on veult , representant ainsi que faisoit la pucelle de son vivant , les Dieux , les hommes , les instrumens de musique , les bestes , & Pan luy-mesme quand il joüe de sa fluste ; & luy , entendant contrefaire son jeu , faulte & court après , non pour désir ou espérance qu'il ait d'en jouir , mais seulement pour scavoir qui est celuy qui apprend à contrefaire son jeu , sans qu'il le voye , ne connoisse. Daphnis ayant faict ce conte , Chloé le baisa non-seulement

dix fois, comme il avoit demandé, mais beaucoup plus de fois; car Echo repeta après luy presque tout ce qu'il avoit dict: comme voulant tesmoigner qu'il n'avoit point menty. La chaleur du Soleil alloit tous les jours de plus en plus augmentant, parce que le printems finissoit & l'esté commençoit; ainsi avoyent-ils de nouveaux passe-temps convenables à la saison d'esté. Daphnis se baignoit dedans les rivieres, & Chloé se lavoit dedans les fontaines. Daphnis jouoit du flageolet à l'envi des pins que les vents faisoient resonner, & Chloé chantoit à l'encontre du rossignol, à qui mieux mieux. Ils chassoyent aux cigales, prenoyent des fauterelles, cueilloyent des fleurs, crouloyent des arbres fruitiers, & en mangeoyent des fruitz, & quelquefois se couchoyent ensemble, nuë à nud, en estendant soubz eux une peau de chevre: & lors eust Chloé facilement été faicte femme, si Daphnis n'eust eu crainte de luy faire sang, de quoy il avoit si belle peur, que craignant de ne pouvoir pas estre tousjours maistre de soy, il ne permettoit pas que Chloé se dépouillast souvent toute nuë, tellement que Chloé mesme s'en émerveilloit; mais elle avoit honte de luy en demander

la cause. Or en cet esté, plusieurs poursuyvans de tous costez vindrent derechef à Dryas luy demander Chloé en mariage : les uns luy apportoyent des présens, les autres lui en promettoyent de grands, tellement que Napé muë d'avarice, luy conseilloit de la marier, sans garder plus longuement une fille si grande en sa maison, pource que si on ne se hastoit de luy donner mary, elle pourroit à l'aventure, bientoist, en gardant ses bestes par les champs, perdre son pucelage, & se marier pour des pommes ou des roses, avec quelque berger, & pourtant disoit-elle qu'il valloit mieux, pour le bien de la fille, & d'eux aussi, la faire maîtresse de la maison de quelque laboureur, & prendre beaucoup de biens, qu'on leur offroit pour ce faire, lesquels ilz garderoient à leur petit filz : car elle avoit non gueres auparavant faict un petit garson. Dryas luy-mesme se laissoit aller à ces promesses, car chacun des poursuyvans lui faisoit des offres plus grandes qu'il ne meritoit, pour la poursuite du mariage d'une simple bergere : toutefois pensant en luy-mesme, puis après, que la fille estoit de meilleur lieu venue que d'estre mariée avec un paysan, & que s'il advenoit qu'elle retrouvast ses vrais parens, elle les

feroit tous riches & heureux , il differoit d'en rendre certaine responce , & les remettoit tousjours d'une saison à autre , en quoy faisant il gaignoit tout plein de beaux présens que l'on luy donnoit. Ce que Chloé entendant , en estoit fort desplaisante , & toutefois fut long-temps sans vouloir descouvrir à Daphnis la cause de son ennuy , de peur de le fascher aussi ; mais à la fin voyant que Daphnis l'en pressoit & importunoit tant & si souvent , & qu'il s'ennuyoit plus de n'en rien sçavoir , qu'il n'eust peu faire après l'avoir sçeu , elle luy conta tout , combien il y avoit de riches poursuyvans qui la demandoient en mariage ; les paroles que Napé disoit à son mary , pour l'induire à la marier , & comment Dryas n'y avoit point contredict , ains avoit remis le mariage aux prochaines vendanges. Daphnis ayant ouy ces paroles , à peine qu'il ne perdit sens & entendement , & se seant à terre se print à plorer chauldement , disant qu'il mourroit de regret si Chloé désistoit de venir aux champs garder les bestes avecque luy , & que non luy seulement , mais que les brebis & moutons aussi en mourroyent de desplaisir , s'ilz perdoient une telle bergere. Toutefois après avoir bien ploré , il se revint un petit ,

& reprenant ses espritz, se meist en la teste qu'il pourroit bien l'avoir luy-mesme, s'il la demandoit à son pere, esperant surmonter facilement tous les autres, & estre préféré à eux. Il n'y avoit qu'une chose seule qui le troublast, c'est que son pere nourricier Lamón, n'estoit pas riche; ce seul point luy affoiblissoit fort son esperance: toutefois il proposa, quoiqu'il en deust advenir, de la demander à femme; & Chloé mesme en fut bien d'avis: si n'en osa-t-il de prime face rien dire à Lamón, mais decouvrit plus hardiment son amour à Myrtale, & luy tint propos comme il la desiroit espouser. Myrtale, la nuit, en parla à son mary, mais Lamón le trouva fort mauvais, & appella sa femme beste, de vouloir que son nourriçon fust marié avec la fille d'un berger, veu que par les enseignes de congnoissance qu'il avoit trouvées quant & luy, luy promettoit bien plus grand estat & meilleure fortune, de sorte qu'il esperoit que quelque jour, quand il auroit retrouvé ses parens, il les pourroit, non-seulement affranchir & delivrer de servitude, mais aussi les faire propriétaires d'une meilleure & plus grande terre que celle qu'ilz tenoyent de leur maistre. Toutefois Myrtale

craignant que Daphnis, quand il se verroit totalement descheu de l'esperance de pouvoir parvenir à ces nopces tant desirées, ne print la hardiessé de faire quelque mauvais coup de sa main, tant il estoit furieusement espris d'amour, luy allegua autres occasions & moyens de refus: Nous sommes, dit-elle, pauvres, mon filz, & avons besoing d'une fille qui nous apporte plustost qu'à qui y faille donner: au contraire, ilz sont riches, eux, & si veulent avoir mary qui leur donne. Mais va, fais tant envers Chloé, & elle envers son pere, qu'il ne nous demande pas grande chose, & qu'il te la donne en mariage: je sçai bien qu'elle t'aime, & qu'elle aimera beaucoup mieux coucher avec toy pauvre & beau, comme tu es, qu'avec pas un de ses autres poursuivans, qui sont riches & laidz comme marmotz. Myrtale cuidoit bien par ce moyen avoir honnestement esconduit Daphnis, pource qu'elle tenoit pour tout certain, que jamais Dryas ne s'y consentiroit, ayant en mains d'autres plus riches poursuivans, qui luy offroyent beaucoup de biens, & neantmoins Daphnis ne se pouvoit plaindre de la responce; mais congnoissant qu'il s'en falloit beaucoup qu'il ne peust payer ce

qu'on luy demandoit, fist ce que les amans qui sont pauvres ont ordinairement accoustumé de faire; c'est qu'il se miçt derechef à plorer, en invoquant les Nymphes en son ayde, lesquelles la nuict ensuivant, comme il dormoit, s'apparurent à luy en mesme forme & maniere qu'elles avoyent faict auparavant, & luy dict la plus aagée d'elles: Touchant le mariage de Chloë, Daphnis, une autre Déité que nous en a la superintendance; mais nous te donnerons moyen de gagner & adoucir envers toy Dryas. Le bateau des jeunes hommes Methymniens, duquel tes chevres, l'année passée, brouterent le lien d'ozier verd, avec lequel ilz l'avoient attaché à la rive de la mer, fut ce jour-là emmené par les ventz bien loing de la terre; mais la nuict ensuivant il se leva un vent marin, qui esmut tellement la mer, que les vagues jetterent le bateau contre les rochers de la coste, où il fut entierement rompu & fracassé, & la plupart de ce qui estoit dedans perdu, sinon que les ondes poufferent sur la greve une bourse où il y a trois cens escuz, & est encore là envelopée & couverte d'herbes, que la mer jette dessus auprès d'un dauphin mort, qui a esté cause que nul passant ne s'en est

approché, fuyant la puanteur de ceste charogne : mais vas-y, & prens la bourse avecque ce qui est dedans, ce sera assez à ceste heure, pour monstrier à Dryas que tu n'es point pauvre, mais cy-aprés tu seras bien plus riche. Elles n'eurent pas si-tost achevé ces paroles, qu'elles disparurent avec la nuict : & si-tost que le jour fust venu, Daphnis se leva tout resjouy, chassa ses chevres aux champs à force de sifler ; & après avoir baisé Chloé, & salué les Nymphes, s'encourut incontinent vers la mer, comme si pour se purifier il eust voulu s'asperger de l'eau marine ; & se pourmenant au long du rivage sur le sable, alloit regardant s'il verroit point ces trois cens escuz : à quoy trouver il n'eust pas grande peine, car la mauvaise odeur du dauphin corrompu luy donna incontinent au nez, & luy servist de guide pour le conduire au lieu, où il osta les herbes, & trouva deffoubz une bourse pleine d'argent, qu'il enleva, & la mist dedans sa pennetiere ; mais il ne partist point delà, qu'il n'eust premierement adoré & remercié les Nymphes, & la mer mesme : car encore qu'il fust chevrier, si estimoit-il la mer plus douce & plus benigne que la terre, parce qu'elle luy aydoit à

parvenir au mariage de Chloé. Estant faisi de cest argent, il n'attendit plus, ains s'estimant le plus riche, non seulement de tous les paysans de là entour, mais aussi de tous les vivans, s'en alla droict à Chloé luy conter la révélation qu'il avoit eue en dormant, luy monstra la bourse qu'il avoit trouvée, & luy dict qu'elle gardast bien leurs bestes jusques à ce qu'il fust de retour. Puis s'en alla le plus roide qu'il peut vers Dryas, lequel il trouva battant du bled en l'aire avec sa femme Napé, si luy commença un brave propos, en luy disant ces paroles : Dryas, donne-moy ta fille Chloé en mariage, je sçai bien jouer de la fluste, je sçai bien besogner aux vignes & aux olives, labourer la terre, vanner le bled au van, & au surplus Chloé elle-mesme te pourra tesmoigner comment je sçai bien garder & gouverner les bestes. On me bailla au commencement cinquante chevres, & je les ay faict multiplier deux fois autant, & si ay eslevé de beaux & grands boucquins, là où il falloit que nous menassions nos chevres aux boucz de nos voisins pour les faire saillir, à cause que nous n'en avions point, & si suis jeune & votre voisin, de qui personne ne se sçauroit plaindre : une chevre m'a

nourri comme une brebis a nourrie Chloé, & bien que je deusse estre préféré aux autres qui la demandent pour tant de choses, encore ne serai-je point vaincu par eux en dons : ilz te donneront quelques chevres, quelques brebis, ou quelque paire de bœufs galleux, & du bled, dont on ne sçauoit nourrir trois poulles ; mais voici trois cens escuz comptant que je te donnerai, mais ce fera soubz condition que personne n'en sçaura rien, non pas Lamon mesme mon pere. En luy disant ces mots, il lui deli-
vra l'argent, & le baïsa quant & quant. Dryas & Napé voyant si grosse somme de deniers, qu'ilz n'en avoyent jamais tant veu ensemble, lui promirent sur le champ qu'il auroit Chloé pour sa femme, & dirent qu'ilz feroient bien trouver bon le mariage à Lamon. Si demourerent Daphnis & Napé ensemble sur l'aire, & en chassant les bœufz en rond avec les harces, faisoient sortir le bled hors des espiz, & Dryas ayant premierement ferré la bourse & l'argent, s'en alla soudain trouver Lamon & Myrtale, pour leur demander le jeune Daphnis en mariage. Il les trouva comme ilz mesuroyent de l'orge, que l'on venoit de vanner, & se plaignoyent de ce qu'à grande

DE DAPHNIS ET CHLOÉ. III

peine en trouvoient-ilz autant comme ilz en avoyent semé. Il les reconforta , disant qu'ainsi estoit-il par-tout ; puis leur demanda Daphnis à mary pour Chloé , & leur dit que combien que d'autres luy offrisent beaucoup de biens pour l'accorder , il ne vouloit néanmoins rien avoir d'eux ; ains plustost estoit prest de leur donner du sien , car ilz ont , disoit-il , esté nourriz ensemble , & en gardant leurs bestes ont engendré une telle amitié entre eux , qu'il seroit maintenant mal-aysé de les séparer , & estoientjà bien d'aage tous deux pour coucher ensemble. Dryas leur alleguoit ces raisons , & plusieurs autres , comme celui qui pour loyer de leur persuader avoitjà reçu les trois cens escuz. Lamon , qui ne pouvoit plus s'excuser sur sa pauvreté , attendu que les parens de la fille l'en pressoyent , ne sur l'aage de Daphnis , pource qu'il estoit déjà en son adolescence bien avant , n'osa pas néanmoins dire ouvertement , à la vérité , ce qui le faisoit reculer à ce mariage : c'est que Daphnis luy sembloit estre de trop bon lieu venu pour espouser une bergere ; mais après y avoir un peu de temps pensé , il luy respondit en ceste sorte : Vous estes gens de bien de préférer vos voisins à des estrangers ,

& de n'aymer point plus la richesse que l'honneste pauvreté : le Dieu Pan & les Nymphes en récompense, vous en veüillent ayder : & quant à moy, je vous prometz que j'ay autant d'envie que ce mariage se fasse que vous-mesme ; autrement je ferois bien insensé , me voyant desjà sur l'aage , & ayant plus de besoing d'ayde que jamais, si je n'estimois que ce me fust un grand heur d'estre allié de votre maison , & si est Chloé telle que l'on la doit souhaiter , belle & bonne fille , où il n'y a que redire ; mais estant serf comme je suis , je n'ay rien dont je puisse disposer , ains fault que mon maistre en soit adverty & qu'il le consente : & pourtant je vous prie , differons les nopces jusques aux vendanges , car il doit en ce temps-là venir icy , & lors nous les marierons ensemble : & cependant ilz s'entr'aymeront l'un l'autre , comme le frere & la sœur. Seulement te veux-je bien advertir d'un poinct, Dryas, c'est que tu pourchasses avoir pour ton gendre , un qui est issu de trop meilleur lieu , & plus grand estat que nous ne sommes. Cela dict , il le baïsa , & luy presenta à boire , pource qu'il estoit jà près de midy , & le renvoya , en luy faisant toutes les caresses qu'il luy estoit possible.

Mais

Mais Dryas, qui n'avoit pas mis en oreille sourde les dernières paroles que Lamon luy avoit dictes, s'en alloit resvant en luy-mesme qui pouvoit estre Daphnis : il a esté nourri par une Chevre ; il fault donc bien dire que les Dieux ayent soing de son salut ; il est beau & ne ressemble en rien à ce vieillard camus, ny à sa femme pelée ; il a trouvé trois cent escuz, à peine pourroit un chevrier finer autant de pommes : n'auroit-il point esté exposé comme Chloé ? Lamon l'auroit-il point trouvé comme je fis elle ; avec telles marques de recongnissance comme j'en trouvay ? O Pan, & vous Nymphes, vueillez qu'il soit ainsi ! à l'aventure que Daphnis ayant été recongneu par ses parens, pourra bien faire trouver ceux de Chloé aussi. Dryas s'en alla pensant & discourant ainsi en luy-mesme jusques à son aire, là où il trouva Daphnis en grande dévotion d'ouyr quelles nouvelles il apportoit ; si l'assura, en l'appellant de tout loing son gendre, & luy promettant que les nopces se feroient sans point de doubte en automne, en fiance de quoy il lui donna la main, l'asseurant que Chloé n'auroit jamais autre mary que Daphnis, lequel tout aussi-tost, sans vouloir ny boire ny manger, s'en recourut

H

devers Chloé, & la trouvant qui tiroit ses brebis, & faisoit des fromages, lui annonca la bonne nouvelle de leur futur mariage, & de là en avant la baisoit devant tout le monde, comme sa fiancée, & lui aidoit à faire toute sa besongne : il tiroit les bestes dedans les tiroiers, faisoit prendre le lait pour en faire des fromages, & approchoit les petitz aigneaux & les chevreaux de leurs meres, pour les faire teter. Après qu'ilz eurent achevé toute leur besongne, ilz s'en allerent pour mener & chercher par les champs des fructz meurs, dont il y avoit grande abondance, pource que l'année estoit bonne & fertile, force poires de bois, force autres poires & pommes, les unes jà tombées, les autres encore pendantes aux branches des arbres ; celles qui estoient à bas avoyent meilleure senteur, mais celles qui estoient dessus les arbres, estoient plus fraîches ; les unes sentoient comme bon vin, les autres reluisoyent comme l'or. Et allant ainsi çà & là, ils trouverent un pommier, dont les pommes avoyent jà esté toutes cueillies, & il n'y avoit plus ne feuille, ne fruct, les branches estoient toutes nues, & n'y estoit demouré qu'une seule pomme à la cime de la plus haulte branche. Ceste pomme estoit

belle & grosse à merveille, & sentoit meilleur que toutes les autres, mais celuy qui les avoit cueillies n'avoit osé monter si hault, & ne s'estoit point soucié de l'abattre, & à l'aventure aussi que les Dieux le vouloyent ainsi, qu'une si belle pomme fust réservée pour un pasteur amoureux. Incontinent que Daphnis l'apperceut, il se mist en point pour l'aller cueillir: Chloé l'en voulut garder, mais il n'en fist compte; pourquoy elle ayant peur de le voir tomber, s'enfuit là où estoient leurs bestes; & Daphnis montant aligrement tout au plus hault du pommier, alla cueillir la pomme qu'il lui porta, & la voyant mal contente, luy dist telles paroles, Chloé m'amy; le beau temps a produict ceste belle pomme, un bel arbre l'a nourrie, le beau Soleil l'a meurie, & la bonne fortune l'a contregardée pour une belle bergere, j'eusse bien esté aveuglé si je l'eusse laissée là où elle fust tombée par terre, & eust esté froissée des pieds des bestes, ou envenimée de quelque serpent, qui eust frayé au long, ou bien eust été gastée & pourrie par le temps. La pomme d'or fust jadis donnée à Venus pour le prix de sa beauté: & je te donne celle-cy, pource que tu es plus belle que toutes les autres filles du monde. Nous

fommes Pâris & moi juges & tefmoins pareilz, car il estoit berger & je suis chevrier. En difant ces paroles il la lui mist en son giron, & elle s'approchant de luy, le baifa fi fouefvement, que Daphnis ne se repentit point d'avoir osé monter sur l'arbre si hault pour la cueillir, en ayant eu en récompense un baifer, qui valoit mieux à son gré que ne faisoit la pomme d'or.

Fin du troisieme Livre.



LES
AMOURS PASTORALES
DE
DAPHNIS
ET
CHELOË.

LIVRE QUATRIÈME.

SUR ces entrefaictes vint de la ville de Mitylene un serviteur du maistre de Lamon, qui luy aporta nouvelles, que leur Seigneur commun devoit venir un peu devant les vendanges, pour veoir si les Methymniens auroyent point faict de

dommage en ses terres : à l'occasion de quoy Lamon, approchant jà l'automne, & l'esté vieillissant, accoustra diligemment le logis, afin que le Maistre n'y veist rien, qu'il ne luy fust plaisant à veoir ; il cura les fontaines, afin que l'eau en fust plus claire & plus nette ; il osta le fumier hors de la cour, afin que la mauvaise odeur ne luy en fâchast ; il mist en ordre le verger, afin qu'il le trouvast plus beau. Vray est que le verger de soy-mesme estoit une bien fort belle & plaisante chose, & qui approchoit des parcz des grands Princes & des Rois : il contenoit bien demy quart de lieuë en longueur, & avoit la largeur environ de quatre arpens : on eust dict, à le veoir, que ce n'estoit point un verger, mais un grand champ, car il avoit de toutes sortes d'arbres fructiers, des pommiers, des meürtes, des poiriers, des grenadiers, des figuiers, des orangiers & des oliviers. D'un autre costé, de la vigne haulte, qui montoit sur les pommiers & sur les poiriers, dont les raisins commençoient jà à se tourner, comme si la vigne eust estrivé avec les arbres à qui porteroit le plus beau fruct. D'un autre costé estoient les arbres non portant fruct, comme loriers, platains, cyprez, pins, sur lesquels, au lieu de vigne, y avoit

du lierre, dont les grappes grosses & ja noircissantes, contrefaisoyent le raisin. Les arbres fructiers estoient tous au dedans vers le centre du jardin, pour estre mieux gardez; & les steriles estoient aux orées toutes à l'entour, comme une closture faite toute expressément, & tout cela ceint & environné d'une bonne & forte haye. Tout y estoit fort bien compassé, les tiges des arbres estoient assez distantes les unes des autres; mais les branches s'entrelasoyent, tellement que ce qui estoit de nature, sembloit estre fait par exprès artifice; il y avoit des carreaux de fleurs, dont nature en avoit produict aucunes, & l'art des hommes les autres: les roses, les œilletz & les lys y estoient venuz moyennant l'œuvre de l'homme; les violettes, le muguet & le moron, de la seule nature: en esté y avoit de l'ombre, au printemps des fleurs, en l'automne toutes delices, & en tout temps du fruit selon la saison. Il descouvroit toute la campagne, & en pouvoit-on veoir les troupeaux des bestes paissant emmy les champs: on en voyoit à plein la mer, & les allans & venans sur icelle, au long de la coste, ce qui estoit un des plus delicieux plaisirs du verger. Et droictement au milieu de la

longueur & de la largeur , y avoit un temple , avec un autel dédié à Bacchus : l'autel estoit vestu de lierre , & le temple couvert de branches de vignes. Au-dedans estoient les histoires de Bacchus painctes ; Semele qui accouchoit , Ariadne qui dormoit , Lycurgus lié , Pintheus deschiré en piéces , les Indiens vaincus , les Tyreniens transformez en dauphins , par tout des Satyres & des Bacchantes qui dansoyent : Pan n'y estoit point oublié , ains estoit assis sur une roche , joüant de sa fluste , en maniere qui sembloit qu'il joüast un notte commune aux Bacchantes qui dansoyent , & aux assistans qui regardoyent. Le verger estant tel d'assiette & de nature , Lamon encore l'approprioit de plus en plus , esbranchant ce qui estoit sec & mort aux arbres , & relevant les vignes qui tomboyent en terre : tous les jours il mettoit sur la teste de Bacchus un chapeau de fleurs nouvelles , il conduisoit l'eau de la fontaine dedans les carreaux où estoient les fleurs : car il y avoit dedans ce verger une fontaine que Daphnis avoit trouvée , dont on arrousoit les fleurs , & l'appelloit-on la fontaine de Daphnis : & luy avoit Lamon commendé qu'il engraisast bien ses chevres le plus qu'il

pourroit, pource que le maistre ne faudroit à les vouloir veoir, à cause qu'il y avoit long-tems qu'il ne les avoit veuës. Mais Daphnis n'avoit pas peur qu'il ne fust loué de son maistre, quand il verroit son troupeau; car il l'avoit accreu d'une autre fois autant, comme on lui en avoit baillé au commencement, & n'en avoit le loup ravy pas une, & si estoient en meilleur point & plus grasses que les ouailles. Mais neantmoins afin que son maistre eust de tant plus affection de le marier où il vouloit, il employoit toute la peine, soing & diligence qu'il luy estoit possible à les engresser encore davantage, les menant aux champs dès le plus matin, & ne les en ramenant qu'il ne fust bien tard, les faisant boire deux fois le jour, & cherchant les endroitz où il y avoit mieux à pasturer pour elles: outre ce il trouva moyen d'avoir des battes neufves, force tiroüiers à tirer les chevres & des esclices plus grandes qu'il n'avoit, & estoit si soigneux de ses chevres, qu'il leur oignoit les cornes, afin qu'elles fussent reluisantes, & leur pignoit le poil; brief on eust dict proprement à les veoir, que c'estoit le troupeau mesme du Dieu Pan. Chloé en portoit la moitié de la peine, & oubliant ses

brebis, estoit la pluspart du temps embe-
songnée après ses chevres, tellement que
Daphnis estoit qu'elles sembloient belles,
principalement pource que Chloé y mettoit
la main. Mais en ces entrefaictes il vint un
second messager de la ville, qui commanda
que l'on feist les vendanges le plustost que
l'on pourroit, & dist qu'il avoit charge de
demourer là jusques à ce que le vin fust
faict & entonné, pour puis après retourner
en la ville querir son maistre. Chacun s'ef-
forsoit de faire la meilleure chere que l'on
pouvoit à ce second messager, que l'on ap-
pelloit Eudrome, pource qu'il étoit laquetz,
& estoit son mestier de courir çà & là où
on l'envoyoit. Si se mirent à faire les ven-
danges en toute diligence; de sorte qu'en
peu de jours le vin fut entonné dedans les
vaisseaux; & l'on garda une quantité des
plus beaux & plus fraiz raisins pendans aux
branches de la vigne, pour ceux qui de-
voyent venir de la ville, afin qu'ilz sentif-
sent quelque partie du plaisir des vendanges,
& qu'ilz pensassent y avoir esté. Quand ce
laquetz Eudrome fut prest de s'en retourner
à la ville, Daphnis luy fait don de plusieurs
choses, mesmement de ce que peult donner
un chevrier, comme de bons fromages,

d'un petit chevreau , d'une peau de chevre blanche , ayant le poil fort long , pour mettre deffoubz luy , quand on l'envoyoit l'hyver aux champs , dont le laquetz fut fort ayse , & baifa Daphnis , en luy promettant qu'il diroit tous les biens du monde de luy à leur maistre. Ainsi s'en alla le laquetz bien affectionné en leur endroict , & Daphnis demoura , traictant ses bestes en grand soing & grande sollicitude avec Chloë , qui de la part n'avoit pas moins de peur aussi , pour ce que c'estoit un jeune garçon qui n'avoit jamais rien veu , sinon ses chevres , la montagne où elles pasturoyent , les gens de son village , & Chloë ; & devoit bientost veoir son maistre , qu'il n'avoit jamais veu , & duquel il n'avoit oncques ouy le nom avant ceste heure-là. Chloë se soulcyoit aussi comment Daphnis parleroit à ce maistre , & estoit en grand esmoy touchant leur mariage , ayant peur qu'il ne s'en allast comme un songe en fumée ; tellement que pour ces pensemens leurs ordinaires baisers estoient meslez de crainte , & leurs embrassemens soucieux , comme si ja leur maistre eust esté présent , ou comme s'ilz eussent eu peur qu'il n'en apperceust quelque chose. Eux estans en ceste transe , encore leur survint-il

un autre malheur. Il avoit là auprès un bouvier, nommé Lampis, mauvais homme, outrageux & presomptueux, qui pourchassoit aussi avoir Chloé à mariage; & ayant senty le vent que Daphnis la devoit épouser moyennant que le maistre en fust content, chercha les moyens de faire que le maistre fust fort courroucé à eux, & sachant qu'il prenoit très-grand plaisir à son verger, delibera de le gaster & diffamer le plus qu'il pourroit. Or s'il se fust mis à couper les arbres, il eust peu estre surpris par le son de sa coignée, & pourtant s'arresta-t-il à la résolution de gaster & froisser toutes les fleurs; si attendit que la nuit fut venue; puis passa par-dessus la haye, & s'en alla arracher, fouller, rompre & froisser tout ce qu'il peut, comme feroit un sanglier; cela fait, il se retira secrettement, sans que personne l'apperceust. Lamon, le lendemain matin, entrant au verger pour mettre l'eau de la fontaine dedans les carreaux de fleurs, veit toute la place si outrageusement vilenée, qu'un ennemy venant à propos delibera pour tout gaster, n'y eust sceu pis faire: si deschyra incontinent sa jaquette, & s'escria à haulte voix, disant, ô Dieu! si fort que Myrtaie laissant ce qu'elle avoit en

main s'en courut viftement vers luy ; Daphnis qui avoit jà mené fes bestes aux champs , ayant ouy le bruit , s'en recourut auffi à la maison , & voyant ce grand defarroy , fe prinrent tous à crier , & en criant à larmoyer. Si n'estoit pas de merveille que eux , qui redoubtoyent l'ire de leur Seigneur , en plorassent ; car un estrangier à qui le faict n'eust point touché , en eust bien ploré , de veoir un si beau lieu ainsi despouillé de sa beauté , & toute la terre gourfoulée , sinon en certains endroictz , où la malice de l'envieux n'avoit point touché , par lesquels on pouvoit juger quelle avoit esté la singularité de tout le reste , estant en son entier : car bien que tout y fust renversé sans dessus dessous , encore appercevoit-on bien qu'il avoit esté autrefois beau ; les abeilles volletoyent à l'entour en murmurant continuellement , comme si elles eussent lamenté ce degast , & Lamon tout exploré disoit telles paroles : Helas ! comment , mes rosiers sont rompus ! comment , mes violliers sont foullez ! mes hyacinthes & mes narcisses sont arrachez ! ç'a bien esté quelque meschant ou mauvais homme qui me les a ainsi mal accoustrez : le printemps reviendra & cecy ne fleurira point ; l'esté retournera ,

& il n'y aura point icy de fruit ; l'automne recommencera , & il n'y aura en ce verger point de fleurs , pour faire un bouquet seulement. Et toy , sire Bacchus , n'as-tu point eu de pitié de ces pauvres fleurs , que l'on a ainsi tout auprès de toy , devant tes yeux , diffamées , desquelles je te mettois souvent un chapellet sur la teste ? comment monstreray-je maintenant à mon maistre son verger ? que me dira-t-il quand il le verra ainsi piteusement accoustré ? ne fera-t-il pas pendre ce malheureux vieillard , comme Marsyas , à l'un de ces pins ? si fera , & à l'aventure Daphnis aussi quant & quant , pensant que ce aura esté par sa faulte , parce qu'il n'aura pas esté assez soigneux de bien garder ses chevres. Ces regretz & lamentations de Lamon les firent encore plorer plus chauldement , pource qu'ilz desploroyent non seulement le gast du jardin , mais aussi le danger de leurs personnes. Chloé lamentoit son pauvre Daphnis , s'il falloit qu'il fust pendu , & prioit aux Dieux que ce maistre qu'ilz avoyent tant désiré , ne vint point ; & luy estoient les jours bien longz & pénibles à passer , cuydant jà veoir devant ses yeux comment l'on foïetteroit le pauvre Daphnis. Sur le soir arriva derechef le

laquetz Eudrome , lequel apporta nouvelles que leur vieil maistre viendroit dedans trois jours , mais que le jeune , qui estoit son fils , viendroit le lendemain. Si commencerent à consulter entre eux ce qu'ilz avoyent à faire touchant cest inconvenient , & appellerent à ce conseil Eudrome , lequel voulant beaucoup de bien à Daphnis , fut d'opinion qu'ilz declarassent à leur jeune maistre la chose tout ainsi comme elle estoit advenueë , & si leur promist qu'il leur ayderoit , & ce qu'il pouvoit bien faire , estant à la grace de son maistre , à cause qu'il estoit son frere de laict. Et le lendemain feirent ce qu'il leur avoit conseillé ; car Astyle , qui estoit le filz du maistre , arriva le lendemain , accompagné d'un sien plaisant , nommé Gnathon , qu'il menoit quant & luy , pour lui faire passer le temps. Astyle estoit un jeune homme , à qui la barbe ne faisoit que commencer à poindre , & Gnathon jà de long-temps avoit accoustumé de la raser. Si-tost que ce jeune maistre fut arrivé , Lamon , Myrtale & Daphnis , se jetterent à genoulx devant ses pieds , le supplians d'avoir pitié du pauvre vieillard , & le garantir de la fureur & courroux de son pere , attendu qu'il ne pouvoit mais de l'inconvenient , & quant &

quant luy conterent ce que c'estoit. Astyle en eut pitie, & entrant dedans le verger, & ayant veu le gast, promist qu'il les excuseroit envers son pere, & en prendroit la coulpe sur luy, disant que ç'auroit esté ses chevaux, qui s'estant dessachez, auroyent ainsi tout rompu, fonné, froissé & arraché ce qui estoit le plus beau dedans le jardin. Pour ceste benigne responce, Lamon & Daphnis feirent priere aux Dieux de luy octroyer l'accomplissement de ses desirs. Mais Daphnis luy apporta davantage de beaux presens, comme des chevreaux, des fromages, des oyseaux avec leurs petitz, des moissines de raisins, des pommes tenans encore aux branches: & oultre cela du bon vin nouveau de Methelin, dequoy Astyle lui feut fort bon gré, & en attendant son pere, se delectoit de chasser aux lievres, comme un jeune homme de bonne maison, qui ne cherchoit que nouveaux passetemps, & qui estoit là venu pour prendre l'air des champs. Mais Gnathon estoit un gourmand, qui ne savoit autre chose faire que manger & boire jusqu'à s'enyvrer: lequel ayant veu Daphnis quand il apporta ses presens, fut incontinent feru de son amour; car oultre ce qu'il estoit de nature vicieux ayant les garçons,

il

il vit en Daphnis une beauté si exquisite, qu'à peine en eust-il sceu trouver de pareille en la ville; si proposa en luy-mesme de l'accoincter, esperant facilement en venir à bout. Ayant résolu cela en son entendement, il ne voulut point aller à la chasse quant & Astyle, ains s'en alla aux champs, où Daphnis gardoit ses bestes, faisant semblant que c'estoit pour veoir les chevres; mais à la vérité c'estoit pour veoir le chevrier, & pour essayer à le gagner: si commença à lui louer ses chevres, & le pria de joüer de sa fluste quelques chansons de chevriers, en luy promettant que de brief il le feroit affranchir, & luy donner liberté, attendu qu'il avoit pouvoir & tout crédit envers son maistre. Quand il crut s'estre rendu ce jeune garson obéissant, il espia le soir sur la nuict, ainsi qu'il ramenoit son troupeau au tect, & accourant à luy le baisa premierement, puis luy dit qu'il se prestast à lui en la mesme posture que les chevres avec les boucz. Daphnis fut longtemps qu'il n'entendoit point ce qu'il vouloit dire; mais à la fin il lui respondit que c'estoit bien chose naturelle que le bouc montast sur la chevre, mais qu'il n'avoit oncques veu qu'un bouc faillit un autre bouc, ne que les beliers montassent l'un sur l'autre, ni les

coqz auffi , au lieu de couvrir les brebis & les poulles : non pour cela Gnathon lui mist la main sur le collet , pour tafcher à le forcer ; mais Daphnis le repouffa fi rudement , avec ce qu'il eftoit fi yvre , qu'à peine fe pouvoit-il fouftenir fur fes piedz , qu'il le fift tomber à la renverfe & s'enfuit , laiffant fon homme couché tout de fon long par terre , ayant affaire de quelqu'un qui lui aidast à fe relever. Daphnis de-là en avant ne s'approcha plus de luy : ains mena tous les jours fes chevres , tantoft en un endroit , & tantoft en un autre , le fuyant autant comme il cherchoit Chloé ; Gnathon mefme ne l'alloit plus pourfuivant , ayant esprouvé qu'il eftoit fort & roide jeune garfon : ains chercha occasion propre pour en parler à Aftyle , esperant que le jeune homme lui en feroit don , pource qu'il fe promettoit qu'il vouloit beaucoup pour luy : toutefois pour ceste heure-là il ne peut pas , car Dionyfophanes le pere , & fa femme Clearifte arriverent , & y avoit parmi la maison grand tumulte de cheveaux , de varletz , d'hommes & de femmes ; mais depuis le trouvant à part , il lui fift une harengue de fon amour. Or Dionyfophanes avoit jà les cheveux à demi blancz , mais au demourant il eftoit beau &





grand homme , & qui de la disposition de sa personne , eust tenu bon aux plus roides jeunes hommes ; c'estoit un des plus riches de la ville , & des plus hommes de bien. Le premier jour qu'il arriva , il sacrifia à tous les Dieux des champs , à Cerès , à Bacchus , à Pan & aux Nymphes , & fist le festin à toute sa famille : les jours ensuivans il alla veoir le labourage de Lamon , & voyant les terres bien cultivées , & les vignes aussi , le verger beau au demourant , car Astyle avoit prins sur lui le gast des fleurs & du jardinage , il fut fort jouyeux de trouver tout en si bon ordre , & louant Lamon de sa diligence , lui promit que bientost il luy donneroit sa liberté. Cela veu , il alla veoir aussi les chevres & le chevrier qui les gardoit. Mais Chloé ayant peur & honte tout ensemble de si grande compagnie , qui venoit quant & luy , s'enfuit cacher dedans le bois. Daphnis ne bougea , ains se présenta , ayant sur son doz une peau de chevre à long poil , & une pennetiere neuve en escharpe à son costé , & tenant en l'une de ses mains de beaux fromages tous frais faictz , & en l'autre deux beaux chevreaux qui tettoyent encore. Le faisoit si bon veoir , que si jamais Apollon , comme l'on dit , garda les bœufs

de Laomedon , il estoit tel que Daphnis estoit lors : & quant à lui , il ne dit mot , ains s'inclinant seulement devant le maistre , luy offrit ces présens. Et adonc Lamon print la parole , & dit : C'est celuy , mon maistre , qui garde vos chevres , vous m'en baillastes cinquante avec deux boucz , & il vous en a fait cent , & dix boucz ; voyez-vous comment elles sont grasses & bien vetues , & qu'elles ont les cornes entieres & belles : il leur a enseigné à entendre la musique , tellement qu'elles font tout ce que l'on veult , en oyant le son de la fluste. Cleariste , qui estoit là présente , eut envie d'en veoir l'expérience , si commanda à Daphnis qu'il jouïast de sa fluste , ainsi qu'il avoit accoustumé , quand il vouloit faire faire quelque chose à ses chevres , & lui promit , s'il flustoit bien , de lui donner une jaquette , un manteau & des souliers. Adonc Daphnis se dressant en piedz soubz le fousteau , toute la compagnie estant en rond autour de luy , tira sa fluste de sa penetiere , & premiere-ment souffla un bien peu dedans , & soudain ses chevres leverent toutes la teste ; puis sonna le chant auquel il avoit accoustumé de les faire pasturer . & adonc mettant le nez en terre se prindrent toutes à paistre ;

après il leur sonna un certain chant mol & doux, & incontinent elles se coucherent toutes à terre : il en sonna un autre hault & agu, & elles s'enfuyrent viftement se cacher dedans le bois, comme si elles eussent veu le loup : tost après il leur sonna un son de rappeau, & adonc sortant toutes du bois, elles se vindrent rendre à ses piedz. Varletz ne scauroyent estre plus obéissans au commendement de leurs maistres, qu'elles estoyent au son de sa fluste, de quoy tous les assistans furent fort esbahys, spécialement Cleariste, laquelle jura qu'elle donneroit ce qu'elle avoit promis au gentil chevrier, qui estoit si beau, & qui sçavoit si bien jouier de la fluste. Si-tost qu'ilz furent retournés au logis, ilz se mirent à soupper, & envoyerent à Daphnis de ce qui leur fust servy à table, de quoy il fist bonne chere avec Chloé, estant bien ayse de manger de bonne viande, accoustree à la façon de la ville, & au reste, ayant bonne esperance de parvenir au mariage de son amie, du gré & consentement de ses maistres. Mais Gnathon s'estant enflammé davantage, par ce qu'il avoit veu faire à Daphnis, faisant son compte qu'il ne vivroit jamais à son ayse s'il n'en jouissoit à son plaisir, alla trouver

Astyle, qui se pourmenoit dedans le verger, & le mena dedans la chapelle de Bacchus, là où il luy baïsa les piedz & les mains. Astyle luy demanda pour quelle cause il faisoit cela, & que c'estoit qu'il vouloit dire. Le pauvre Gnathon, dit-il, mon maïstre, s'en va mourir, car jusqu'ici il n'a jamais rien aimé que les morceaux, & ne trouvoit rien si beau que le bon vin vieil, & lui sembloient vos cuisiniers plus beaux que tous les jeunes garçons de Mitylene; mais maintenant il n'estime plus rien beau que Daphnis, & ne prend goust quelconque à tant de viandes exquises que l'on sert tous les jours sur votre table, ains deviendroit volontiers chevre, broutant de l'herbe & de la ramée verte aux champs, moyennant qu'il peust oüyr le son de sa fluste, & estre gardé par un si beau chevrier: si te prie que tu veuilles sauver la vie à ton pauvre Gnathon, & le faictes vainqueur de l'amour invincible, autrement je te jure par ma mort, qu'après avoir bien farcy ma pance de viandes, je me tueray moy-mesme devant l'huis de Daphnis, & ne m'appelleras plus le petit Gnathon, comme tu soulois le faire en riant. Le jeune homme, qui estoit de bonne nature, ne peut souffrir de veoir plorer

Gnathon , & derechef luy baifer les mains & les pieds , mefmement qu'il avoit essayé que c'estoit de la detresse d'amour ; si lui promist qu'il le demanderoit à son pere , & qu'il le meneroit à la ville pour estre son serviteur. Et pour luy en faire venir encore plus d'envie, luy demanda en riant s'il n'auroit point de honte de baifer le filz d'un payfant tel que Lamon , & d'avoir couché à ses costez un garson gardant les chevres : & en luy disant cela il feit quant & quant une mine d'un homme qui se refroigne, pour sentir la mauvaise odeur que sent un bouc. Mais Gnathon , comme celui qui avoit souvent ouy les propos d'amour, qui se tiennent ès tables des luxurieux, luy respondit : Celuy qui aime, ô mon cher maistre, ne s'embarasse point de tout cela ; ainsi tel a aimé une plante, tel autre un fleuve, tel autre une beste. Eh ! qui n'auroit pas pitié de celuy qui aimant beaucoup, seroit obligé d'avoir de l'horreur pour ce qu'il aime ? Quant à moy, il est vray que j'ayme un corps serf, mais où il y a une beauté digne d'une franche & noble personne. Voyez-vous comment sa perruque est belle, comment au-dessoubz des sourcils ses deux yeulx estincellent & reluisent ne plus ne moins qu'une belle pierre

precieuse bien mise en œuvre ; comment sa bouche est réparée de belles dentz blanches comme yvoire ? Qui est celuy si denaturé & esloigné d'amour , qui n'en desirast avoir un baiser ? Si j'ay mis mon amour en un pasteur , j'ai en cela faict comme les Dieux : Anchises gardoit les bœufs , & la Déesse Venus le choisit pour son amy. Branchus paissoit les chevres , & Apollon en fut amoureux. Guanimesdes estoit berger , & Jupiter le ravit pour en avoir son plaisir. Ne mesprisons point ce jeune garson , auquel nous voyons que les chevres mesmes sont ainsi obéissantes , & remercions les aigles de Jupiter , qui souffrent une telle beauté demourer ici entre les hommes. Astyle en cet endroit ne se peut plus contenir de rire , disant qu'Amour , à ce qu'il voyoit , rendoit les amans grands orateurs , & depuis chercha l'occasion d'en pouvoir à propos parler à son pere. Mais le laquetz Eudrome ayant ouy , sans faire semblant de rien , tous leurs devis , & estant marry qu'une telle beauté fust abandonnée à cest yvrongne pour en abuser à son désordonné plaisir , l'alla incontinent conter à luy-mesme & à Lamon. Daphnis en fust tout esperdu de prime-face , delibérant prendre la hardiesse

de s'enfuir plustost avec Chloé , ou bien de mourir , si elle vouloit mourir avec luy : & Lamon appellant sa femme Myrtale hors de la cour , luy commença à dire : Ma femme , nous sommes perduz , le temps est venu qu'il nous fault descouvrir malgré nous ce que nous avons jusqu'icy tenu couvert & secret ; les pauvres chevres sont desolées & desertes , & tous nous autres aussi ; mais par le Dieu Pan & par les Nymphes , si l'on me devoit faire mourir , je ne me tairay point de la fortune de Daphnis , ains diray comment je l'ay enlevé , & monstreray ce que j'ay trouvé quant & luy , afin que le meschant Gnathon entende quel enfant il veut gaster , le malheureux qu'il est : prépare-moy seulement ses joyaux & enseignes de recongnissance. Cela dict , ilz rentrent tous deux au dedans du logis , & Astyle trouvant son pere à propos , luy demanda permission d'emmener Daphnis quant & luy à la ville , disant que c'estoit un trop gentil garçon , pour le laisser aux champs , & que bientost Gnathon luy auroit montré toute la civilité qu'il fault pour servir à la ville. Le pere luy octroya volontiers , & faisant appeler Lamon & Myrtale , leur cuyda dire une bonne nouvelle , que Daphnis ,

au lieu de garder les bestes, serviroit de-là en avant son filz Astyle en la ville, & leur promit qu'i' leur bailleroit deux autres chevriers au lieu de luy. Adonc Lamon, estansjà tous les autres serviteurs accourus, bien joyeux de ce qu'ilz esperoyent avoir un tel compagnon avec eux, demanda à son maistre congé de parler; ce qui luy estant octroyé, il parla de ceste sorte: Je vous prie, mon maistre, escoutez un propoz véritable de ce pauvre vieillard, & je vous jure par les Nymphes, & par le Dieu Pan, que je ne vous mentiray pas d'un seul mot. Je ne suis pas le pere de Daphnis, n'a esté ma femme Myrtale si heureuse que de porter un tel enfant; mais le pere & la mere pource qu'ilz en avoyent à l'adventure assez d'autres plus grandz, exposerent cestuy-cy petit enfant: je le trouvay abandonné de pere & de mere, & alaieté par une de mes chevres, laquelle j'ai enterrée dedans le verger après qu'elle a esté morte de sa mort naturelle, l'ayant aimée pource qu'elle avoit faict œuvre de mere envers cest enfant: je trouvay quant & quant des joyaux que l'on avoit exposez avecque luy pour une fois le reconnoistre: je le confesse & les garde; car ce sont marques auxquelles on peut

congnoistre qu'il est yssu de bien plus hault estat que le nostre. Or ne suis-je point mary qu'il devienne varlet de votre filz Aftyle, car ce sera à un beau & bon maistre, un beau & bon serviteur ; mais je ne scaurois souffrir qu'il soit mené à la ville pour servir à la vilennie de Gnathon, lequel le veut faire emmener à Mitylene, pour en abuser comme d'une femme. Lamon ayant dict ces paroles, se teut, & espendit force larmes, & Gnathon fit du courroucé, en le menaçant à battre. Mais Dionysophanes estonné de ce qu'il avoit ouy dire à Lamon, regarda Gnathon de travers, & luy commanda qu'il se teust : puis interrogea derechef Lamon, luy enjoignant de dire vérité, sans aller controuver des menteries, pour cuyder retenir Daphnis comme son filz. Lamon persistant dans son dire, atesta tous les Dieux, & s'offrit à souffrir tout s'il mentoit. Dionysophanes adonc se print à examiner en luy-mesme ces parolés, estant sa femme assise auprès de luy. A quelle occasion auroit Lamon controuvé cecy, veu que pour un chevrier je veux luy en donner deux, & comment est-ce qu'un rude paysant comme luy auroit inventé cela ? Car de prime-face il ne luy sembloit pas du tout incroyable

qu'un tel enfant ne peut bien estre né de ce vieillard & de sa pauvre femme. Si pensa qu'il n'estoit pas besoing d'y songer davantage, & qu'il falloit promptement veoir les enseignes de reconnoissance, pour connoistre si elles monstroyent qu'il fust issu, comme il disoit, de plus hault estat que le sien. Myrtale les alla incontinent querir dedans un vieil sac, auquel il les gardoit soigneusement; & si-tost que Dionysophanes apperceut un petit mantelet d'escarlate avec une boucle d'or, & une petite espée à manche d'yvoire, il s'escria à haulte voix: O Jupiter! & appella sa femme pour les veoir aussi. Si-tost qu'elle les vit, elle s'escria semblablement, en disant: O fatales Déesses! ne sont-ce point icy les joyaux que nous exposâmes avec nostre enfant, quand nous l'envoyâmes exposer par notre servante Sophrosine? Il n'y a point de faulte, ce sont ceux mesmes, mon mary, l'enfant est nostre. Daphnis est vostre filz, & garde les chevres de son propre pere. Ainsi qu'elle parloit encore, & que Dionysophanes jettant grande abondance de larmes de la grande joye qu'il avoit, baisoit ces enseignemens de reconnoissance, Astyle entendant que Daphnis estoit

son frere , posa viftement fa robe , & s'en courut au Berger pour le baifer le premier. Daphnis le voyant venir à luy avec tant de gens & fi grand bruit , & cuydant que ce fust pour le prendre , jetta fa flufte & fa pennetiere , & fe mit à courir vers la mer pour fe jetter dedans du hault du rocher. Et peut-efre Daphnis fraifchement retrouvé , auroit-il enfin pery par ce cas efrange , fi Aftyle s'eftant apperceu de la caufe de fa fuite , ne luy euft crié de tout loing : Arrefte , Daphnis , n'aye point de peur , je fuis ton frere , & ceux que tu as pensé jusques ici eftre tes maiftres , font tes pere & mere. Lamons nous a maintenant conté comme une chevre t'a nourry , & nous a monftre les enfeignes aufquelles on t'a recongneu ; regarde feulement en te retournant vers nous comment chacun va après toy en riant , mais viens-moy baifer le premier ; je te jure , par les Nymphes , que je ne te ments point. A peine s'arresta Daphnis quand il eut ouy ce ferment , & attendit Aftyle qui accouroit les bras tendus pour l'embraffer & le baifer. Cependant les ferviteurs & chambrieres de la maifon , le pere mefme & la mere accoururent , qui l'embrafferent & le baiferent en plorant de joye , & lui de fon costé fit auffi

principalement feste à son pere & sa mere, comme s'il les eust jà long-temps congneuz, & les tint embrassez fort longuement. A peine les pouvoit lascher, tant la nature se fait croire aisément; de sorte qu'il oublia presque Chloé, tant il fut espris de joye & de lieffe. Si le remena-t'on au logis, & lui bailla-t'on une belle & riche robbe neuve; puis estant vestu fust assis joignant son pere, qui luy commença un tel propos: Mes enfans, je fuz marié bien jeune, & après quelque temps devins pere bien heureux, comme il me sembloit pour lors, car le premier enfant que ma femme fist, fust un filz; le second une fille; & le troisieme fut Astyle. Je pensai en avoir assez de ces trois, & fis exposer cestuy petit enfant de maillot, qui estoit venu après tous, avec ces joyaux que je lui baillay, non pas en intention de le retrouver, & le recongnoistre un temps advenir, mais afin que celui qui le trouveroit eust de quoi l'ensevelir. Toutefois fortune en avoit autrement disposé; car mon filz aîné & ma fille moururent tous deux d'une mesme maladie & en un mesme jour; & toy, mon filz, par la bonne providence des Dieux es eschappé, à celle fin que nous eussions plus de support en nostre vieillesse.

Si te prie, mon filz Daphnis, que tu n'ayes point de maltalent encontre moy, pource que je t'ay fait exposer, car je ne l'ai point fait volontairement. Et toy, Astyle, ne sois point marry de ce que tu n'auras que la moitié de ma succession, là où tu esperois avoir le tout; car tout bien considéré, il n'y a héritage au monde qui vaille un bon frere. Pourtant aimez-vous l'un & l'autre, car quant aux biens vous en avez assez, voire pour estre comparez aux plus riches de ce pays: je vous laisseray grandes terres, grand nombre de serfs, qui scavent tous quelque mestier, de l'or, de l'argent, & tous autres meubles autant qu'en scauroyent avoir ceux que l'on estime bienheureux; mais je veux que Daphnis en son partage ait entr'autres choses cest héritage-cy, & que Lamon & Myrtale soyent à luy, & les chevres aussi qu'il souloit mener paistre. Comme il parloit encore, Daphnis sauta en piedz, & dit: Vous m'en avez fait souvenir tout à point, mon pere, je m'en vas mener boire mes chevres, lesquelles endurent grande soif, & sont maintenant quelque part à attendre le son de ma fluste, pendant que je suis icy à ne rien faire. Toute l'assistance se print à rire à bon escient de ce que Daphnis estant devenu maistre,

cuydoit en coreestre varlet : mais on envoya quelque autre pour gouverner & traicter ses chevres , & fit-on préparer au logis le sacrifice & le festin en l'honneur de Jupiter Sauveur. Mais Gnathon ne s'osa trouver au banquet , ains demoura tout le long du jour caché en la chapelle de Bacchus , tenant l'autel comme un suppliant qui s'enfuit en franchise , pour la peur qu'il avoit de Daphnis. Le bruit fut incontinent espandu partout que Dionysophanes avoit retrouvé & recongneu un sien filz , & que Daphnis le chevrier estoit devenu seigneur & maistre de ses chevres , & de tout l'héritage : à l'occasion de quoi tous les voisins payfans y accoururent de toutes parts ; les uns pour se conjoüir avec Daphnis de la bonne fortune qui luy estoit advenuë , les autres pour faire quelques presens à son pere. Le premier qui y vint , entre les autres , fut Dryas , le nourrisier de Chloé , & Dionysophanes les retint tous pour estre au festin , car il faisoit apprester force pain , force vin , & force viande , des oyseaux de mer , des petitz cochons de laiçt , & force moutons que l'on avoit immolez aux Dieux patrons & protecteurs du pays. Daphnis, d'autre costé, amassa tous les meubles qu'il avoit , pendant qu'il gardoit

gardoit les bestes , & les distribua tous aux Dieux : premierement , il donna à Bacchus sa pennetiere & sa peau de chevre aussi : puis fist offrande de sa fluste à Pan ; il dédia sa houlette aux Nymphes , avec les tirouërs à tirer les chevres , qu'il avoit faicts luy-mesme. Mais en faisant chacune offrande , il ne se pouvoit tenir de plorer , tant est plus doux un estat , pour petit qu'il soit , quand on l'a accoustumé , qu'une félicité non accoustumée , pource qu'il se deffaissoit des meubles à quoy il avoit prins si grand plaisir ; de sorte que quand il vint à offrir ses tirouërs , il voulut encore premierement y tirer ses chevres , & ne donna point sa pelice de peau de chevre , qu'il ne l'eust encore un coup vestue , ny sa fluste qu'il n'en eut joué , & si les baïsa tous en les donnant , & dit adieu à ses chevres , & appella les boucquins par leurs noms , & bien souvent se desroba pour aller boire de l'eau de la fontaine , dont il avoit beu si souvent avec Chloé : mais il n'osoit encore descouvrir son amour , attendant quelque occasion propre pour ce faire. Or cependant que Daphnis estoit après ces oblations & sacrifices , voicy comment il alla de Chloé. La pauvre fille estoit seulette aux champs , assise en gardant ses

moutons, & ploroit chauldement, en disant ce qui est vraysemblable, que peut dire une pauvre bergerotte comme elle : Daphnis m'a oubliée, il prétend maintenant à quelques riches mariages ; pourquoy lui ay-je fait jurer ses chevres, au lieu des Nymphes ; il les a délaissées aussi-bien comme moi, & n'a point eu de désir de voir Chloé, en sacrifiant aux Nymphes & à Pan : il a, par adventure, trouvé avec sa mere de plus belles chambrières que moy ; & bien de par Dieu, bon prou luy face : mais quant à moy, je ne scaurois plus vivre. Ainsi qu'elle pensoit & disoit telles choses, le bouvier Lampis, avec quelques autres rustaux de village, la vindrent enlever, espérant que Daphnis ne penseroit plus à l'espouser, & que Dryas, ayant de l'amitié pour lui, la lui donneroit volontiers pour sa femme. La pauvre fille crioit piteusement tant qu'elle pouvoit ainsi comme on l'emportoit ; & quelqu'un qui vit ceste violence, s'encourut viftement en avertir Napé, & elle Dryas, & Dryas Daphnis, lequel à peine qu'il ne sortit du sens, car il ne l'osoit descouvrir à son pere, & si ne pouvoit supporter un tel outrage. Si se retira dedans le verger, & là se pourmenant tout seul, fit ses regrets & ses plaintes

en ceste sorte : Oh malheureux que je suis d'avoir retrouvé mes parens ! Hélas , combien m'eust esté meilleur de garder les bestes aux champs ! Combien plus estois-je content , lors qu'estant serf je voyois Chloé à mon ayse ; & maintenant Lampis , qui l'a ravye , s'en va à tout ; puis quand la nuit sera venue il couchera avec elle , cependant que je m'amuse ici à boire & à faire bonne chere : j'ay doncques en vain juré mes chevres , le Dieu Pan , & les Nymphes. Or Gnathon , qui estoit caché dedans la chapelle du verger , entendit clairement ces complaints de Daphnis , & pensant que c'estoit une bonne occasion pour faire sa paix avecque luy , il prit quelques jeunes varletz d'Astyle , & s'en alla après Dryas , luy disant qu'il les conduisist en la maison de Lampis , ce qu'il fit , & diligenterent si bien qu'ilz surprinrent Lampis ainsi comme il ne faisoit que d'entrer en son logis avec Chloé , laquelle il luy osta entre les mains à force , & dola très-bien les espaules de tous les rustaux qui luy avoyent aydé à faire ce rapt , à grands coups de baston , puis voulut prendre & lier Lampis pour l'amener prisonnier , mais il se sauva de vîtesse. Gnathon ayant fait un tel exploit , s'en retourna qu'il

estoit jà nuict toute noire , & trouva Dionysophanes jà couché en son lit dormant. Mais le pauvre Daphnis veilloit , & estoit encore dedans le verger , où il se desconfortoit & ploroit : si luy amena Chloé , & la luy livrant entre ses mains , luy conta comme il avoit fait , le priant au surplus de ne se vouloir point souvenir des paroles qu'il lui avoit dictes , ains le tenir au nombre de ses serviteurs , & ne le vouloir point débouter de sa table , sans laquelle il luy seroit force de mourir de male-faim. Daphnis voyant Chloé , & la tenant entre ses bras , fut facile à faire appointment avecque luy , & fit ses excuses envers elle de ce qu'il pouvoit sembler l'avoir oubliée ; & de commun consentement , furent d'avis de ne point encore déclarer leur mariage ; que Daphnis continueroit de veoir Chloé en secret , & qu'il ne descouvriroit son amour qu'à sa mere : Mais Dryas ne le permit point , ains le voulut dire luy-mesme au pere de Daphnis , se faisant fort de luy faire bien accorder. Si prit le lendemain (aussi-tost qu'il fut jour) les enseignes de recongnissance qu'il avoit trouvées avec Chloé , & s'en alla vers Dionysophanes , qu'il trouva dedans son verger assis avec Cleariste sa femme , & ses deux

enfans Astyle & Daphnis, si luy commença à dire : Nécessité me contrainct de vous déclarer, Sire, un pareil secret que celui de Lamon, lequel je n'ay encore dict à personne ; c'est que je n'ay engendré, ne nourry le premier ceste jeune fille Chloé ; autre que moy l'a engendrée, & l'une de mes brebis l'a allaitée dedans la caverne des Nymphes, où elle avoit esté exposée, & là où je l'ay moy-mesme trouvée, & depuis nourrie & eslevée jusques icy : sa beauté tesmoigne assez qu'elle n'est point ma fille, car elle ne ressemble ny à moy, ny à ma femme ; aussi font les enseignes de recongnissance que je trouvoy avec elle, lesquelles sont plus riches que ne porte l'estat d'un pauvre pasteur ; voyez-les & cherchez ceux qui sont ses vrais parens, pour veoir si elle seroit point sortable pour femme de Daphnis. Dryas ne jeta point ceste parole en vain, ny Dionysophanes ne la y receut pas aussi, ains prenant garde au visage de Daphnis, & le voyant changer de couleur & se destourner pour plorer, congneut bien incontinent qu'il y avoit des amourettes entre eux deux, & estant soigneux de son filz plus que de la fille d'autruy, examina le plus diligemment qu'il peut la parole de Dryas : & quand

encore il eut veu les marques de recongnof-
fance qui avoyent esté exposées avec elle,
c'est à ſçavoir des patins dorez, des chauffes
brodées, & une coëffe d'or, adonc appella-
t'il Chloé, & luy dict qu'elle fiſt bonne che-
re, pource que à elle avoit trouvé un ma-
ry, & bien-toſt après trouveroit ſon vray
pere & ſa mere. Cleariſte dès-lors la prit
avec elle, la veſtit, & accouſtra comme fem-
me de ſon filz, mais Dionyſophanes appel-
la Daphnis à part, & luy demanda ſi elle
eſtoit encore pucelle. Daphnis luy jura
qu'elle ne luy avoit rien eſté de plus près
que du baiſer, & du ſerment par lequel ilz
avoyent promis mariage l'un à l'autre. Dio-
nyſophanes ſe priſt à rire de ce ſerment,
& les fiſt tous deux diſner avec luy. Là
euſt-on peu clairement veoir combien un
bel accouſtrement fert à naturelle beauté;
car Chloé eſtant richement veſtue, propre-
ment coëffée, & monſtrant au viſage un
teint de guaye penſée, ſembla à chacun
ſi belle par-deſſus le paſſé, que Daphnis
meſme à peine la reconnoiſſoit, & quicon-
que l'euſt veue en tel eſtat, n'euſt point
faict de doubte d'affirmer par ſerment qu'elle
n'eſtoit point fille de Dryas, lequel toute-
fois eſtoit à la table comme les autres avec

sa femme Napé, & Lamon & Myrtale aussi. Quelques jours après on fist derechef des sacrifices aux Dieux, pour l'amour de Chloé, comme l'on avoit faict pour Daphnis, & fist on semblablement le festin de la reconnoissance; & elle de son costé distribua ses meubles de bergerie aux Dieux, sa pennetiere, sa fluste, & les tiroüers où elle tiroit les brebis; espendit dedans la fontaine, qui estoit en la caverne des Nymphes, du vin à cause qu'elle avoit esté trouvée & nourrie auprès d'icelle fontaine, & sema des chapeletz, & bouquetz de fleurs sur la sépulture de la brebis, que Dryas lui enseigna, & joüa encore de sa fluste pour resjouir ses brebis, faisant prieres aux Nymphes que ceux qui seroient trouvez ses naturelz parens, fussent dignes d'estre alliez de Daphnis. Après qu'ilz eurent fait assez de festes & de bonne chere aux champz, ils delibererent de s'en retourner à la ville, afin de chercher les parens de Chloé, pour ne differer plus les nopces: parquoy dès le matin firent trouffer tout leur bagage, & donner à Dryas encore autres trois cens escuz, & Lamon la moitié des fruits de toutes les terres & vignes qu'il tenoit, les chevres avec leurs chevriers, quatre paires de bœufz, des robes fourées pour

l'hiver, & par-dessus tout cela liberté: puis cheminerent vers Mitylene avec grand train de chevaux & de chariotz. Or ce jour-là, pource qu'ilz arriverent le soir bien tard, les autres citoyens de la ville n'en sçurent rien. Mais le lendemain au plus matin, le bruit en estant couru par tout, il s'assembla au logis de Dionysophanes grande multitude d'hommes & de femmes, les hommes pour s'esjoüyr avec le pere de ce qu'il avoit retrouvé son filz, mesmement après qu'ilz eurent veu comment il estoit beau & gentil; & les femmes pour s'esjoüyr aussi avec Cleariste de ce que non-seulement elle avoit recouvré son filz, mais aussi trouvé une fille digne d'estre sa femme; car Chloé les estonna toutes quand elles virent en elle une si parfaite beauté, qu'il n'estoit possible d'en veoir une plus belle: brief, toute la ville ne parloit d'autre chose que de ce jeune filz, & de ceste jeune fille, & disoit chacun que l'on n'eust sçeu choisir une plus belle couple: si prioient tous aux Dieux que la parenté de la fille fust trouvée correspondante à sa beauté; y eut plusieurs femmes de riches maisons, qui souhaiterent en elles-mesmes, & dirent: Pleust aux Dieux que l'on pensast assurément qu'elle fust ma fille.

Mais Dionysophanes, après avoir quelque espace de temps pensé à ses affaires, se rendormit bien ferré sur le matin, & en dormant luy vint un tel songe, qu'il luy fut advis que les Nymphes prioient Amour de parfaire & accomplir à la fin le mariage qu'il leur avoit promis, & qu'Amour debendant son petit arc, & le mettant à terre auprès de son carquois, commanda à Dionysophanes qu'il envoyast le lendemain semondre tous les plus gros & plus riches personnages de la ville, pour venir soupper en son logis; & quand on seroit au dessert, qu'il fist apporter sur la table les enseignes de recongnissance qui avoyent esté trouvées avec Chloé, & qu'il les monstrast à tous les conviez, puis cela fait, qu'ilz chantassent la chanson nuptiale de Hymenée. Dionysophanes ayant eu ceste vision en dormant, se leva de bon matin, & commanda à ses gens que l'on preparast un beau festin, où il y eust de toutes les plus délicates viandes que l'on trouve tant en terre qu'en mer, ès lacz & ès rivieres, & envoya quand & quand prier de soupper chez luy tous les plus apparentz de la ville. Quand la nuict fut venue, que le banquet fut achevé, l'on apporta sur table la coupe en laquelle on a accoustumé,

à la fin du festin, de boire en l'honneur de Mercure, & lors un serviteur de la maison apporta dans un bacin d'argent ces enseignes, & les monstra de rang à chacun des conviez; il n'y eust personne des autres qui les recongneust, fors un nommé Megacles, qui pour sa vieilleffe estoit au bout de la table, lequel si-tost qu'il les apperçeut, les recongneust incontinent, & s'escria tout hault: O dieux, que vois-je-là? Ma pauvre fille, qu'es-tu devenuë? Es-tu en vie, ou si quelque pasteur a enlevé ces enseignes, qu'il a par fortune trouvées en son chemin? Je te prie, Dionysophanes, de me dire dont tu les as recouvrees: n'ayes point d'envie que je trouve ma fille comme tu as retrouvé Daphnis. Dionysophanes voulut premièrement qu'il contast devant la compagnie comment il avoit fait exposer son enfant. Adonc le vieillard Megacles, d'une voix encore vigoureuse, se print à dire: Je me trouvay il y a quelque temps avec peu de biens, pource que j'avois despensé les miens à faire joier des jeux publics, & à faire esquiper des navires de guerre, & lors que ceste perte m'advint, il me nasquit une fille, laquelle je ne voulus point nourrir en la pauvreté où j'estois, & pourtant la fis exposer avec ces

marques de reconnoissance, ſçachant qu'il y a plusieurs gens, qui ne pouvant avoir des enfans naturels, deſirent eſtre peres en ceſte ſorte, à tout le moins d'enfans trouvez. L'enfant fut porté en la caverne des Nymphes, & laiſſée en la protection & ſauvegarde d'icelles : depuis les biens me ſont venuz par chacun jour en grande affluence, & n'ay nul heritier de mon corps à qui je les puiſſe laiſſer, car depuis je n'ai pas eu l'heur de pouvoir avoir une fille ſeulement : mais les Dieux, comme s'ilz ſe vouloyent mocquer de moy, m'envoyent ſouvent des ſonges, leſquelz me promettent qu'une brebis me fera pere. Dionyſophanes à ce mot ſ'eſcria encore plus fort que n'avoit fait Megaclès, & ſe levant de la table, alla querir Chloé, qu'il amena veſtuë & accouſtrée fort honneſtement, & la mettant entre les mains de Megaclès, luy diſt : Voicy l'enfant que tu as fait expoſer, Megaclès ; une brebis, par la providence des Dieux, te l'a nourrie, comme une chevre m'a nourri Daphnis ; prens-la avecque ſes enſignes, & la prenant, rebaille-la en mariage à Daphnis : nous les avons tous deux expoſez, & tous deux les avons retrouvez : ilz ont eſté tous deux nourris enſemble, & tout de meſmes

ont esté reservez par les Nymphes , par le Dieu Pan , & par Amour. Megacles s'y accorda incontinent , & envoya querir sa femme , qui avoit nom Rhode , tenant cependant tousjours sa fille Chloé entre ses bras , & demourerent tous deux chez Dionysophanes au coucher , pource que Daphnis avoit juré qu'il ne souffriroit emmener Chloé à personne , non pas à son propre pere. Et le lendemain au matin ilz prièrent tous les deux leurs peres & meres qu'ilz leurpermissent de s'en retourner aux champs , pource qu'ilz ne se pouvoient accoustumer aux façons de faire de la ville , & aussi qu'ilz vouloyent faire des nopces pastorales , ce qui leur fut permis. Si s'en retournerent au logis de Lamon , & presenterent au bonhomme Megacles le nourricier de Chloé Dryas ; & sa femme Napé à la mere Rhode. Le festin nuptial fut somptueusement préparé , & Megacles derechef devoüa sa fille Chloé aux Nymphes , & outre plusieurs autres offrandes , leur donna les enseignes auxquelles elle avoit été recongneüe , & donna encore bonne somme d'argent à Dryas. Dionysophanes , pource que le jour estoit beau & ferein , fit dresser des tables dedans la caverne mesme des Nymphes , & fist faire



[Faint, illegible handwritten text]




des sieges de verde ramée, là où il festoya tous les payfans de là à l'entour. Lamon & Myrtale y estoient, D'ayas & Napé, les parents de Dorcon, les enfans de Philetas, Chromis & Lycœnion. Lampis mesme y vint après qu'on luy eust pardonné; & là, comme entre villageois, tout s'y disoit & faisoit à la villageoise: l'un chantoit les chansons que chantent les moissonneurs au temps des moissons; l'autre disoit des brocards que l'on a accoustumé de dire en foulant la vendange. Philetas joua de sa fluste, Lampis du flageolet: & cependant Daphnis & Chloé se baisoyent l'un l'autre. Les chevres mesmes paissoient là auprès comme si elles eussent esté participantes de la bonne chere des nopces; & Daphnis en appellant aucunes par leurs propres noms, ce qui ne plaisoit pas à ceux venuz de la ville, leur donnoit la feillée verde à brouter, & les prenant par les cornes les baisoit, & non pas lors seulement, mais en tout le reste de leur vie passerent le plus de temps & la meilleure partie de leurs jours en estat de pasteurs: car ilz acquirent force troupeaux de chevres & de brebis, eurent toujours en singuliere révérence les Nymphes & le Dieu Pan, & ne trouverent point à leur goust de meilleure

viande, ny plus favoureuse nourriture que du fruit & du lait ; & qui plus est , firent tetter à leur premier enfant , qui fut un filz , une chevre ; & au second , qui fut une fille , firent prendre le pis d'une brebis , & le nommerent Philopœmen , c'est-à-dire , ayant les bergers ; & la fille Agelée , qui signifie prenant plaisir aux troupeaux. Mais outre tout cela firent honorablement accoustrer la caverne des Nymphes ; ilz y dédièrent de belles images , & y édifierent un autel d'Amour Pastoral ; & à Pan , au lieu qu'il estoit à descouvert sous un pin , firent faire un temple qu'ilz appellerent le temple de Pan le Guerroyeur ; mais tout cela fut fait long-temps après. Et ce jour-là , quand la nuit fut venue , tout le monde les convoya jusques en leur chambre nuptiale , les uns joiant de la fluste , les autres du flageolet , & aucuns portans des fallotz & flambeaux allumez devant eux ; puis quand ilz furent à l'huis de la chambre , commencerent à chanter Hymenée d'une voix rude & aspre , comme si avecque une marre ou un pic ilz eussent voulu fendre la terre. Cependant Daphnis & Chloé se coucherent nudz dans le lit , là où ils s'entrebaïserent & s'entr'embrasserent , sans clore l'œil de

toute la nuit , non plus que chahans ;
& fist alors Daphnis ce que Lycœnion luy
avoit appris : à quoy Chloé congneut
bien que ce qu'ilz faisoient paravant dedans
les bois , & emmy les champs , n'estoyent
que jeux de petitz enfans.

F I N.



NOTES
SUR
LES AMOURS
DE
DAPHNIS ET CHLOÉ.

LIVRE PREMIER.

P Age 9. ligne 20. *Ce qu'ilz voyoient.*]
Amyot avoit oublié, *Ce qu'ilz voyoient;*
των ἀκρομένωι καὶ βλεπομένων. Le tour de cette phrase est un peu différent dans le Grec : pour le traduire littéralement, il auroit fallu dire : *Cette joie se trouvant répandue par tout, les vieux & les jeunes se mirent à imiter ce qu'ilz entendoient & ce qu'ilz voyoient, &c.* Toute la tirade qui suit, regarde les bergers en général, & le discours ne devient particulier pour Daphnis, qu'à ces mots, *Souventefois Daphnis, &c.*

Pag. 12. l. 5. *Qui encore étoit si aspre à le*

L

poursuyvre après l'avoir battu.] Ces mots, qui ne font point dans le Grec, ont été ajoutés par Amyot.

Ibid. l. dern. *Et le donna au bouvier, pour en tendre un des bouts à Daphnis.*] Amyot avoit mis, *délia le cordon dont les tresses de ses cheveux étoient liées pour en tendre un des bouts à Daphnis.* Dans le Grec il y a, *δίδωσι καθείναι τῷ βυκόλῳ.* C'est conformément à cela qu'on a mis dans cette édition, & *le donna au bouvier, &c.*

Pag. 13. l. 5. *Ilz le mirent hors du piège.*] Après ces mots, on trouve dans l'édition d'Amyot une lacune, de laquelle on avertit le Lecteur ainsi : *En cest endroit il y a une grande omission dans l'original.* Le discours n'est repris qu'à ces mots : *Daphnis alloit ainsi devisant, &c.* Ce qui se trouve dans l'édition du sieur Coustelier, pour remplir ce vuide, est pris en partie de Marcassus, pag. 29. 30. & 31. Mais outre que la naïveté qui regne dans tout le reste du Roman n'est pas soutenue dans ce qu'ils ont voulu suppléer, il ne suffit pas d'ailleurs pour remplir tout ce qui doit manquer par cette lacune. Car, par exemple, il paroît que Dorcon avoit donné un veau, peut-être à Daphnis, peut-être aussi à Chloé, (pag. 13.) que Daphnis avoit

eu quelque avantage, ô *mauvaise victoire*, (*ibid.*) cette victoire pouvoit être un baiser de Chloé, baiser qui fut la cause de l'amour de Daphnis : comme le bain de Daphnis fut celle de l'amour de Chloé : *L'un que son mal estoit venu d'un baiser, & l'autre d'un baigner*, (pag. 19.) que Dorcon avoit déjà proposé de se marier avec Chloé, avant qu'il en parlât à Dryas ; & que lorsque celui-ci le renvoya, ce fut pour la seconde fois qu'il se vit frustré de son espérance (pag. 15.) Que Dorcon avoit montré à Daphnis un air sur la flûte, que Daphnis avoit ensuite montré à Chloé (pag. 27.) Tout cela devoit être dans la lacune, & n'est point suppléé par ce que les éditions de Marcaffus & de Coustelier ont ajouté. Voici ce qu'on a fait dans cette nouvelle édition. On s'est contenté de traduire ce qui se trouve dans le Grec de Jungerman, de plus que dans le Français d' Amyot : *Puis après avoir tiré le bouc jusqu'à ces mots, il lui donna sa pennetiere & son sayon à garder*, auxquels on a fini, parce que le Grec ne va pas au de-là, & qu'on n'a pas voulu hazarder de coudre un centon de mauvaise étoffe, tel qu'auroit pu être ce qu'on auroit imaginé, avec un morceau d'étoffe précieuse, comme est l'original de Longus.

Pag. 14. l. 12. *Avant que de me baiser, &c.*] Dans Amyot il y a , *avant que de me baiser, il faut dire que non, car j'en fusse mort* ; c'est un contrefens qui est corrigé en mettant conformément au Grec , *mais comment n'en est-e'le point morte ?* πῶς ἔν' ἔκ ἀπεθανεν.

Ibid. l. 23. *Paroïstra.*] Amyot avoit mis, *deviendra* ; il y a dans le Grec , ὀφθίσεται. *Paroïstra* qui est mieux.

Pag. 15. l. 2. *Lui fait présent de beaux fromages gras.* Dans le Grec il y a : Dorcon vint à Dryas avec des fromages & des flûtes de noces , & lui fit présent des fromages. On a négligé d'exprimer ces flûtes de noces , cela n'a pas paru de conséquence.

Ibid. l. der. *Délibéra, puisqu'autrement ne pouvoit.*] *Puisqu'autrement ne pouvoit* n'est pas dans le Grec : il auroit mieux valu traduire ainsi ce passage : *il délibéra de jouir par force de Chloé, lorsqu'il la trouveroit seule.* Εἴγνω δὲ ἀχειρῶν ἐπιθεῖσθαι τῇ Χλοῇ μόνῃ γενομένη.

Pag. 19. l. 22. *Ce qu'ilz souhaitoyent les inquietoit.*] Amyot avoit mis : *Ilz se doutoyent pour ce qu'ilz le vouloyent, quand tout est dict, ils ne sçavoyent qu'ils vouloyent, cela seulement sçavoyent, &c.* A peine peut-on entendre ce passage ; on ne sçait ce que veut dire, *quand tout est dict.* On l'a rectifié dans

cet endroit suivant le Grec, ἡλγίου ἑθελοντί-
 ἡγνὸ οὐν ὃ, τι θεέλουσι τοῦτο μόνον, &c. *Ce qu'ils
 souhaitoyent les inquietoit, & ils ne sçavoient
 ce qu'ils souhaitoyent, cela seulement, &c.*

P. 20. l. 6. *Et soefve odeur.*] Le Grec ajoû-
 te τερπνὴ δ' ἐποιμύων βληχὴ : *Le bestement des
 brebis estoit gracieux.* On a oublié dans tou-
 tes les éditions de rendre ces paroles de l'o-
 riginal.

Ibid. l. II. *Les bestes amoureuses, &c.*] *Les
 pommes amoureuses se laissoient d'elles-mesmes
 tomber par terre.* C'est ainsi qu'Amyot a tra-
 duit, καὶ τὰ μῆλα ἑζῶντα πίπτιναμαί. C'est
 un contresens manifeste : s'il avoit entendu
 μῆλα, *pecora*, il auroit mis, comme on a
 fait dans cette nouvelle édition, *les bestes
 amoureuses, &c.*

Ibid. l. 23. *Demouroit.*] Amyot a mis pres-
 que tous les verbes qui suivent à l'aoriste :
 ils sont mieux à l'imparfait, la narration le
 demande.

Pag. 24. l. 26. *Il se mit à chanter plus for-
 tement, &c.*] Dans Amyot il y a : *Il se mist
 à chanter si doucement & si mélodieusement,
 qu'il attira, &c.* Cela n'est pas conforme au
 Grec, qui dit, μείζονα ὡς ἀνῆβ ἠδείαν ὡς παῖς
 φωνῆν, &c. Cela signifie littéralement : *Il fit
 éclater une voix plus forte comme étant masle,*

mais douce comme étant jeune , & par là attirera les huit meilleures vaches. On a rendu en partie ce sens dans cette édition.

Pag. 25. l. 6. *Plustot que de retourner.*] *Plustot* est ici au lieu de *avant*, πρὶν ὀικαδῆ ἀφικέσται.

Pag. 26. l. II. *Ains l'entraînerent dedans leur fuste.*] Amyot a traduit ainsi cet endroit : *ains rentrerent dans leur fuste* : c'est un contresens, κατῆγον εἰς τὴν ναῦν : *ad navem traxerunt*, l'entraînerent dans leur barque. C'est ainsi qu'on l'a corrigé.

Pag. 27. l. 6. *Comme le boucher feroit un bœuf.*] Il n'y a pas dans l'original, *comme le boucher feroit*, il y a seulement, *m'ont découpé comme un bœuf*.

Pag. 28. l. 4 & 5. *Et toutes d'une secousse, &c.*] *Et toutes d'une secousse se jetterent dedans la mer, le sault desquelles pource qu'elles se jetterent toutes à coup dans la mer, le sault sur l'un des costez de la fuste fut si pesant & si lourd, avecques ce que la tourmente y ayda un petit, que la fuste en tourna sens dessus-dessous.* Amyot. Cela est plus embarrassé, représente moins bien l'aventure, & est moins conforme à l'original, que ce qu'on a mis dans cette édition. *Violento autem insultu alterum in latus navis facto, exque casu boum pro-*

fundo mari dehiscente navis vertitur. καὶ ἐκ τῆς ἐμπτώσεως τῶν βοῶν κοιλῆς τῆς θαλάττης διαστασῆς, στρέφεται, &c. Il n'est point ici question de tourmente, la mer s'entrouvre par la chute des vaches.

Pag. 29. l. 23. *Siles Cornes de leurs piedz ne s'amolissoyent dans l'eau.*] Dans Amyot il y a : *Si leurs piedz ne s'accrochoyent en nageant à quelque chose dans l'eau.* Ce n'est pas ce que dit le Grec : εἰ μὴ τῶν χιλῶν οἱ ὄνυχες περιπέσοιεν διαβροχοὶ γενόμενοι : *nisi unguulorum ungues penitus humore emolliti circumdecidant.*

Pag. 30. l. 22. *Et quant & quant pour la premiere fois.*] Amyot en traduisant, *Et quant & quant lava aussi son beau corps*, a oublié la circonstance essentielle, qui est dans le texte, *que ce fut pour la premiere fois en presence de Daphnis*, καὶ αὐτὴ τότε πρῶτον Δάφνιδος ὄρωντος ἐλουσατο τὸ σῶμα. On l'a ajouté dans cette édition.

LIVRE SECOND.

PAge 37. l. 15. *Par chacun jour.*] Il y a dans le Grec, *tous les matins*, τὸ ἑωθρινόν.

Pag. 39. l. 23. *Plus anciens que le vieil Saturne,* &c.] *Plus ancien que le vieil Saturne,*

& que de toute ancienneté. Amyot. Que de toute ancienneté, ne s'entend pas : le Grec dit, & mesme que tout le temps.

Pag. 40. l. 17. *Si tu ne verras.*] Il y a dans Amyot, *Si tu ne verras pas.* Ce ne fait un contresens ; on l'a ôté.

Ibid. l. 21. *Et te réputes bienheureux. &c.*] Le texte dit seulement, *Et toi seul entre les hommes, resjoûis-toy en ta vieillesse.* Tout le reste est une addition d'Amyot, qu'il auroit fallu ôter. L'amour qui parle ne doit point parler de lui-même à la troisième personne, de cest enfant.

Pag. 42. l. 17. *Pitys.*] C'est *Pinus*, Nympe qui a donné son nom au Pin, en qui elle fut changée.

Pag. 44. l. 20. *Aussitost qu'ilz se virent.*] Il y a dans le Grec, ἐφίλησαν μὲν ἀλλήλους ἰδόντες : *osculis se mutuo conspectos invaserunt.* Amyot avoit oublié ce *aussitost qu'ilz se virent* ; il est cependant nécessaire, & marque mieux leur empressement.

Pag. 45. l. dern. *Mais le troisième, &c.*] Amyot a omis ces mots, *Daphnis n'osant point en parler*, qui sont dans le Grec, μήτε τοῦ Δάφνιδος τολῶντος εἰπεῖν.

Pag. 47. l. 12. *Partout seur abbord.*] Ces mots qui sont inutiles ici, puisqu'ils ne sont

à proprement parler qu'une répétition de ce qui est dit un peu auparavant : *partout bon abryt pour s'y retirer*, ne sont point aussi dans le Grec, il y a seulement, πάντα ἐνοικῆσαι καλὰ : *tout y est beau pour le séjour.*

Pag. 53. l. 15. *Se ruerent sur eux.*] Il y a dans le Grec, *se ruerent sur eux, comme des estourneaux ou des geais.*

Pag. 64. l. 9. *Bryaxis.*] C'est ainsi que l'original le nomme, & non pas *Briaxia* ou *Briaxa.*

Pag. 65. l. 9. *De deffoubz le tillac.*] Il y a dans le Grec, ἐν κούρῃ νηὶ : *in cavâ navi, à fond de cale.*

Pag. 72. l. 2. *Puis diminuant petit à petit, &c.*] Pour traduire littéralement le texte, il auroit fallu dire : *Puis diminuant de sa force peu à peu, il changea son jeu en un plus gracieux; & en leur montrant tout l'art de la bonne musique, il tira le son qui convenoit au troupeau de bœufs, celui qui plaisoit aux chevres, celui qui estoit agréable aux brebis. Celui des brebis estoit gracieux, celui des bœufs fort; celui des chevres aigu : ainsi une seule fluste imitoit les sons de toutes les flustes. Ce passage ainsi corrigé auroit été plus vif, & en auroit ôté ces mots inutiles, pour bien mener & faire paistre les bestes aux champs.*

Pag. 73. l. 17. *En tira un son languissant, &c.*] Traduction d'Amyot: *En sonna un chant piteux, comme d'un amoureux transi, comme d'un poursuivant, comme d'un qui sonne la retraite, & comme d'un qui va cherchant & rappelant quelque beste qu'il a esgarée, &c.* Amyot que nous venons de voir exprimer la différence des sons pour les troupeaux, a négligé de la faire sentir ici pour les différentes situations dont il parle, & en cela s'est éloigné du Grec. C'est conformément à ce texte que l'on a mis dans cette nouvelle édition, *En tira un son languissant, &c.* la différence est sensible.

Pag. 75. l. I. *Qu'il ne vivroit.*] Amyot a traduit mal *qu'il ne heuroit*; il y a dans le Grec, *μη ζήσεται*, *qu'il ne vivroit.*

Ibid. l. II. *De pourchasser les Nymphes Dryades.* Il y a dans Amyot; *de pourchasser les Nymphes Dryades, & de rompre la teste aux Epinelides.* On ne fait ce que c'est que *Epinelides* & leur rompre la teste: le Grec dit, *παύεται ὃ οὐδέποτε Δρυάσιν ἐνοχλῶν, καί ἐπὶ μηλ'σι Νύμφαις πράγματα παρεκῶν.* *Cessat præterea nunquam Dryadibus molestus esse, & sub malis sollicitare Nymphas.* C'est ainsi que Jungerman a lu & traduit ce passage, qui auroit dû être rendu en Français par, *Il ne cesse de*

tourmenter les Dryades, & de poursuivre les Nymphes (ou de donner beaucoup d'affaires aux Nymphes) dans les vergers. Pour excuser la traduction d'Amyot, il faut supposer qu'au lieu d'ἐπι μάλισι, *sub malis*, soubz les pommiers, cet Auteur a lu ἐπιμηλίσσι en un seul mot, qu'il a pris pour un adjectif, & que ne l'entendant point, il a imaginé celui d'*Epine-lides*. On a mieux aimé dans cette nouvelle édition supprimer ces quatre mots, qui au reste n'ajoutent rien au passage, que de décider entre Amyot & Jungerman.

Pag. 76. l. 6. *Et aux chevriers.*] Il y a dans Amyot, *Et aux chevres*: c'est une faute.

LIVRE TROISIEME.

Pag. 78. l. 21. *Par ceux que leurs Capitaines avoyent emmenez prisonniers.*] Il eût été plus court de traduire *par les prisonniers*: πρὸς τῶν ἐαλοκῶτων. Il y a faute dans Amyot en cet endroit.

Pag. 81. l. 5. *Toutes les fois qu'ilz manyoient la pennetiere.*] *Toutes les fois qu'ilz n'avoyent les pennetieres.* Amyot. C'est un contresens qui n'est pas dans le Grec. Il dit qu'ils étoient fâchés toutes les fois qu'il leur tomboit entre

les mains une pannetiere, de laquelle ils tiroient autrefois leur manger: ἐλύπει ὁ αὐτοῦς ἢ πήρα τις ἰλθοῦσα εἰς χεῖρας ἐξ ἧς ἦδιον. On y a suppléé en mettant ilz manyoient.

Pag. 87. l. 6. *Pensant baiser & embrasser Chloé.*] Il y a dans le Grec, ταῦτα παντα τοιεῖτ' Χλόην ὄνειροπολοῦμενος, rêvant que Chloé faisoit toutes ces choses, ou, rêvant qu'il faisoit toutes ces choses à Chloé.

Pag. 88. l. 26. *En les baisant tous, &c.*] Amyot a traduit, *En les baisant tous, fors que Chloé, de peur qu'il ne souillaſt son baiser.* C'est un contrefens, qu'on a corrigé sur le Grec dans cette édition. φίλησας αὐτοῦς προτέρους Χλόης, ἵνα τ' ἐκείνης φίλημα καταρόν μένη: *les baisant tous premier que Chloé, afin que son baiser luy restaſt pur & net.* Cela est bien plus naturel & plus tendre.

Pag. 90. l. 1. *Lesquelles leur respondoyent, &c.*] Cet endroit est inintelligible dans Amyot; voici sa traduction: *lesquels leur respondoyent de dedans les bois, commençant petit à petit à respondre leur chant ramage. Après un si long silence les brebis, &c.* On l'a corrigé conformément au Grec.

Pag. 92. l. 10. *En imitant les boucz.* Amyot a oublié ces mots qui sont dans le Grec: μιμούμενις τοὺς τράγους.

Pag. 96. l. 2. *Elle luy commanda de s'asseoir , &c.*] Amyot a supprimé tout cet endroit jusqu'à ces mots , *finy cest apprentissage* , sans avertir qu'il le supprimoit ; l'obscénité du passage lui tient lieu d'excuse. Ce que Marcassus a voulu suppléer à ce qui manquoit dans Amyot , ne mérite pas d'être adopté.

1^o. Il est très-différent du texte. 2^o. Il y ajoute des choses inutiles , par exemple , *le reste qui est une chose qui de tout temps a esté pratiquée parmi les hommes , & si l'on en excepte Daphnis , que personne n'a jamais ignoré , &c.* Tout ce verbiage qui n'est pas dans le Grec , ôte ce qu'il y a de vif. On l'a traduit dans cette édition littéralement ; on s'est abstenu seulement de rendre à la lettre ces mots : *μαθοῦσα ἐνεργεῖν δυνάμενον καὶ σφριγῶντα :* *animadvertens ipsum operari posse & arrigere :* on s'est contenté de mettre *le trouvant en estat* : Cela doit faire entendre le reste.

Pag. 97. l. 16. *Délibérant n'exiger rien de Chloé oultre le baiser.*] *Délibérant ne fascher point Chloé oultre le baiser.* Amyot. Cela ne veut rien dire : le Grec est plus clair , & cette nouvelle édition y est conforme.

Pag. 99. l. 17. *Comme le vent qui s'entonne dedans une fluste.*] Il y a dans le grec *ὡς ὄργανον.*

P. 100. l. 18. *Toutes belles & sçavantes en*

l'art de chanter.] Ces mots qui sont dans le Grec , ont été oubliés par Amyot.

Pag. 102. l. 18. *Se couchoyent ensemble , &c.*] Amyot dit, *couchoyent ensemble nuë à nud , en se couvrant d'une peau de chevre.* Il y a dans le Grec , ἐν δ' ἔρημα ἀγυὰς ἐπέσ' ἔραντο.

Pag. 110. l. 25. *Pour leur demander le jeune Daphnis en mariage.*] *Pour leur demander Daphnis en mariage , qui estoit une façon bien nouvelle.* C'est ainsi qu'Amyot a traduit cet endroit. Il y a dans le Grec , μέλων παρ' αὐτῶν τὸν καινότετον νυμφίον : *novissimum ab his petiturus sponsum.* Amyot n'a pas entendu καινότετον , & l'a rendu par , *qui estoit une façon bien nouvelle.* On sent assez que cela ne signifie rien. On l'a traduit dans cette édition par , *le jeune Daphnis.*

Pag. 112. l. 2. *Et les Nymphes.*] Amyot a oublié ces mots.

LIVRE QUATRIEME.

Pag. 118. l. dern. *Pins.*] Il y a dans Amyot *puis*; c'est une faute d'impression : πιτυς , *pinus.*

Pag. 120. l. 19. *Quy tomboyent en terre.*] *Quy tomboyent en terre tous les jours.* Amyot.

Tous les jours n'est pas dans le Grec , aussi est-il très-inutile.

Pag. 122. l. 14. *Eudrome.*] Εὐδρονον , qui court bien , ὅτι ἦν αὐτῷ ἄεθρον τρέχειν. Selon notre usage d'à-present , ce seroit un coureur & non un laquais.

Pag. 123. l. 18. & suiv. *Chloé se soulcyoit aussi* , &c.] On a conservé ici la traduction d'Amyot , quoiqu'elle ne rende pas bien littéralement les paroles de Longus , mais elle ne s'écarte pas du sens.

Page 124. l. 2. [*Lampis*] C'est ainsi que Jungerman l'a toujours appelé.

Pag. 125. l. 22. *Helas comment mes rosiers sont rompus ! &c.*] *Helas comment mes pauvres violliers sont foullez , mes pauvres œillets & rosiers sont arrachez ! c'a bien esté , &c.* Amyot. On a retouché cet endroit sur le Grec.

Pag. 129. l. 16. *Quand il creut s'estre rendu ce jeune garson obéissant.*] *Quand il vit que le jeune garson estoit doux & simple , faisant tout ce qu'on luy disoit , il espia , &c.* Amyot. Le Grec n'en dit pas tant : ὡς ὅ εἶχε χειρὸν δὴν *Postquam ergo eum se habere morigerum sensit , quand il creut se l'estre rendu souple , obéissant.*

Ibid. l. 20. *Qu'il se prestast à luy , &c.*] *Qu'il le laissast faire ce que ses boucs faisoient à ses chevres.* Amyot. Le Grec est plus ex-

pressif, εἶτα ὀπίσθεν παρασχεῖν τοῦτον οἶον αἰ
αἶγες τῆς τράλοισ; *Qu'il se prestast en la mesme
posture que les chevres avec les boucz.*

Pag. 134. l. 25. *Et ne m'appelleras plus le pe-
tit Gnaton, &c.] Et ne verras plus ton mignon
Gnaton comme tu soulois.* Amyot. Il y a dans
le gr. οὐδ' οὐκετι καλῖσεις Γναθωνάριον ὡς περ
εἰώθεις παιζω, αἰ: *Tu verò haud amplius me
vocabis Gnathomulum, ut assidue per jocum
soles.* Ainsi cette édition est plus littérale.

Page 135. l. 16. *Celuy qui aime, ô mon cher
maistre, &c.] Un homme de nature amoureuse
aime tout corps, où il trouve beauté, pourtant il
y en a qui aiment un arbre, une riviere, une
beste. Et quant à moy, il est, &c.* Amyot. Cette
traduction n'est pas exacte, elle ne rend pas
le sens du texte, & en supprime une phrase
toute entiere. On ne mettra ici que la ver-
sion de Jungerman, le passage Grec étant
trop long. *Nemo amatorum, Domine, hisce
perscrutandis curiosè moram ducit. Quin quale
quale in corpus, quod pulchritudine claret, inci-
dit statim capitur. Ea propter & plantam non-
nullius deperit, nec non flumen, etiam bestiam.
Et quidem quis non miseratus fuerit amatorem
qui necesse habet reformidare amatum? Ego ve-
rò, &c.* En conformité de ce texte on a traduit
dans cette nouvelle édition; *Celuy qui aime,*
&c.

Pag. 139. l. 18. *Lamon persistant dans son dire, &c.*] *Lamon le regarda franchement entre les deux yeux, sans se troubler, jurant par tous les Dieux que ce qu'il avoit dict estoit véritable, & que s'il lui plaisoit s'en informer, il trouveroit qu'il n'estoit point menteur. Dionysophanes, &c.* Ceci est plutôt une paraphrase qu'une traduction, le Grec est plus simple, on s'y est ici conformé.

Pag. 141. l. 3. *Daphnis le voyant venir à luy, &c.] Mais Daphnis le voyant accourir vers luy avecq' si grande suite de gens, en criant jetta fluste & pennetiere & s'enfuit vers la mer pour se jeter dedans du haut d'une roche coupée, croyant que ce fust pour le prendre qu'ilz accouroient vers luy : & à l'aventure estant retrouvé par autruy, se fust-il luy-mesme perdu (qui eust esté un cas fort étrange) si Astyle s'estant apperceu, &c.* Amyot. Cela est exprimé plus vivement & avec plus de simplicité dans l'original, principalement ces mots, & à l'aventure, &c. Ἰδὼν δ' αὖ τὸν μετακαίβωντα Δάφνις νομισας ὅτι συλλαβεῖν αὐτὸν βεβλόμενος τρέχει εἰς τὴν πύργον καὶ τὴν σύριγγα, πρὸς τὴν θάλασσαν ἐφέρετο εἰς τὸν αὐτὸν ἀπὸ τῆς μεγάλης πέτρας καὶ ἴσως ἂν τὸ καινότερον εὔρεσθαι ἀπολώλει Δάφνις, εἰ μὴ σάνεις ὁ Ἀστύλος, &c. On a rendu littéralement ce passage dans cette édition.

Pag. 142. l. 4. *A peine les pouvoit lascher, tant la nature se fait croire aisément.*] *A peine les pouvoient lascher, tant il est aisé de retrouver & congnoistre son sang.* C'est ainsi qu'Amyot a traduit ce passage, mais mal. *Pouvoit* doit être au singulier, car il s'agit de Daphnis. D'ailleurs cette réflexion, *tant il est aisé de retrouver son sang*, ne vaut pas celle qui est dans l'original : *tant la nature se fait croire aisément*, tant la persuasion de la nature est prompte, οὗτο φυσίς ταχέως πισεύεται.

Ibid. l. 17. *Et fis exposer, &c.*] *Fis exposer cestuy petit enfant de maillot.* Amyot. Il y a dans le Grec, καὶ γενόμενον ἐπὶ πάνσι ἔστο τὸν παιδίον ἐξέδικα, & *prognatum post omnes hunc puellum exponendum curavi.* Amyot ne devoit pas oublier cette circonstance, *cest enfant venu le dernier*, qui n'est pas inutile pour excuser l'exposition. On auroit pu ôter *de maillot*, qui ne sert à rien.

Pag. 143. l. 13. *Qui sçavent tous quelque mestier.*] Il y a dans le texte Grec, δεξιῶσι, *adroits.*

Pag. 148. l. 17. *Furent d'avis de ne point encore, &c.*] Traduction d'Amyot. *Furent d'avis de tenir encore leur mariage secret, & que Chloé ne descouvrit point son amour qu'à Nape sa nourriciere.* Mais Dryas, &c. Amyot s'est

trompé : il ne s'agit point ici d'une confiance que Chloé doit faire , mais plutôt de celle que Daphnis fera à sa mere ; le sens y conduit : Βουλευομένοις δ'ε'α'υταῖς εδοκει το γαμον προπτειν εχειν δε κρυφα την Χλοην, προς μονην ομολογησαντα την ερωια την μιτεβα. *Ceterum habito inter se consilio , nuptias celandas censuerunt, Chloenque clandestinè ad, ervandam solitantum matri amore ipsorum indicato. Verùm enimverò non placuit itidem Dryanti.* On voit assez que leur avis étoit de déclarer leur mariage à la mere de Daphnis. Ce ne pouvoit pas être celle de Chloé , puisqu'elle n'étoit pas encore connue. Dryas ne fut pas de cet avis , & jugea plus à propos de le dire au pere même de Daphnis , à Dionysophanes. Ainsi il ne s'agit point du tout ici de Napé.

Pag. 152. l. 1. *Et par-dessus tout cela liberté.*] I Il y a dans le Grec , και ελευθεραν γυναικα : & liberam uxorem.

Pag. 157. l. 14. *Les chevres mesmes paissoyent , &c.*] *Les chevres mesmes paissoyent là auprès , comme si elles eussent esté participantes de la bonne chere des nopces , & Daphnis en appellant aucunes par leurs propres noms , leur donnoit de la feuillée verte.* Traduction d'Amyot. Il y a dans le Grec : ενεμοντο και δε αι αιγες πλησιοσπερ και αυται κοινωυσαι της εορτης, τωτο τις

XX Notes sur les Am. de Daph. & Chloé.

ἀσυκοῖς ἔ πάνυ τερπνὸν ἦν Ὅ' ὃ Δάφνις καὶ
ἐκάλεσε τίνες αὐτῶν ὀνομαδί, &c. *Les chevres
mismes païssoyent là auprès, comme si elles
eussent participé à la feste : ce qui ne plaisoit
pas beaucoup aux bourgeois : (aux habitants de
la ville) & Daphnis en appelloit quelques unes
par leurs noms, &c. Amyot avoit obmis cette
derniere phrase : ce qui ne plaisoit pas aux
bourgeois.*

Pag. 158. l. 26. *Se coucherent nuds.* Amyot
a mis *coucherent entre deux draps.* Outre que
cette expression est trop triviale, elle n'est
pas conforme au Grec, qui dit, γυμνοί συν-
κατακλιθέντες, *nudi concubantes* : d'ailleurs
elle doit se rapporter à ce qui est dit ci-
dessus, pag. 44, qu'ils n'osoient pas cou-
cher nud à nuë.

F I N.

8035



